

Manila Literacy

NGÀ HEMTAHU



TBOLI

NGÀ HEMTAHU

LITTLE PILGRIM'S PROGRESS

Tboli of S. Cotabato



SUMMER INSTITUTE OF LINGUISTICS-PHILIPPINES, INC.

TRANSLATORS

1979

PUBLISHERS

PUBLISHED
in cooperation with
Bureau of Elementary Education
and
Institute of National Language
of the
Ministry of Education and Culture
Manila, Philippines

Tbolt
Pilgrims Progress - 2nd Printing
17.57-179-5.4C 54.20P-796004NG
Printed in the Philippines
SIL PRESS

PREFACE


This Tboli reader has been prepared for publication as part of our literacy program of providing reading materials in the vernacular for new literates.

Roberto Tohol, a Tboli from the area of Edwards, Surala, S. Cotabato, translated the text from the original edition of *LITTLE PILGRIM'S PROGRESS* by Helen Taylor.*

Rosemary Rodda, a member of the Summer Institute of Linguistics, Philippines, illustrated the text.

Literacy Committee
Summer Institute of Linguistics
Nasuli, Malaybalay, Bukidnon
Philippines

* Used by Permission.
Moody Press
Moody Bible Institute of Chicago



1

KBUT KUNGOL NGÀ HEMTAHU YEM BENWU TILOB

Tehe wen sòtu ngà logi boluyen Ngà Hemtahu. Nim ngà ni nù bè yem benwu bong boluyen Benwu Angat Meglà. Bè yem benwu bong yó tày dê ngà libun ne ngà logi nù du. Kesok mnóng kdaw sòn mò le tendo hligal, sòn mò le là mdengen. Ke gel kmulón là hol le gel hligal yó kem ngà, tódô le nù bè gunù, gel hnungol le ke wen tau tmulón tutul.

Gel wen tau maùy bélé le bè yem benwu yó, bong nawa le tau. Ket na sulék le gel maùy bè yem benwu yó. Ne gel le mít swè bè yó kem ngà. Wen gel tulón le kul lem wót bè yem sòtu benwu boluyen Benwu Tilob.

Mon yó kem tau maui yó, Wen tey benwu tilob, okóm mayuk bè nim benwu ni. Yem Tau Geta mogot du, tey tau temngón, ne tilob kogoten benwu. Ne tey hyu kenawahen, bong nawahen kem ngà. Tólóng se kun kmò yem tau geta bè nim kuy benwu, mon le. Là kô knoduhén yó kem mogot béleen, ne tey sidek kmoen. Alí mójô mit sfatay, mon le, ne tey bong knutó nawahen tum kum gunu mogot. Okóm, mon le, angkat wen kdawen angkat wen sendalu lemwót gu bè tum benwu tum Tau Geta tu ne e mit sfatay bè yem kuy gunu mogot. Ne angkat gotu mlób nim benwu ni, ne angkat le gotu matay kem tauhen.

Ne hentukul yó kem ngà, mon le, Mò kmò me se kum du?

Ne bnalà yem tau, monen, Eles tnagak ye ne nim benwu ni, nim igò ye là deng tuha, tolo ye kemgis mógów. Ne mógów ye ebè tum benwu tilob tu, monen. Kaem tódô ye angkat menek du tum benwu tu, laen dù hlayam ye du.


Tey dê dulék Ngà Hemtahu tendo mungol du nim gel mon le ni, ne sòn moen tendo hemdem du. Okóm ke gel monen mò yó kem dumuhen, Lemwót tekuy etu bè tum Benwu Tilob tu, mom sòn mò le tendo kmuli du, mon le mò du, Tódô tutul hkawang, tum Tau Geta tu. Laen dù dumu benwu geta senta nim benwu tekuy. Okóm tendo hendem Ngà Hemtahu, monen, kà dóen tahu tum benwu gel tulón tu kem tau maui tu.

Sotu kdaw bè yó kun, wen surat ton Ngà Hemtahu, ne bud senged snéen senfalaken lemwót bè tum Benwu Tilob tu. Monen bè yó, Alí mfasang tum

Tau Geta nù du, ne tilob kogoten du tum benwuhen.
 Ne bud senfalahren bè yem sulat yó yem angat gotu
 klób yem kun benwu, ne angat matay kôê yó kem tau
 nù du kesok angat sut tum Tau Geta tu.

Omin Ngà Hemtahu tmlók du yó kem dumuhen
 yem sulat yó, mom milud tendo keskuli le du, mon
 le, Deng tey legen ne ksulat le du yem sulat yó.
 Deng hilu halayen ni ne deng kegen le smulat du.
 Laen dù muhen ne ni kmoen ni, mon le. Là kô
 le deng mógow edini he tu kem sendalu monen bè
 yó. Là kóen ne e tahu. Mom hyu nawa tekuy tendo
 là mdengen.

Okóm là dogen móyô là mdengen kun Ngà
 Hemtahu. Lumun tô miteg kegnómen du, ne tey
 kebang nawahen. Ominen tódô myón, ne hendemen
 ke dô tonen tum lan mógow ebè tum Benwu Tilob
 tu anien ke tek sotuhen. Là kóen deng hol bong he



yem ngà yó, lelen likò mógów sotu tum tey mayuk.
Ominen bud mebel yem sulaten, ne bud senfalahen
yem tey tilob nù du. Wen sotu tonen bè yó, monen,
Yem hol Ngà tum Tau Geta tu deng tehe gu bè yem
Benwu Angat Meglà, ne mudél ebè yó kem tuha le,
monen mò kul, Bè ye ngali mógów ebéléu yó kem
ngà ye.

Mon Ngà Hemtahu, Yake sana tolo knuen bè
ni. Ngunte kà dô niten do mulék etu bè benwu Maen.
Là kô new e gógów du sotu tum tey mayuk tu.

Mosok lewok Ngà Hemtahu, kemlol ebè hifihen,
ne temdak ebè kgalen. Igoen mifu du kun, tonen
deng tey nusing yem nesen. Deng tey legen ne
keseken du yem nesen yó, deng gotu móyón któ.
Ni temnú yem alí kebang nawahen abay se baluen
ke tonen tum angkat lanen ebè tum benwu gunun
esolu tu, déke kendel bolok yem nesen gu laanen
là deng gefet ditu. Ne mò kehmóyóen du tum
Tau Geta ke deng bolok nesen?

Ominen ma yem sulaten, niten mulék ebè
gunuen. Tey kehtaw yê dien yem alí kliteg Ngà
Hemtahu, bud yem alí kebang nawahen. Ne tulón Ngà
Hemtahu ke yê dien yem tô kógówen ebè tum Benwu
Tilob tô gunun esolu. Mom kmuli yê dien, lumun tum
tehe keskuli le du tu kem dumuhen. Mon yê dien mò
du, Gunum nungel myó. Benwu du tilob senta nim
benwu tekuy ni? Ke sôn moem tendo mógów smidok
mung yó kem tau maui yó, ngem kà angati lana.

Ominen lem wót tungô kun Ngà Hemtahu, mkik
efet tódô gtungô.

KESTON LE NGÀ HEMTAHU MIT TULÓN HYU

Timbow hlafuls bè yó btik Ngà Hemtahu. Tey mnóng kdaw, ne són mò le tendo bud segwas yó kem dumuhen. Tô tnaba le Ngà Hemtahu ke mójô mung kul, okóm mom monen, Là mójôe segwas. Yakem lemwót tekuy ne dé ebè tum Benwu Tilob tu.

Tey nungei dem u, mon le. Són tendo monem benwu yó. Tódô géhél nem e hnebel sen, mon le. Béem són mò sembeweg ni dum kum kesegwas.

Omin le gotu semtagak du. Tek sotuhen nù bè yó. Ominen sut yem sotu ngà libun boluyen Ngà Bun niten twolihen. Deng eles mdà bè yó se kun yem tendo keskuli le ke Ngà Hemtahu yó kem dumuhen ngà. Tey sidek se kegnómen du kun yem kesedkà le du.

Na, mon Ngà Bun. Moem bud mkik ni du? Béem bud tendo hnungol ne dé tum udél tu kem tau gel tmulón tum Benwu Tilob tu. Yó but gunuhen gel lembang nawahem. Mungi do dé ne te e tmool bulók mò liég nim ngà.

Yó dô nójô Ngà Hemtahu. Hyu kenawahen kun yem Ngà Bun, balù là hentahuhen yem gel tulónen du lemwót bè tum Benwu Tilob tu. Okóm là hnowonen du lumun yó kem dumu ngà.

Igò le mógów mon Ngà Hemtahu mò du, Tngónem kô nim tey blat nbóu ni? Ni gunuw mógów ebè tum Tau Geta abay se laen dù dumu gembek mkó nim blat nbóu ni, tek són du.

Mon Ngà Bun mò du, Gunuhen nù de yó dum blat nbóem yó? Là tonu du dou.

Mon Ngà Hemtahu, Nù te kwangu, yó gunun là hol hyu kegnómu du, ne gele miteg. Yó monen mò ke Ngà Bun.

Ne mon Ngà Bun se mò du, Dô wen desem, moen ke yó hendemem? Laen dù ton te nbóem.

Mon Ngà Hemtahu, Là kô nem e ton du, okóm gnómu dou, monen. Ni se angat tendo hliteg do ke là géhélen mkó.

Nù le bè gunun wen tey bulóken ne le e tmoöl bulók, ne tey kehligal le. Okóm timbow le deng mulék, bud yó hendem Ngà Hemtahu yem Benwu Tilob. Són moen tendo lungun nawahen, ngangen lenbut yê dien. Laen dù yéen kembong nawa du, ne laen dumu mifa du snéen. Wen maen, yem sotu tau wen boluyen bè benwu le, okóm là kem hendemen du yó dum ngaen.

Deng hlafus bè yó, hendón Ngà Hemtahu bud tô kestonen ke Ngà Bun, okóm dê nmoen bè gunù kun. Ne là se dog le móyô bud segbót du yó kem dumu ngà, mon le tólóng se kun gel hendem. Omin Ngà Hemtahu tódô mógów etu bè tniba tek sotuhen. Ominen myón bè yem tubaw kbu, hedem nmoen. Timbow deng legen udí bè yó, gungolen wen legdeg tau mógów ebéléen. Ominen tukóng, ne tódô tonen yem tau gel mauy bè benwu le, boluyen Mit Tulón Hyu. Deng tehe gel ton yem tau se Ngà Hemtahu, ominen tódô mógów ebéléen ne stulón du.

Tedu nkikem ni? monen, tonen lewok yem ngà.


Ominen yó hyu kegnóm Ngà Hemtahu du, gungolen yem smólók du. Ne kendel tódô tulónen yem gunuhen lungun nawahen, yem hol tô óyóen mimón tum Tau Geta, okóm sòn mò le tendo semkuli du yó kem dumuhen. Balù yê dien ne Ngà Bun gotu là dog hemtahu du yem tulónen lemwót bè tum Benwu Tilob tu.

Ominen temngel ebéléen yem Mit Tulón Hyu, ne monen mò ke Ngà Hemtahu, Tahu se yem gel gungolem lemwót bè Benwu Tilob. Ne tey bong nawahen kem ngà tum Tau Geta tu, monen. Elesi lemwót ni ne. Ke mimóni, du he tendo tmanud kóm igoem mógów, ne ke dengi gefet bè tum Benwu Tilob tu, laen dù sónen kehligalem.

Mon Ngà Hemtahu mò du, Elese lemwót ni ne ke yó dum tngónu lan.

Ominen beklil yem Mit Tulón Hyu, ne temngel hlalak yem tniba gun gu mlan. Monen, Tonem kô tum labat wen tikeben sentu datal? Ominen temdok du.

Okóm là holen mdengen kton Ngà Hemtahu du, tolo knefen matahen bè yem lewoken.



Bud mon Mit Tulón Hyu, Tum wen solok
mnóng taken, tonem kô?

Deng tonu ne, mon Ngà Hemtahu.

Mon Mit Tulón Hyu, Tu se lan ebè tum Benwu
Tilob, mlani bè tum tikeb tuu. Ne ni wen surat
blayu kóm lemwót gu bè tum Tau Geta. Ne oguhen
ke Ngà Hemtahu yem surat.

Nwa Ngà Hemtahu yem surat yó, ne tonen wen
udél hlò snulat blówón nù du, ne senfala Ngà
Hemtahu yem udél lemwót bè tum Tau Geta,
monen,

Kenbongu nawa yem kembong nawa do,

Ne angkat tonen o yem hol mebel do.

Mon Mit Tulón Hyu, Yó se kun fasad bè tu
kem kun ngà tum Tau Geta. Bél bud mkik ne, ne
géhéli lemwót ebè tum labat wen tikeben. Ne ke
dengi gefet du, tmabahi. Wen sotu bè tu kem
hesek tum Tau Geta angkat lemwókà du béleem,
ne angkat hlauhen kóm yem bud gunuhem emlan
lemwót bè tu.

3

MGEL KULU NE MAHIL GMUNG

Tey dê dumu ngà segwas bè yó klohok bak tikeb
mógów ebè yem Benwu Angat Meglà. Ton le yem
Mit Tulón Hyu stulón ke Ngà Hemtahu. Là kem

hentaw le du abay sem deng hunù tendo ton le yó
kem tau gel mauby bélê le ne e gel stulón bè yó
kem ngà. Okóm timbow lemwót Mit Tulón Hyu,
omin Ngà Hemtahu lemwót, mlóy dmatal ebè tum
tikeb, ne kdê yó kem ngà hentaw yem gunuhen
emógow.

Weyò. Gunun emlóy tum Ngà Hemtahu? mudél
yem sotu.

Mon kem dumu, Kô nan e hnebel tum Benwu
Tilob.

Mon sotu, Angat lana mtu. Na tekuy e ktes,
ne bud nwit tekuy mulék.

Lewu ngà deng gel tehe segbót ke Ngà Hemtahu,
boluy le Mgel Kulu ne Mahil Gmung. Deng le malù
lembang senta Ngà Hemtahu kul, okóm lu tendo
dumuhen gel segbót. Là holen hyu kesegbóten kun
yem Mgel Kulu abay se són knóyóen yem kun lan. Ne
tódô kem gel mung Mahil Gmung kun, monen aní
laen dù sfatay. Là hol kem kenmón Ngà Hemtahu
kul, okóm Mahil Gmung knóyóen.

Munu nawa ni kem lewu ngà kton le ke Ngà
Hemtahu deng mlóy hlalak yem datal. Balù yem
gel là hol kesegmung le béléen, okóm là móyô le ke
lana.

Mon Mgel Kulu, Bud hulék te edini. Tey nungel
ngà mtu, ket tulón du, ket hentahuhen.

Mon Mahil Gmung, Lemwót te sen, munge kóm.

Omin le yó lemwót mlóy kemtes du. Yem igò
le mlóy, són mò le tmaba huli ke Ngà Hemtahu.
kóyô le ke hatanen lu.

Mom likò Ngà Hemtahu kungolen yem taba le
huli du, ne là dogen kem temngel semfulék.

Hendemen, Ke bud nwit le o mulék, là kóe bud gewà bélé le.

Ominen lemwót mlóy, tódô kem hotuhen hol sôn lóyen. Ngangen mlóy efet miteg, lemwót bè yem blat nbóen. Ngangen ne gafit yó kem ngà yó abay se deng le tahà ne kemgis senta Ngà Hemtahu kul.

Mon Mgel Kulu, Gunuhem esolu de? Tedu yem gunuhem alí hmayam heflóy kum huli kóm?

Bnalà Ngà Hemtahu, monen, Mógówe ebè benwu tum Tau Geta. Móyô ye mung do kô?

Kmulí Mgel Kulu, Bée dou. Benwu du se tô naw e hnebel ke deng wen do benwu bè ni?

Mon Ngà Hemtahu, Bong angat kehlígal tekuy ke tu gunu tekuy nù, bè tum Tau Geta tu. Bong tilob he tum kun benwu senta nim benwu tekuy ni, ne angat menek knù tekuy du. Deng tehe tulónu kuy se, monen, nim benwu ni, là kóen menek nù du. Angat mlób nim benwu tekuy ni.

Mon Mgel Kulu, Là kô tngónem du myó. Moen ke kestulóni nungel?

Mon Ngà Hemtahu, Là kô ungel du dé, igoen nù bè nim sulat nwitu.

Bud kmulí Mgel Kulu, Denge tmakas mon du mò kóm, monen. Yem sulatem yó deng tey klabihen, laen bud dù muhen ni kmoen ni. Laen kô dù ne e tahu du yó kem udél nù lemen yó. Móyói bud mulék kô ke là?

Lembut Mgel Kulu, ne tô mdódól nawa Ngà Hemtahu. Okóm tódô hen-gelen malà du, monen, Là. Henlósu kógówu ni.

Mon Mgel Kulu, Yo hlósi sen. Ne bud monen mò ke Mahil Gmung, Hyu kem bê te ktes koni yem ngà nungel yóó. Là tngónen du yem hyu béleen.

Okóm tódô htengen mdà ke Mahil Gmung, ne monen, Béi kmuli. Déke tahu yem surat Ngà Hemtahu, angat du he hyu senta te. Munge dou.

Hyu nawa Ngà Hemtahu, monen, Yó, mungi do.

Tonem he angat tey kehlial te ke angat te nù bè tum Tau Geta tu.

Mon Mahil Gmung, Dô tngónem kô angat tonem benwu tu?

Tngónu, mon Ngà Hemtahu, abay se deng tulónen do Mit Tulón Hyu. Mógów te ebè tum bak tikeb sentu datal tuu, ne angat wen tau semlong kut bè tu. Angat tulónen kut lan bud lem wót bè tu.

Mon Mgel Kulu mò ke Mahil Gmung, Tahu kô tô kógowem yó? Baluen he ke tahu wen yem Benwu Tilob yó, là kô na ye e ton du.

Là dog bnalà Mahil Gmung du, mom hekteng loloen Ngà Hemtahu. Deng gel hnungolen snéen kun tum udél tu kem tau gel mauy béê le. Okóm hendemen, Olohu són bè tum bak tikeb tuu ne e hnénég kmò tum lan.

Bud mon Mgel Kulu, Là hentawu du yó dum Ngà Hemtahu, okóm uu dé, Mahil Gmung, wen tngónem kóm. Budi mung do mulék kóm, monen. Là kô tulónu du he yem tô kmungem yó.

Okóm là holen gel móyô ke Mgel Kulu yem Mahil Gmung, ne hendemen tódô mò kun atul. Omin Mahil Gmung mon du mò ke Mgel Kulu, Là ne. Deng hendemu ne dou kmung nì. Muléki kóm ke là móyói mung.

Mon Mgel Kulu, Là. Mom tódô hyu nawaw ke
skóhe bélê ye lewu ye. Nungel ye.

Olo Mgel Kulu lemméd kul, bud tódô mulék
ebè Benwu Angat Meglà kun.

4

BOB HUNU NAWA

Timbow tek són lu, lewu le dù tebel, mon
Mahil Gmung, Hol tulónem do kun mò kmoen tum
Benwu Tilob.

Yó, mon Ngà Hemtahu, tey hyu benwu. Là
deng gungolem du kô yem gel tulón yó kem tau gel
mauy bélê tekuy? Gel mon le wen Tau Geta nù du
alí tilob kogoten benwuhen. Ne là kô le miteg yó kem
kun tau, ne laen dù des le, ne són mò le hligal.
Wen nes bukay sminang gel lesele le, là kóen gel
nusing, ne là se kóen bud bolok.

Mon Mahil Gmung, Ngunte kem dó hotun le
tu du?

Mon Ngà Hemtahu, Ê, hotun le tu gi. Tehe
mon Mit Tulón Hyu. Ngem, monen, wen tehe
blayen do, sulat gu bè tum Tau Geta tu.

Omin Ngà Hemtahu mból yem sulat ne
hesfalahren ke Mahil Gmung. Hwiten ebéleu tum
Tau Geta myó, monen, aní ngónu yem angat
tey khódóhen do ke mógówe etu bè kun benwu.

Okóm mon Mahil Gmung, Laen deng hwiten ebéléu he dou.

Bud mon Ngà Hemtahu, Là deng ye ston Mit Tulón Hyu he. Kun dé, tngónu kaem angat hlígal snéen tum Tau Geta ke tonen se uu kóm.

Yó, mon Mahil Gmung, hol bud tnulónem o kun. Tedu hol nmoem ke dengi gefet ditu?

Yó gna nmou, mon Ngà Hemtahu, naw na gna ston tum Tau Geta. Ominu angat smólók béleen gunuhen nù yê. Tehe tnagaken o hanae tolo udi, ne sôn mou tendo bud gel gemtulón du nawa. Mon yem sotu tau gel mauy bélê tekuy ditu kun gunuhen nù, bè tum Tau Geta tu. Yó hendemu dô ditu snéen gunuhen nù bè tum Benwu Tilob tu.

Mò dô kegenen du omin te gefet ditu? mon Mahil Gmung. Deng snólókem bè Mit Tulón Hyu kô? Hol te heflóng dé.

Hyu kem hole hlóng, mon Ngà Hemtahu igoen deng miteg. Munu nawaw déke léét te bè lan. Wen nim nbóu blat, alí hemblat do, yó gunuhu là hlóng.

Hol tô nbut Mahil Gmung se mon du, Tedu yem gel monem wen blat nbóem alí hemblat kóm? Ne tódô sen-gengen se geblos elem yem bob bè lan. Ne tonen yem deng keglanen elemen. Wóyóy, monen, gunu te deng nù ni?

Étey, mon Ngà Hemtahu. Alí ngelem gunuhen egeblos kun yem Ngà Hemtahu abay se alí blat yem nbóen. Tódô te hgel msok lówó te, monen.

Deng le mom langaf ni du kem lewu ngà. Là dog bud tngón le du lan le hewà. Boluy yem

bob yó, Bob Hunu Nawa. Ne tey sidek mlán lemen, balù lomí tau. Ket tô klafang yó kem ngà mom milud kegebeng le. Ne tey kebut Mahil Gmung.

Tenngelem, monen, deng tey hlayam te ni. Hlò kóm salà ni. Hyu kem bée tehe mung dou, monen. Ni he hanà but nim kógow te. Ngunte kmoen he angkat lan te ni? Ke gewae bà ni lem bob ni, kà beng tódóe bud hekteng mulék dou. Tódô són uu, sotuhem, ne e mebel du tum benwu tu.

Là dog bnalà Ngà Hemtahu du. Feng kun langaf, ne tey sidek kegebengen lemen. Yó hol tô hendeenen ke sut Mit Tulón Hyu mò ne e tmóbóng du, okóm laen dù tau tonen. Tolo mayuk he ditu sendifaí yem datal gunun mton yem nóng solok ta yem labat wen tlleben. Ne seblà te kwangen yem Benwu Angat Meglà. Là dog tenngel Mahil Gmung du kun yem lemayag, ne ominen gekà lem yem hitok, okóm là dog mom tmóbóngen du yó dum dumuhen. Timbow temngel ete kwangen Ngà Hemtahu, tódô tonen tum Mahil Gmung, tódô kem hotuhen són lóyen mulék. Tey kebang nawa Ngà Hemtahu yem là bud ktonen ke Mahil Gmung. Là gbeku du ke là hlóse ebè tum Tau Geta, udélen igoen mklk. Ominen bud tmlów tô msok lówóhen, mebel gunuhen mgel tonok. Timbow deng tô mili nawan, ominen btang lem klinguhen yem mudél, monen, Béem htafa nawam, ou ne tmóbóng kóm.

TMÓBÓNG MTON KE NGÀ HEMTAHU

Deng là buden hol mgel lemangat ne Ngà Hemtahu, yem kungolen yem mudél. Mon nawahen dô kéng tum tehe mon Mit Tulón Hyu gel kbenteyen kem ngaen mógów tum Tau Geta. Igou hanà udl ní, monen, ne là denge hol hulung hetngón. Là deng gkuhu du he ním datal níl, ngunte mò angat kmou he ke denge kól bè tum bulul geta ne tum éi ngelem?

Ominen tódô kendel sut yem ngà logi boluyen Tmóbóng, sotu hesek Tau Geta mlan lemoni bè yem bob ne tonen se Ngà Hemtahu. Tey hyu kenawan yem Tmóbóng, tódô kendel mlóy ebè Ngà Hemtahu nen e tnóbóng.

Mò kegebengem ní, mon Tmóbóng. Là dog gtulón Ngà Hemtahu du du.

Monen, Mon Mit Tulón Hyu mò do, mógówi ebè tum labat wen tikeben, okóm là tngónu du ní dum bob bè lan.

Là tonem du kô yem botu gunu mdà? mon Tmóbóng.

Là, mon Ngà Hemtahu. Stulón me Mahil Gmung, ne là kô me dog temngel ebè tonok.

Mon Tmóbóng, nungel myó. Nù se Mahil Gmung du kun?

Deng gekà kun koni, okóm là dog tnóbóngen do, mon Ngà Hemtahu. Ne deng bud mlóy mulék.

Mon Tmóbóng, Yó, bét hlikò. Ou he tmóbóng kóm. Kaem tendo sen-gyoken uu he tum Tau Geta. Nì se gunun hógów do edini mò ne e tmóbóng kóm. Nì, mogoti bè sigelu, monen, ne hnuem bè nìi tihem. Yó. Ihi kun, dengi gewà ne.


Tódô setbol kkel Ngà Hemtahu igoen mdà, lel nì dum lewoken tódô htosok. Teyi hyu tau, monen, là kóe gekà ke tek són o.

Là, mon Tmóbóng, là kóì ne e gekà. Mógówi ebè tum Benwu Tilob kô?

Mon Ngà Hemtahu, Tóe mógów etu se okóm kô temnú tendo ksideken kut nìm lan. Naw na hangat kbongu tau he dé, monen.

Bê, mon Tmóbóng, béem feng nangat. Tum Tau Geta he tendo temngel kóm, ne wen he hógówen mò gel tmóbóng kóm.

Tahu kô? mon Ngà Hemtahu. Igou hanà udi, són mò le mon du mò do tu kem dumuhu, Laen dù tngónem.



Mon Tmóbóng, Kunen dé yó du kem udél tau yó. Ke uu hol kun tau tum Tau Geta tu, angat wen gel semgyok kóm bè lan. Bong tahà se yem angat lanem yó, ne wen gunun sidek snéen. Okóm ke henlósem lemolò du, angati gefet du he tum benwu tu, monen, ne angat bong kehligalem ke tonem tum Tau Geta.

Tey hyu kestulón Tmóbóng ke Ngà Hemtahu, botong là buden likò stulón du Ngà Hemtahu.

Angat tonu ditu kô yê? mon Ngà Hemtahu.
Nù ditu se bè tum Tau Geta?

Ke nù bè tum Tau Geta tu, angat tonem he, mon Tmóbóng. Deng kegenen kkólen etu? monen.

Hanae udí he ktagaken do, mon Ngà Hemtahu.
Là deng tngónu du he tum tehe ktagaken do, okóm wen tuladen nù bè gunù, tu angat gunuhu dmiô du.
Tey tilob tum tuladen.

Mon Tmóbóng, Kaem tey bong nawan kóm. Là kô le ne e kmifót tu kem kun tau tum Tau Geta tu. Deng dô tulónen tum Tau Geta ne yem kógówem etu yó. Deng són mò yéem mangat kóm ne ni.

Tey kegen Tmóbóng myón bè tonok mifu yem hitok bè nes Ngà Hemtahu. Nifuhen doun bnes. Monen, Deng tey nusing ne ni kem nesem. Okóm angat wen nesem lomi he gu laanem là deng gefet bè tum benwu tu. Béem kó mata tum layag solok bè labat wen tikeben tuu, monen, ne hgéhéli husek elemen ke soki kól ditu. Yó ne, monen, béem klifót tum Tau Geta tendo tmanud kóm.

Mon Ngà Hemtahu, Olohem tmulón do ni dii, dengi gu ditu kô bè benwu tu kóm?

Là, mon Tmóbóng, olohu lemoni klohok tum tikeben. Tolo wen hmoen do tum Tau Geta. Là tagade nù ditu ke là dengen deng.

Mon Ngà Hemtahu, Mò kegenen du ominu gefet ditu?

Là tngón te du, mon Tmóbóng. Wen se tau legen, wen se là. Okóm ke nimónem tum Tau Geta tu, angati gefet ditu. Du tendo tmanud kóm. Yó, monen, lemwóte ne. Ke wen bud knikoem, tódô tnabahem tum Tau Geta. Gel hnungolen uu.

6

GESLONG NGÀ HEMTAHU HMAHIL

Wen bulul monti bè yem Benwu Angat Meglà, wen ngà Benwu udí nù sentuhen. Tey dê tau nù bè nim ngà benwu udí ní, gel mon le, lu hesek tum Tau Geta. Tódô kem óyô le gel tô mimón du ne tô kembong nawa du, okóm ní kem tau ní sôn hendem le kul knóyô ne kul gunu hligal. Là móyô le nù bè yem Benwu Angat Meglà abay se wen yem deng gel gungol le bè yó kem gel mauy bè yó, okóm là se dog hendem le du ke mógów le ebè tum Benwu Tilob. Sidek yem lan kun, tey glayam yem tau lemólò du, tey henneged, ne tey nosol. Yó tódô le tólóng tmíba sôn lu bè yem sentu bulul, mon le menek ne tinof.

Ne wen ngà logi lemwót gu bè yem benwu yó, boluyen Hmahil. Kelel se kun kógów ebè yem datal yó yem igò Ngà Hemtahu mógów. Tódô dilô Hmahil Ngà Hemtahu abay se gel wen tau lemwót bè yem ngà benwu uđí yó mógów ebè yem Benwu Angat Meglà ne le e nauy yó kem gna wè le. Timbow ton Hmahil yem ngà mógów, tey ketngahen, monen, Tedu yó dum nógówem deng mayuk bè gunuem yóó. Ngà Hemtahu kô yem mógów yóó? monen. Dengi bong mayuk bè benwuhem.

Tey knuun logi yem Hmahil, lelen tahà, ne tey hyu nawa Ngà Hemtahu abay se wen dmlô du, ominen tódô malà du, monen, Mógówe ebè tum labat wen tikeben tuu.

Mon Hmahil, Moen de?

Naw e kó ním blat nbóu, mon Ngà Hemtahu.

Tahu se, mon Hmahil, tngónu se dou yem gel hliteg tau. Là kô kdéen du tau gel gemnóm du yó, okóm ke gel wen gemnóm du, là kóen menek nawan ke là dengen mkó.

Tey tnga Ngà Hemtahu bè yem udél Hmahil abay se sòn mò le tehe semkuli du kdê yó kem ngà bè Benwu Angat Meglà. Ne gel mon le yem blat nbóen, tódô kem olo kun lelen mon.

Mon Ngà Hemtahu, Démê ke béen bud tahà ne taru mit du. Na heflóng dé ebè tum labat wen tikeben tuu.

Tau du hógów kóm etu? mon Hmahil.

Yem tey tau hyu kenawahen deng geslongu, boluyen Mit Tulón Hyu, mon Ngà Hemtahu.

Kmulí Hmahil, monen, Bong hyu kenawahen dé, okóm là kóen temngón myó. Deng tngónu tau yó, monen. Ngem, ne te tulón kóm yó dum lan mahil gunuhen mkó nbóem blat yóó. Bèl hliteg mógów edu tu dum tey benwu mayuk tu. Tngónu se yem tulón Mít Tulón Hyu kóm. Són yó se tendo gel tulónen yó kem dumu tau. Tódô ket tau deng gunuhen gel tmulón du myó. Tengelem yó dém deng knuem lem bob, ne ke deng gkuhem tum labat wen tikeben, ngem, angat tey hlayam sut béleem senta yem gnan. Tey dê lóbô gel mógów lem bnes angat semsesék kóm, ne ngem, kâ angati tódô lemnus, ne angati tódô matay bè klitegem.

Mon Ngà Hemtahu, Okóm bong blat nim nbóu, kóyóu ke mkó tahu nim ni, yó se són lan hkó du tulón Mít Tulón Hyu do.

Mon Hmahil, Tahu dé, okóm dô wen ungelem nim uu. Mô ketngónem du yó dum monem nbóem yóó?


Mon Ngà Hemtahu, Deng senfalahu bè sulat tum Tau Geta. Kdê tau sal wen kul nbô lumun nim do.

Mon Hmahil, Yó se du, són olo gunuhen hyu sulat yó bè kem deng temngón. Okóm yó dum ngà hanà udi lumun uu yóó, tolo là hyuhen béleem he. Baluen ke gel senfalahem, là kô nam e tngón du yem nù lemen yó. Ni dii nmoem, tulón te kóm. Ke ou uu, là kóe bud mulék ebè tum Benwu Angat Meglà tu. Là holen menek nù du. Ke o uu, tódô hñilolu nim bului nii ebè tum ngà benwu udi. Wen kem weu nù bè yem gunù gunuhem

gna sut, ne ke tulónem kul ou hógów kóm etu, kaem hotun le uu, ne tey le masa tu kem tau tu, monen. Ne ke dengi malù legen uđi bè yem benwu yó, là kô bud tngónem du ne yem blat nbóem yó, ne là se bud gnómem du.

Là hol bud tngón Ngà Hemtahu du mò kbalaen du bè yem alí kehyu uđel Hmahil. Hendem Ngà Hemtahu dô hyu ke yó gunuhen nù klokok yem kun gna benwu. Monen, aní nan bud gel ton Ngà Bun.

Bud mudél Hmahil, Là kô ne e wen hyu tonem ke là nímónem du ním do dók kóm ní. Béem bud hendem tu dum Mit Tulón Hyu. Yó se lan, hnílolem yem bulul yóó. Là kô nam e klifót du tum gunù abay se yó gunù angat gna gunuhem sut.



Omin Hmahil kmolut lem sning sewelen,
 lemwót mnuhul mool, igò lakay onuk mteg te
 sloungen. Ne tódô klifót Ngà Hemtahu tum
 Tau Geta ne yem sulaten. Ne deng mom knogolen
 yem labat wen tikeben, mógów ebè tum ngà
 benwu udi sentu bulul.

7

KETLAS NGÀ HEMTAHU

Omin Ngà Hemtahu heftóng ebè yem ngà
 benwu udi ngangen mógów efet miteg. Mom
 hno lien blat yem nbóen ngangen efet tô masà.
 Timbow deng gefet bè yem bulul, yó mò du là
 buden mgel mógów. Yó hendemen, monen,
 Ngunte kem angate gefet du tum benwu gunu le
 nù kem dumu Hmahil.

Okóm yem knuen bè kilil yem lan lemileb
 bulul, deng mom tô klifóten yem nbóen abay
 se deng ali sidek ktonen yem lan, là deng wen
 lan tonen lumun nim lan ni. Tey kmantib. Ne
 tey botu myón kudung ete lan, móyón tô mluy.
 Hganag Ngà Hemtahu ngangen efet sut béleen
 klikoen, là dogen bud gehlós. Yó któónen lumun
 tô wen tonen dilóf ofi gu lem yem léhéek ngangen
 efet tey sidek klikoen.

Hyu kem bée tehe mógów dou, monen. Tedu
 bang kmou ni?

Ne tódô wen tau tonen hegfan hanà mayuk.
Timbow deng moni yem tau, émonem Mit Tulón Hyu.
Laen kem dù kligal ton Ngà Hemtahu
béleen, ne yó mò ke Ngà Hemtahu, sidek kyaken,
monen, Yakem hugón yem botu bong yóó aní
wen gunuhu hebnos. Deng sidek kyaken bè là
kimónen ke Mit Tulón Hyu.

Tedu nmoem bè ni du? mon Mit Tulón Hyu.

Mom kudung Ngà Hemtahu, là kóen temngel
ebéleen, ne là se dogen mudél.

Sundu uu kô yem ngà tehe tonu klokok Benwu
Angat Meglà?

Ou se, mon Ngà Hemtahu.

Bud mudél Mit Tulón Hyu, monen, Moen se
ni ke dengi mom nù bè ni igoen sundu ni lan ebè
tum bak tikeb tu?

Mkik Ngà Hemtahu, monen, Là kô lenbuu
du abay sem wen ngà mon du mò do nam e kó bè
tum ngà benwu udi yem blat nwitem. Ne deng
tey sidek klitegu, monen, lelu likò. Déke lubék
etahu yem bulul, lel tey léhé.

Omin Mit Tulón Hyu mon du, Holi hmungol dé.
Tum Tau Geta hógów do edini ne e tmulón du kóm
kmò tum Benwu Tilob ne yem fasad deng blayen
kóm. Tey bong nawahen kóm, ne sôn moen tendo
mingat temngel kóm. Ngem sem tehe kegebengem
lem bob, du se hógów ke Tmóbóng ebéleem ne e
mkay kóm, monen. Ne deng gel senfalahem bè yem
sulatem yem tendo kebenteyen yó kem smalig béleen.
Moen ke hentahuhem yem mon Hmahil mò kóm? Ne
deng mom knogolem tu dum labat hlauhu kóm.


Tey sidek kyak Ngà Hemtahu, ne tey kiken.
Omin Mit Tulón Hyu mnok te kulohen, monen,
Deng mom là bud hefligalem du tum Tau Geta,
okóm ke hegsele, là bud hendemen du yem deng
gmoem bè là kimónem du.

Mon Ngà Hemtahu, Là bude hbakà ne. Deng
tey hulì selu bè nim deng gmou ni, monen. Okóm
tahu du kô hnifót tum Tau Geta nim deng gmou ke
hegsele?

Tahu se, mon Mit Tulón Hyu, kaem són moen
hmifót du ke wen sidek gmoem abay se wen tum
tehe Ngaen, tey bong nawahen kem ngà.

Bud mon Ngà Hemtahu, Ke hlóse etu bè labat
nrikeb, là dô huléken do du tum tau nù bè tu?

Mon Mit Tulón Hyu, Là kô kóyóen du tum
Tau Geta ke wen huléken tum tau munung bè tu
tu. Olohem tódô ne e tmaba aní kendel ne le e
lenungkà béleem. Ni, monen, mogoti bè stgelu,
nalak te u hulé nim bulul.



Nifu Ngà Hemtahu lewoken, ne baling hyu
nawahen deng wen tau bud tmóbóng du semfulék
ebè yem datai tehe lanen. Timbow gku le yem bulul
alí hnagang, ominen tey mtataw kton le yem nóng
solok ta yem labat wen tikeben.

Mon Mit Tulón Hyu, ke holi heflóng là kói kifu
bè lan, ne tu he gunuhem tungô. Yó ne kóó.

Omin Ngà Hemtahu hekteng lemólò yem lan ebè
labat wen tikeben.


8

KKÓL NGÀ HEMTAHU BÈ LABAT TNIKEB

Deng tek udí duen gunuhen là sdef kdaw kgefet
Ngà Hemtahu bè yem labat tnikeb. Tey keheflóngen
abay se là móyóen kifu yem dmatal. Deng hyu
nawahen deng moni bè yem labat tnikeb, okóm yó
dum deng tey klitegen. Tey labat tnikeb tilob. Ne
wen solok téwéng taken, tey mnóng anien ke mnóng kdaw
là kóen mili nóngen. Ne wen snulat le ta yem
tikeb labat tilob, monen,

TMABAHI, ANÌ WEN LEMUNGKÀ DU BÉLÉEM

Mon Nawa Ngà Hemtahu, Na, deng duhen ní yem
tehe mon Mit Tulón Hyu.



Ominen tmaba bè yem tikeb yó, hnungolen ke wen
ne e lemungkà du béleen, okóm laen dù gungolen.
Ominen bud tmaba, ne tódô sut yem tau malù wen
tô keskél le Mit Tulón Hyu, ne e lemungkà du
béleen. Senged knes le Mit Tulón Hyu, ne tey
tilob kenawahen. Gamé yem ktonen ke Ngà
Hemtahu, monen, Ngà kóm de?

Ngà Hemtahuhe, mon yem ngà. Hyu kô ke
huseke?

Boluy yem tau yó, Hyu Kenawa, ne monen
mò ke Ngà Hemtahu, Lemwóti bè Benwu Angat
Meglà kô?

E, mon Ngà Hemtahu. Tóe mógow ebè tum
Tau Geta.

Omin Hyu Kenawa lemungkà yem tikeb ne
hfuseken Ngà Hemtahu. Yem igò Ngà Hemtahu
mógów elemen, mom malù kteng Hyu Kenawa.

Moen yó du? mon Ngà Hemtahu.

Là, mon Hyu Kenawa. Wen tey gunù
bongen lemont bè ni tum Datù Sidek. Ka gel
wen tonen ngà tmagak tum benwuhen ne lemolo
kun lan Tau Geta, gel hegtien tu kem sendaluhén.

Omin Ngà Hemtahu temngel ete kwangen,
tódô tonen hanak deng gdek bè yó, ne hyu nawahen
deng bud tnikéb Hyu Kenawa yem tikeb.

Ni ne deng tinof kegnómu du, mon Ngà
Hemtahu. Omin Hyu Kenawa mit du etu bè kun gunù
sentu yem labat. Ominen hefegnù du igò le
tmógó ken béleen.

Snólók Hyu Kenawa, monen, Mau du tmulón
du kóm yem lan ebè labat?

Mit Tulón Hyu, mon Ngà Hemtahu. Monen
uu he kun bud tmulón du do yem bud gunuhu emlan
lemwót bè ni.

Mon Hyu Kenawa, Yó, ou he tmolok du kóm.
Okóm moen de ni du ke tek sotuhem se mógów?
Laen dù maem ne yéem kô?

Mon Ngà Hemtahu, Deng kól ditu yê bè tum
Tau Geta. Bong ke mà kun du, tolo alí dê
nmoen, yó gunun là gógów. Ni gunuhu tódô
hemgel mógów sotu.

Mon Hyu Kenawa, ke nù ditu yéem, bè ni
snéen tehe dô gunun mlan. Wen he gunum
temngón du edyó bè lan ke hlós ním kógówem.

Tahu kô? mon Ngà Hemtahu. Yó se alí nù
bè nawahen ke wen gunuhen temngón yem yéen

tehe deng tmagak du. Monen, Tulón Tmóbóng do deng tulónen ke yê tum Tau Geta kun nim kógówu, ne sôn moen tendo mangat temngel do kun. Tahu kô tu?

Tahu, mon Hyu Kenawa, okóm là tagad tonem du ke là dengi gefet bè tum Benwu Tilob. Sôn du gel tonen uu kun. Tódô kewótem dítu bè gunuem kô yó egínu? monen. Là ngali le kóm kô yó kem dumu ngà?

Mon Ngà Hemtahu, Mgel Kulu ne Mahil Gmung kemtas do, ne tey kebut Mgel Kulu do. Okóm mon Mahil Gmung kun, móyô ke mógów etu kun bè Benwu Tilob. Okóm tey klíkoeu yem kegebeng me lem bob, yó gunuhen bud mulék kun. Ofol do ke là bude gekà do, okóm sut Tmóbóng ne tey hyu kenawahen ebéléu.

Mò kmoen se? mon Hyu Kenawa.

Tey kyak Ngà Hemtahu, monen, Senged me Mahil Gmung snéen, abay se yem kegestongu ke Hmahil, hnungolu yem udélen, ne denge mom mógów ebè yem ngà benwu udi. Tey sídek lan edu, ne tey klíkou. Ofol do ke denge gdilan botu, okóm sut Mit Tulón Hyu, ne du bud malak do ebè yem lanu edini ni.

Mon Hyu Kenawa, Ni dengi gusek bè ni, dengi ngà tum Tau Geta. Tungói kni kifu ni, ne toloku kóm haya he tum lan ebè Benwu Tilob.

KESLOB NGÀ HEMTAHU BÈ TMUGOD

Timbow deng hayahen bè yó, deng malù hyu ne kegnóm Ngà Hemtahu du, deng gehegnù. Ominen bud htifes lemwót. Omin Hyu Kenawa malak du elaan, ne toloken du yem lan, là holen bong, dmatal.

Wen syaten kô lan ni? mon Ngà Hemtahu. Mò kmou du ke kóle bè gunuhen wen syat?

Mon Hyu Kenawa, Tódô loloem yem lan tedeng, yó se lan ebè tum benwu gunuhem angat esolu. Hlò sigol yó kem dumu lan, monen, ne lamang. Fen sikeb kun yó dum tahu lan. Tódô hentedengem yó dum kóm kógów. Ke hol hnénégem, là kól tlas du.

Bud mon Ngà Hemtahu, Kóhem do dé nim nbóu nit. Hyu keheflóngu ke là wen nim ni.

Mon Hyu Kenawa, Là gbeku du do myó. Tódô hen-ganagem mit du efeti kól bè tum koyu senfifay, yem gel mon le kdos. Ngem kà tódóen bkas, là kô bud tngónem du.

Mon Ngà Hemtahu, Ilóu angat kehyun. Wen kô dumu gunù angat níus bè lan?

Wen se, mon Hyu Kenawa. Kô talak kemdaw kedeng gefeti bè gunù yem tau boluyen Tmugod. Tey hyu tau. Ke móyót ston du, angat tey dê toloken kóm.

Ne yó lemwót Ngà Hemtahu. Tey tilob
knóng kdaw, ne maan nawa Ngà Hemtahu
mógów. Gungolen yó kem tey dê udél onuk,
mom tô milud kehyu nawahen, gotu klifóten
yó kem tehe hlayamen bè Benwu Angat Meglà.
Laen kô bang dù hemsidek do bè ni, hendemen
igoen mógów. Odoy Hmahil tum tehe monen
angati likò bè lan, ne gotu ken le u yó kem mógów
lem bnes.

Timbow nbuten hemdem yem nan tô kehegnù
likót, tódô kendel tonen se yem tey gunù bong
mdà klokok lan. Ne hendemen, dô yó gunù
Tmugod.

Ominen motun eta bè bak dól, ne tmaba.
Ne ominen wen tau sut ne e smólók du.

Mon Ngà Hemtahu se, Ngae milo, mógówe
ebè benwu tum Tau Geta. Tungóe bè Hyu Kenawa
ebuteng, ne tulónen do ween kun ním tau fun
gunù ni. Hyu kô ke stone du?

Ominen mógów etu lemen yem hesek yó, nen
e tulón tum amohen, ne omin Tmugod hewà.
Deng tuha yem tau yó, tahà, ne tey tahà bngeten,
bukay. Ne hendem Ngà Hemtahu, dô temngón
tau ni.

Ominen mnok te kulu yem ngà, monen, Moem
de?

Mon Ngà Hemtahu, Tô hnénégu yó kem ali
hentaw ton nù béleem kun. Deng mon Hyu Kenawa
naw e nauy u kun.

Gemé Tmugod, monen, Weu se yem Hyu
Kenawa yó. Ominen mon du, Ngai milo ebè tum
Benwu Tilob kô? Huseki elemen, ne te na tolok
kóm yem nýô tonem.

Ominen malak yem ngà elem tum dfél lamang.
 Wen tulad ton Ngà Hemtahu téwéng stímbang
 bè bak dól. Tímbow ton Ngà Hemtahu, tey ketngahen,
 ne tódô htengen mdà. Laen deng tau tilob ton Ngà
 Hemtahu semnged yem tau yó. Mógów gu te bulul
 yem ktulad le du. Tódô slíbut du bótóng hagang,
 lei tey sual gotu kendel gunuhen ksê nesen, ne hlò
 litô bè tihen botong lan botu. Wen ngà ubiha
 sniwiheh. Là kóen hol bud mgel yem ngà ubiha
 yó, tódô kem hifayen te abalen yem ubiha.
 Wen udél snulat laan yem tulad yó, hlò blówón,
 monen:

GOTU NEN E SENTIFUN TU KEM NGÀ UBIHA NE SNIWIHEN LU

Mon Ngà Hemtahu, Tehe lana kô nim ngà
 ubiha ní?

Lana se, mon Tmugod. Lana, ne deng tô
 móyón matay. Ngem, tey klitegen yó, bulen
 gotu kdut. Okóm tey hyu kesegyoken ubihahen yem
 tau yó, gungolen yem kédéwen, ominen ne e mebel
 du, ne nwiten ebè gunuen.

Mon Ngà Hemtahu, Tey dô lan sidek. Ngem
 ni kem halí bè tihen, botong lan botu.

Mon Tmugod, Tey lan sidek, okóm là
 dogen kem gseng du abay se wen ngà ubiha
 hnebelen. Deng toloku kóm nim tulad ní abay
 se tum tau hyu kesegyoken ubiha se, Ngà tum
 Tau Geta gunum esolu yó. Hningun te bè klong

nawan tu kem ubihahen yem kbong nawan ke wen
milo ebéleén. Ne hningun te bè kem ubiha yó kem
milo. Hol bud hendemen ni ke blat nawahen, duhen
ke wen knikoem, monen. Hol hendemen mau du
yem tendo tmanud kóm.

Ngae milo se do, udél Ngà Hemtahu ebè
Tmugod.

Ngat milo, mon Tmugod, lumun yem ngà
ubiha sniwi yem tau hyu kesegyoken ubiha. Ni
wen dumu bud toloku kóm, monen.

10

HEMKOSO, MANAY NAWA, NE YEM SENDALU LÔBÔ

Là dogen tô móyô tmagak yem tulad Ngà
Hemtahu. Monen, Là kê naw e klifót du yó tulad
yó. Tey tilob tau, monen, botong kéng lem uyó yê.

Omin Tmugod mit ke Ngà Hemtahu eta bè
yem sotu dfél. Lewu ngà tonen myón bè yó lem dfél.
Menek kenawahen yem sotu ne hligal, okóm yem sotu,
mkik, ne lumun tô là gsengel nawahen.

Mon Tmugod, Na le legen bè ni he ni kem
ngà ni. Boluy yem ngà mkik Hemkoso, ne yem
twoguhen boluyen Manay Nawa.

Mon Ngà Hemtahu, Moen ke mkik Hemkoso?

Mon Tmugod, Nungel myó. Angat wen basa
hwit tum Tau Geta, ne ket ngà angat gotu wen kul.

Móyô Manay Nawa kun ke nan na nangat, okóm fen henkoso Hemkoso kun. Kóyóen ke géhél kól béleen.

Ne tódô kendel wen tau lemungkà yem tikeb, tey dê nwiten, gotu hlasaen klokok Hemkoso. Hyu nawa Hemkoso, kendel nifuhen lewoken, ne kendel hnénégen yó kem yó. Ne wen sning tonen henok hlò filak mgel, blówón. Ne timbow ton Hemkoso, btù kullihen, omínen kmayang du eta, kmuli ebè Manay Nawa lgoen laen dù kun.

Mon Tmugod, Tey hlígal ke Hemkoso kun, okóm ke deng legen udf, angat gotu tum filaken, ne baling sidek tu kem lusaem du dumu nù béleen. Ne ke deng gefet tum basa hwit tum Tau Geta, angat laen kun. Ngem kà angat huli selen he. Ngem kà angat monen du hyu kem naw na hangat lumun ke Manay Nawa.

Mon Ngà Hemtahu, Mò kmoen tum kun basa tum Tau Geta?

Bong mayuk bè ni he, mon Tmugod, là kóen ne e sidek tum kun basa tu. Hyu ke Manay Nawa kun, nan na nangat.

Mon Ngà Hemtahu, Deng hlígal kun ke Hemkoso, okóm angat tilob tum ke Manay Nawa.

Tahu se, mon Tmugod. Kdê ni kem toloku kóm ni, sal wen gutahem du. Béem kendel hendeen keblayen kóm tum Tau Geta ke là dengen kól bè kun keblay du kóm. Du he gotu temngón yem wen mu tekuy du, ne yem angat tekuy hlígal du. Ke mkél kuy ke Hemkoso, són kóyóen kun lan, angat huli sel tekuy.

Omin Tmugod mit ke Ngà Hemtahu elaan etu talak lósól nan e tolok du yem sotu tey gunù

tilob mayuk udi bè gunuen yó. Tódô datal te ketefen yem gunù yó, ne wen kem tey dê tau mógów taken, mnes smínang kéng tô blówón.

Yó kô sotu gunù tilob tum Tau Geta? mon Ngà Hemtahu.

Yó se, mon Tmugod, okóm là kô tódô kdeen du tau gusek du.

Ne ton Ngà Hemtahu wen tey dê tau nù bè lewà yem gunù tilob yó. Lumun tô le mýô husek ktonen kul, okóm là mlos le. Ne wen se kem dumu tau tonen mit le ngom sfatay, mdà bè yem bak dól. Alí le dô lóbô mton kul, yó gunu le là gusek tu kem tau nù bè lewaen. Ne wen sotu tau myón malù mayuk udi bè yem bak dól, gel snulaten boluy yó kem gel tô tmlów husek.

Ne tey mýô temngel du Ngà Hemtahu yem tonen yó. Monen, Kóyô te dé ke wen tau lóbô bélê le tu kem tau tuu, husek elem tum gunù tilob nim ígou nù bè ni nii. Moen là hlikò kul mayuk tu du kem sendalu sidek tuu tu dum Tau Geta? monen. Ke gotu lohen lu, ngem kà gotu le gusek tu kem dumu tendo tmimbul gu bè lewaen tuu.

Mon Tmugod, Là kóen legen kehóhen kul, okóm tenngelen mahil du hol musek nawan bélê le hmusek tum gunù. Yem tau alí kembong nawa tum Tau Geta, là kô le likò husek kul. Ngem, na te nangat likót, angkat wen tau husek.

Omin le myón bè yó bè tonok, són mò Ngà Hemtahu tendo temngel tu kem tau. Ominen wen tau ton Ngà Hemtahu hewà gu lem yem tey tau sbung, mógów elemen. Ne tódô mógów ebè

yem sotu tau myón smulat. Tonen deng nù ditu
kun boluy, ominen lemeket kimuhen sfatay, ne
diloten sudengen, ominen demlu elem blóng yó
kem sendalu. Tey kegenen sfatay kul. Ofól ke
Ngà Hemtahu ke deng matay yem tau yó. Bong
dê hallen, okóm gusek elemen kun, omin le gotu
semngal tu kem tau nù te ketef, mon le:

Huseki, huseki,

Tey knuun mton kóm matù,

Ne laen dù sónen yem ofolem du.

Gemé Ngà Hemtahu, Tu dilóu gunun e temnef yó.
Bê tekuy hlikò abay se wen tum Tau Geta tendo
tmóbóng tekuy efet khusek tekuy bè tum kun benwu.


Tu se, mon Tmugod. Deng tódô tngónem. Ni
deng geblà tonem ne ni kemdaw ni. Mebel te béleem
mò gunuhem tungô, hlósi haya ha.

KSUT NGÀ HEMTAHU BÈ KDOS

Tey kegtungô Ngà Hemtahu yem kifu yó, ne
ominen tódô hlafus yem deng haya. Nan na nbal Tmugod.

Deng tey mahil kton Ngà Hemtahu du yem lan sentu
yem gunù Tmugod abay se sbalà lenabat. Mon nawahen,
ni dé dô mahil lemólò du.

Okóm mon Tmugod mò du, Là kóen hlós etu
bè benwu tum Tau Geta yem labat yó. Ke deng
gkuhem yem labat, monen, tódô henlósem lemólò



yem lan tedeng. Ne ke henlósem lemólò yem lan yó, laen kô gfaem du.

Botong bud tô klifót Ngà Hemtahu keblat yem nwiten yem knuen bè Tmugod, okóm timbow deng bud lemwót bè yó, ne e kini? kdaw, yó he bud kegnómen du, kóyóen ke géhé! mkó taken. Yó hendemen, monen, Tehe mon Hyu Kenawa, ditu he kun bè kdos gunuhen mkó nim nbóu ni. Ngunte kà tolohen mayuk duen?

Ominen kól bè yem wen ngà bulul udien klokok lan. Ne tonen ta yem ngà bulul udí yó yem tendo hendemen. Mdà ta yem bulul yó yem

kdos. Timbow nbut Ngà Hemtahu mneged edu, tódô gnómen bkas yem alí blat nbóen, ominen tódô bkas gu te abalen, ne mluy etu bè but yem bilil, ne tódô là bud tonen du. Nan na tnga mò du, lumun tô là hentahuhen du ke deng tahu lana yem nbô alí hemblat du. Hendemen kà dô knahen du mni. Ominen na htengen mdà, ne knisengen matahen, ne senged se, là kô bud gnómen du.

Lelen tendo mungol ni du kem udél onuk, lel tey nóng kdaw. Ne hendemen là kóen tungô. Monen, Deng tum Tau Geta mkó du bélêu mtu koni. Ni ne nù kóyô keheflóngu, monen. Ominen tendo temngel yem kdos, ne tey kdóyónen tum Tau Geta.

Deng tehe gu bè Benwu Angat Meglà se ne bud gtulón bè nawahen yem tehe senfalaken lem wót bè tum Ngà tum Tau Geta. Tey hyu kenawahen bè kem tau, okóm tey dê tau kmutó nawa du, ngang le mò du efet kenfô le, ne hnatay le bè ktutuk le du bè yem kdos. Ne deng hteg le bè yem kilil lan yem kdos yó aní ton yó kem tau milo ebè tum Benwu Tilob. Yó mò gunu le hemtulón nawa yem deng gmoen bélê le tum Ngà tum Tau Geta. Ne deng gotu gel senfala Ngà Hemtahu bè sulaten ni kem ni. Ne deng tngónen gunu le kembong nawa tum Tau Geta tu le Mit Tulón Hyu ne tu kem dumu tau, ne són mò le tendo tmulón du. Mon Ngà Hemtahu, Dô tehe wen snéen kul nbô lumun nim do. Ne dô bè ni snéen gunu le tehe lemana kul, bud lumun nim do. Btang lewoken yem igoen temngel ebè yem kdos.

Ominen mungol yem mudél seblà te kwangen,
monen, Wen ne kóm kenek.

Omin Ngà Hemtahu beklil, ne wen tlu tau
tonen moni klohoken, mnes le sminang bukay.
Ne timbow temngel ebélê le Ngà Hemtahu botong
tô kfuteng, hol lumun ke henbótong tenngelen tum
mata kdaw.

Mon nawahen, Dô le lem wót bè tum benwu
gunuhu angat esolu ni kem ni, kat le alí tilob.

Mudél yem sotu, monen, Deng dê dulékem
hemblat nawa tum Tau Geta, okóm ni nógowu
naw e tulón kóm yem kehlifóten yó kem tehe
nmoem sidek ne kdê yó kem deng gmoem, là bud
hendemen du ne.

Ominen malak du yem sotu, monen, Deng
tey sidek kbolok nesem, là hyu bud mton du.
Kóyô tum Tau Geta ke tilob nes kem ngaen, ne
ni wen nes nwitu béleem.

Hol tô nbut Ngà Hemtahu se hemdem tô
kbalaen du, tódô là bud tonen du yem nesen deng
bolok, ne deng baling nù bè lówóhen yem nes
bukay nwit le béleen.

Lem wót yem getlu le tnandaen Ngà Hemtahu
lem uyóhen, monen, Ni se tandà tum Tau Geta.
Ne wen surat oguhen du, monen, Mò gel senfalahem
bè yem lanem mógow. Ne hol sen-gyokem, abay
se ni mò angat tolokem ke dengi kól bè bak tikeb
tum benwu gunuhem angat esolu.

Omin le lem wót yó kem tlu tau mnes sminang
bukay, ne tek sotu Ngà Hemtahu tagak bè yó. Tey
kehlighalen bè yem nes deng blay le du.

LÀ TEMNGÓN, MDUK NE LÀ SGAFAS

Ya botong kehlígal Ngà Hemtahu yem igoen mógow. Yó dé, monen, deng lana yem blat béleu. Ke deng tehe tngónu nim ań kehýu lemólò tum Tau Geta, denge sana lemówt yu ne ekni.

Ominen gemtulón nawa ke Ngà Bun. Koduhen, monen, yake tehe mung kun. Okóm là tngónen kesegyoken tu du kem tlu twolihen. Lel tu dum twolihen hanà uđí.

Yó hendem Ngà Hemtahu ke tehe mung Ngà Bun tódô senbalu le mit tum ngà hanà uđí. Lel tu he kem dumu ngà logi twolihen ke na le e miteg. Mon Ngà Hemtahu, Tódô tulónu tu hem Tau Geta gunuhu esolu ań wen tau hógówen mò tmóbóng ke Ngà Bun mit tu kem ngà, kóyóu ke hol mógow se ke Ngà Bun kun.

Bud hendemen, Ngunte kà dô tulón yê du tum Tau Geta yem tehe ktagaken do bè Benwu Angat Meglà. Ngunte kà deng tngón yê du nim deng kko yem blat nbou ne yem deng kehwtiten ebéléu nes tum Tau Geta, mon nawahen. Tey tilob kem nes ni do, monen igoen bud hemklol yem nesen deng blay le du yó kem tau mnes smínang bukay. Hol lumun kbukayen luf, lelen là kını, ne là se blat lemsek du. Là mkelen bè yem gna nes boloku.

Tey dê hendemen igoen mógow, ne tódô tonen se yó du kem tlu ngà hlilil bè klilil lan. Ominen

na mdà nen e hol tenngel lu, ne tonen tolo le tungô,
ne tonen gotu kendina le lu.

Tey sidek kkinî yem kdaw, yó gunu le nù bè
kilil lan yó kem ngà, na le tô hegnù likôt. Okóm
són mò le se tendo temngel yó du kem hesek Datù
Sidek, anî kesok wen kem tau milo gel hegnù bè
kilil lan, ne ke gel le tungô, kendel gel nfét le
lu. Ke là tu hem Tau Geta bud hógow tau mò
tmóbóng kul, là kô le bud gewà, ne là kô le bud
gehlós ebè tum benwu gunu le esolu.

Là se móyô Ngà Hemtahu tmagak kul, ominen
mógow ebélê le ne ttabahen lu. Géhél ye btik,
monen, igoen sbeweg nim benwu bè ni. Là tngón
ye du kô wen tau deng mfét kuy?

Ominen sotu bélê le lengilos, yem boluyen Là
Temngón, monen mò ke Ngà Hemtahu, Moen.
Tódô mudél igoen tolo tungô. Laen dù tonu
hemsidek kum bè ni, monen. Béi tlek hlala kut
dé.

Okóm mon Ngà Hemtahu, Tngónu angat wen
tey gfa ye, btik ye anî tmóbóng te yu mból yem
lingkal deng fét le kuy.

Ne bud btik yem sotu ngà masà klokok Là
Temngón, boluyen Mduk. Myón, knisengen
matahen igoen alî moo ktuken. Olohen temngel
ebè Ngà Hemtahu, okóm là dog hnungolen du yó
dum tô monen. Moen ke hnulowem mi? monen.
Tódôi gna dé. Hulihe he dou ke denge gehegnù.

Ominen mudél yem getlu le, boluyen Là
Sgafas, monen, Ke kum kóyô nmò tódô kum nmò,
laen dù kóm du. Ke móyô me tungô bè gunun
sidek, laen dù kóm du. Tódô henlelem kóm

kógów, laen dù kóm du ke wen nmò kem dumu tau.

Omin le gotu bud segeng hlugod hlilil klohok Là Temngón. Ne tódô mtal long le, deng sana ngelem bud ktungô le, lumun yem tehe ksut Ngà Hemtahu bélê le. Là dogen bud hegfét bè yó Ngà Hemtahu, tódô tmagaken lu, lelen sidek nawahen lan le là dog hmungol du. Là kô hendem le du deng wen mfét kul.

13

HEMTEDENG.NE HEMNÊ

Timbow deng malù mayuk lan Ngà Hemtahu tmagak yó kem tlu ngà tungô, ominen bud bingóy semfulék. Ofol kun ke deng le tahu btik, ne kóyô le ke deng mkó bélê le yem fét le. Okóm laen dù tau tonen. Ominen hekteng mógów, ne tódô bud gungolen yem muni seblà bè iwóngen, ne tódô tonen se yó kem lewu ngà mkaf bè yem labat. Ne ton le Ngà Hemtahu se kul, omin le mlóy abéléen.

Gunu ye gu de? mon Ngà Hemtahu. Boluy yó kem ngà yó Hemtedeng ne Hemnê.


Mon le, Lemwót me bè yem benwu boluyen Hton Dóyón, ne ni na me e navy tum Tau Geta.

Okóm là deng lan ye bè labat tnikeb, mon Ngà Hemtahu.

Mon Hemtedeng, Bong mayuk bè benwu me kum myó. Tódô hnahit me ním kum kógów.

Yó hendem Ngà Hemtahu, là kóen móyô kun tum Tau.Geta ke lumun ni kógów tau ebéleen. Ominen mon du mò kul, Munu nawahu kuy, hyu kem bê ye nmò kut ním kógów ye ni. Olo ye hliteg mni.

Bê dê kmonem du, mon le, aní se tu du kem kum tau là kô le gel mlan bè tu bè tikeb. Sok olohem gefet bè yó nem tahu lan. Tu tehe kóm lan bè labat tnikeb, ne lan me hulé labat kum, ne ni deng senced knù tekuy bè ni.



Mon Ngà Hemtahu, Hyu kem bê ye nmô kut ni.

Kestulôn nungel, mon le, Gotu tekuy tódô senged snéen, sôn olo gunun stólóng wen nes tilobem kóm, tek blay Tau Geta kóm abay sem là buden hyu mton du yem gna lesekem.

Tey sidek kebkó le ke Ngà Hemtahu, ne deng tô hendem bud bnalaen lu, okóm deng senfalahren bè yem surat nwiten, tilob kestulôn le kul tu kem kun hesek tum Tau Geta. Anien ke sidek kebkó kem dumu tau, tódô bnala hyu.

Ominen mon du mò kul, Tahu se yem mon ye yó. Kem klówóhu deng gotu sidek tek blayen do tum Tau Geta nim nesu ni. Tey masa tau, monen, ne timu óyóu ni deng nmoen abay se tngónu denge kun ngà, ne ke denge kól dítu bè kun benwu, tódô kendel dilóen o. Ne deng wen tandaen do lem uyóhu tum tau mnes aminang bukay. Ni se kun tandà tum Tau Geta, mò ilóen do, monen. Ne wen surat nwitu mò toloku ke deng gesón nim kógówu. Laen dù kuy ni kem ni abay se là mlán ye bè tum labat trikeb.

Mo le mom kmuli yó kem ngà yó, omin Ngà Hemtahu tódô tmagak kul, bud hlós tek sotun.

Omin le kól bè but yem henneged boluyen Henneged Meklos. Hulé yem bului yem lan ebè tum Tau Geta. Tey lan sidek, ne alí mneged okóm hendem Ngà Hemtahu là gesyatan du. Ne wen éi tembul bè yó klokok lan. Kesok gel meeng Ngà Hemtahu nan na gel minum, ominen bud hemlel kógówen.

Deng le malù glayuk bè Ngà Hemtahu le Hemnê
yem kkól le bè yem gunun sesyat lan. Bak mu te
lemolò du ni tey lan sidek mneged nii, mon le. Hyu
ni kem lewu lan nii, mahil ne mló.

Ofol kul ke bud wen gunuhen lemebet ditu bè
lan tum Tau Geta ni kem lewu lan ni.

Mon Hemtedeng, Nii dou lolò, lan nii.

Mon Hemnê se kun, Yóó do.

Omin le yó skó bè yó, ofol kul ke wen angat
bud gunu le seglebet ditu sentuhen.

Ke tu he tehe lan le bè labat tnikeb, deng tngón
le yem kun lolò Ngà Hemtahu, yem lan tedeng yó
se tahu lan. Okóm ni kem lewu ngà ni, deng le gotu
lana abay sem là nimón le tum Tau Geta, tódô nmung
le kul kóyô nù gunu le esolu. Là lemwót le bè yem
tahu gunu lemwót mon tum Tau Geta.

Tey sidek tum kun lan lolò Hemnê, sut elem
tum dlag kmifu. Tey kegenen tódô mógów tmimbul
hilu butengen ngangen efet hatayen kenusen. Laen
dù tonen gunuhen esut.

Ne tey sidek yem kun lolò Hemtedeng snéen.
Tey henneged ne mosol, sut etu lem gunun alí kmifu
lem bulul, gunun gel glayam tau. Yó gel mò du,
medel tum lan, ngangen mluy bè tum tey bilil, ne btang
eta tu kem botu telem, yó hatayen.

HENNEGED MEKLOS

Tey mgel kegnóm Ngà Hemtahu du yem lan mneged. Hlò hagang, ne tey botu telem. Yó alí gunun hnali tihen bè yó kem botu telem. Són moen tendo minut sidek yem lan, ne tey meklos. Ngangen efet là hol bud gehnegeden du, ominen tódô kmadaw. Tódô kadawen bukolen. Deng talak kemdaw yem kmoen yó, ne tey kini. Tey sidek klitegen.



Ngunte kmou ekuloy, mon Ngà Hemtahu, ke tehe henlòsu kógówu nim tey sidek lan nii. Là kô gwitu du nim mneged nii tum tey blat nbóu.

Timbow deng sóólen yem mneged, deng malù hyu ne yem lan. Ominen yó bud hyu kógówen, ne là buden hol telem ne yó kem botu. Okóm tolo bong sidek he yem mneged. Ominen kól bè yem gunuhen golung. Ni eles tehe hmò tum Tau Geta mò gunu le gel hegnù ke wen tau hemneged yem henneged yó. Hyu nawa Ngà Hemtahu deng kól bè yó.

Omin Ngà Hemtahu myón. Tey lemnos kegnómen du, ne tinof. Ne yó hendemen ke nen ne bud tenngel yem sulat tehe blay la du yó kem mnes sminang bukay. Ominen ma du, ne senfalahan. Igoen tehe tô hemlel yem kógówen ne géhél tô kkólen ete tfusù yem bulul yó, deng mom feng kun hlelen myón bè yó, tendo hnénégen yem nesen, ne dê dumu hendemen, ngangen gulof, ne tódô hlós gtungô.

Song btik deng tey kimel, ominen temngel mata kdaw, deng mom hulô but longit. Ominen yó kendel hetlagad bud lemwót.

Yem hanà là deng kkólen te bulul, wen lewu ngà geslongen, mlóy hlosok. Mo le mom lemusék, ne tey klikò le, lel le kenkel. Okóm timbow ton le Ngà Hemtahu, ne le na mdà bè yó, stulón le du. Boluy le Likò ne Là Smalig.

Mò ye alí mlóy ni? mon Ngà Hemtahu. Gunu ye gu? Deng mom senwí ye nim lan.

Adéy, mon Likò. Tô me mógów ebè tum Tau Geta, deng gotun me ni dum bulul nii, okóm henlelen mayuk tô lan me, mom hnolien wen tendo gfa me. Ni gunu me bud mulék.

Tahu se, mon yem sotun boluyen Là Smalig. Wen lewu blek koyu ton me hlilil bè lan, okóm là tngón me du ke tungô le ke là. Okóm ke tehe me deng mlan lem blóng le, deng me gotu meglà nsék ne.

Botong bud gbót likò se ke Ngà Hemtahu kun, monen, Tey. Mò kmou ni?

Mon Likò, Tódôi bud mung kum mulék ne. Kóm gunu matay ke tói ne e mlan lem blóng tu kem tey lóbô tu.

Ngunte dé, mon Ngà Hemtahu. Ke bude semfulék, là kô tonu du tum Tau Geta.

Mon Là Smalig, Là se tonem du ke hlósi abay se wen tu kem blek koyu hmatay kóm.

Okóm bud gtulón bè nawa Ngà Hemtahu yem tehe tulón le du le Mit Tulón Hyu, ne Hyu Kenawa, ne Tmugod, yem tehe mon le, Baluen he ke wen knikoem bè lan, wen tu hem Tau Geta semgyok kóm, ne tendo tnanuden u.

Là bude móyô semfulék ne dou, mon Ngà Hemtahu. Gotu tekuy slomong ne, hlós tekuy. Déke tungô le tu kem lóbô ton ye bè lan tu.

Ê là, mon le Likò ne Là Smalig. Tódô hyu nawa me bud hekteng mulék ne kum, aní hyu kegnóm me du ke géhél me gefet ditu.

Omin le bud mlóy mosol kemone dog segfét tódô tnagak le Ngà Hemtahu. Là dog bud hendem Ngà Hemtahu du klikoen, monen, Na tenngel yó dém surat tehe blay le do, tu kem mnes sminang bukay. Ne hnénég ke tulónen lemen tu kem lóbô tu.

Okóm timbow tô hen-gnómen bè yó lem
sningen, là dog tonen du yó dum tehe surat yó.
Són moen tendo tô temngel du gu lem yó kem
nesen, là sem dog tonen du.

Gunuhén nù nì du? mon Ngà Hemtahu.
Ominen na htengen mdà hendemen gunuhén tehe
mogot du. Tey sidek kegnómen du abay se bud
gtulón bè nawan yem tehe mon le mò du yó kem
mnes sminang bukay, Hol henyuhem mit du
abay se angat snólók le béleem ditu bè bak
tikeb tum Benwu Tilob.

Là gehlóse mni ke hlós klana tum surat
tu, mon Ngà Hemtahu. Tey. Mò kmou du du? Ne
tódô htatang lewoken.

15

KKÓL NGÀ HEMTAHU BÈ GUNÙ TILOB

Yó gunun alí sidek kegnóm Ngà Hemtahu du
bè klana yem suratén. Là dogen bud nù bè nawan
yó kem blek koyu tehe tulón le du. Deng són
hendemen yem deng klana yem alí bong muhen, deng
tódô blayén du tum Tau Geta. Ominen tódô
gemtulón nawa yem tehe gunuhén tungô. Ditu dô
gunuhén kmifót du, yem tehe ktungóen. Ominen
tódô hetlagad lem wót.

Mou alí nungel nim o, monen. Olohu tehe
tô hegnù du dé, bée mom hgo lun deng mom ukol

kdaw. Hatane mom gefet te bulul mni kedeng
deng mom kifu.

Ominen beklil semfulék, hen-ganag hnebelen
tum tehe lanahen, kô wen gunuhen bemtang du.
Timbow kól bè yem tehe gunuhen hegnù, tódô tonen
yem tehe lanahen laan yem bangkù tehe gunuhen
tungô.


Ya tey kehju nawa Ngà Hemtahu yem deng
ktonen yem tey hnebelen. Tey kdóyónen tum Tau Geta
bè yem bud kehtonen du du.

Ni gunuhen alí ganggà Ngà Hemtahu bè kebelen
yem lana béleen. Timbow nbuten bud hemneged yem
henneged, deng sdef ne kdaw. Deng lemnaw te
tonok yem kgefeten te bulul.

Dou sala nim ni, mon Ngà Hemtahu. Ke deng
tehe hol henyuhu mit du, ne ke béu hlana, denge
eles gebel mò gunuhu tungô gu laanen là deng kifu.

Ominen bud gtulón bè nawan yó kem tehe blek koyu,
ne hendemen mò dô dù klayuken bè yem gunu le hlilil.
Ne yó hendemen, ni kem alí lóbô ni, sal gel le mebel
kenfô le ke kifu. Ne ngangen efet kifu ne yó mò ke
Ngà Hemtahu mom temnù klikoen. Ne deng wen dô
seklewet ne, ne tódô tonen sem tey gunù bong gfan
mayuk. Ne heflóng Ngà Hemtahu. Ê, monen, tey
gunù tilob tu de. Tódô hekteng etu lan ebè tum Tau
Geta. Ne wen ngà lowig mdà klokok tikeb yem gunù
yó. Ne monen, Dô gunuhen nù yem tau lemungkà
tikeb. Ominen kendel heflóng edu, hendemen ke
hyu ktungóen bè yó yem kifu.

Ne baling mom tifo yem lan, ne timbow
móyón getef ditu bè bak tikeb yem gunù yó, tódô tonen



yó kem lewu blek koyu tehe gunu le likò le Likò
 ne Là Smalig, hlilil bè klohok soluhén, tódô
 senbalà le yem lan. Wen fét le yó kem lewu
 lóbô yó, okóm là ton Ngà Hemtahu du abay se
 deng kifu. Tódô htengen mdà, hendemen mò
 tô kmoen du. Tek udí gunu le là sgefet yó kem
 blek koyu yó, ne ke mlan lem blóng le Ngà Hemtahu,
 monen, Kô sendlu le o.

Okóm wen yem tau gel lemungkà tikeb boluyen
 Mingat. Tngónen alí klikò le yó kem blek koyu yó
 kem tau gel mlan bè yó. Ne són moen tendo temngel
 gu tembó beng yem gunuen. Gel tenngelen ke wen tau
 mógow. Timbow tonen Ngà Hemtahu, ominen tmaba
 du, monen, Béi hlikò. Gotu le nfét yó kem blek
 koyu yó. Tódô loloem bè yem gunun sóól lan, là
 kô ne le e hensidek kóm.

Omin Ngà Hemtahu lemwót igoen kenkel, ne likò, okóm tódô loloen yem gunuhen sóól lan. Balù yem alí kngel yó kem blek koyu yem klanen bè yó, okóm tolo sana kehlilil le. Hyu nawa Ngà Hemtahu deng gkuhen lu, ne kendel mógów ebè yem tau mdà bè bak tikeb.

Gunù dum ni? mon Ngà Hemtahu.

Tum Tau Geta funen, mon Mingat. Gunù Tilob ni. Nmoen bè yó kem tau gel milo ebéleen, mò gunu le gel tungô. Mógówi ebè Benwu Tilob kô?

E, mon Ngà Hemtahu. Tungóe bè gunù Tmugod ebuteng. Hyu kô ke new hlun tungô bè ni kifu ni?

Té ksutem ni du? mon yem tau mentey bè yó.

Ne gotu tulón Ngà Hemtahu yó kem gfaen yem kimel yó eglnu, ne yem klanahen yem sulat nù béleen.

Tey, mon Mingat, yó naw na tnaba tu hem libun. Ke tahuhi mógów ebè tum Tau Geta, du he milô kóm.

Omin le yó mógów ebè bak dól tum Gunù Tilob yó, ne tnaba le yem tau nù bè yó.

KEM WÈ NGÀ HEMTAHU

Ne tódô hatan bè yó Ngà Hemtahu klokok Mingat, bè lewà yem Gunù Tilob. Ne tódô sut se yem libun boluyen Hulung Milô. Yó he hol tanay ton Ngà Hemtahu libun alí tilob lem baluhen.

Tnaba ye o kô? mon yem libun mò ke Mingat.
Ne kendel tonen se Ngà Hemtahu, ominen hemgimak
du.

Lumun tô tulad yê, mon nawa Ngà Hemtahu.

Ne bnalà Mingat yem libun yó, monen, Mógów
etu bè Benwu Tilob kun nim ngà nî, okóm ni dum
deng mfu kdaw, tô tungô kni ke móyól.

Tey dê snólók Hulung Milô bè Ngà Hemtahu.
Kóyóen ke tngónen benwu du gunuhen gu lemwót,
ne moen ke tnagaken benwuhen. Ne yó bud
snólóken béleen mau du tmolok du du yem kun
lan Tau Geta, ne gotu htulónen du yem hlayamen
bè lan. Ne snólóken se boluyen.

Ngà Hemtahu, mon yem ngà. Bong hyu nawaw ke
nam htungô o kni.

Nam tungô kni sen, mon yem libun igoen gemé
ebè Ngà Hemtahu. Tagad, monen, naw na tnaba kem
ngà libunu.

Ominen bud mulék etu lem gunù. Là kóen
legen bè yó, ominen tódô bud mulék, ne tlu ngà
libun mung du. Lewu deng malù twogu senta Ngà
Hemtahu, boluy le Gulit ne Temgama. Kembong
Nawa yem hol sôn twoli bélê le, deng le dô sanged
Ngà Hemtahu.

Ni se sotu ngà tum Tau Geta, mon Hulung Milô
ebè tu kem ngaen. Tungô kni bélê tekuy.

Omin Kembong Nawa tódô mógów ebè Ngà
Hemtahu ne e mogot sigelen, lumun yem gel kmò
Ngà Bun ebè Ngà Hemtahu igoen hanà nù bè gunù.

Huseki sen, mon Gulit. Hyu nawa me ton me
u sut kni.

Tey dê tau nù lem yem Gunù Tilob yó. Tey hyu khódó le ke Ngà Hemtahu yem khuseken.

Là dengen geblà bè kken tekuy he, mon Hulung Milô. Na ye hlun nwit etu lem dfél ye Ngà Hemtahu aní nen na hegnù, yakà mitegen.

Tahu se, nwit le Ngà Hemtahu etu lem dfél yó kem tlu ngà lbun. Tey tilob tum solok nù lem dfél le, lel tey dê tulad bè beng. Ne yó gunu Ngà Hemtahu hegnù.

Ke là alii miteg, mon Gulit, hol tulónem kum dé yem mò kógowem yóó. Moen tedu but gunum tmagak benwuhem?

Mon Ngà Hemtahu, Likoe abay se gel mon tu kem tau maury bélê me angkat meglà kun tum benwu me.

Ne moen se ke deng yó hendemem mógow ebè tum Tau Geta? mon Gulit.

Abay sem deng gesfalahu yem Benwu Tilob bè nim surat nù bélêu, mon Ngà Hemtahu. Ne sotu kdaw ston me Mit Tulón Hyu, ne du tmlók do yem lan ebè labat trikeb.

Tungói bè gunù Tmugod se kô?

Igò se, mon Ngà Hemtahu. Tey hyu nawan ebélêu. Toloken do tulad yem tau hyu kesegyoken ubiha. Ne yem sendalu sfatay bè lanen mógow ebè yem Gunù Tilob gotu tonu. Hol tô kóyóu ke naw na legen likót.

Tedu se nmoem kemdaw ni du? mon Gulit.

Lanu bè kdos, ne yó gunuw deng gemtagak yem blat nbou, ne ni blay le do tu kem mnes sminang bukay nim nes leseku nii. Ne wen surat blay le do lemwót bè tum Tau Geta, ne sotu bélê le tmandà do lem uyóhu, mon Ngà Hemtahu. Timbow deng yó, wen tlu ngà tonu tungô bè kilil lan. Tô bentiku lu, okóm là dog hnungol le do. Ominu mton kul le

Hemnê ne Hemtedeng, mkaf hulê labat, okóm deng
dô tólóng lan le abay se yem kbutu mneged, là
bud tonu kul.

Tey mima mneged du yó bulul yó, mon Gulit.

Yó se, ofol do ke là gotunu du, mon Ngà Hemtahu.
Lelu mton yó kem lewu blek koyu. Denge bud tô
mlóy mulék, okóm tnaba Mingat o, ne monen mò do,
Nfét le.

Omin Temgama smólók ke Ngà Hemtahu, monen,
Bud gel hendemem se kô tum benwu gunuhem lemwót?
Igò se, mon Ngà Hemtahu.

Bud gel hendemem kulékem edu se kô? mon
Temgama.

Ngunte kà deng lewu duléku du, lanu alí miteg.
Okóm tngónu alí hyu tum Benwu Tilob, angate hligal
ke gefete du, mon Ngà Hemtahu.

Moen ke angati hligal bè yó? mon Gulit.

Abay se angat tonu tum Tau Geta, mon Ngà
Hemtahu. Tey tehe alí kehsidek le du tum Ngà
Tau Geta, yem ktutuk le du bè kdos. Ne bong nawaw
du abay se matay bè salà tekuy, monen. Nù ditu
yê snéen. Tehe tnagaken o hanae tolo udi okóm dilóu
abay se wen tuladen nù bè gunù.

Wen kem libunem kô? mon Kembong Nawa.

Là, mon Ngà Hemtahu. Són sotu ngà libun
boluyen Ngà Bun tehe gel dumuhu. Tey hyu kenawahen
se kun.

Moem là mit du du, aní wen dumuhem stulón
bè lan? mon Kembong Nawa.

Là hentahuhen du udel tu kem tau gel mauy bélê
me, mon Ngà Hemtahu. Ne wen kem ngà gel tneyenen,
ne lelen alí dê nmoen abay se deng matay yéen ne maen.

Deng gel nubugem se kô aní mung kóm? udél yó kem ngà.

Igò se, mon Ngà Hemtahu, okóm là doge tô gógów snéen do ke là yem ktonu ke Mít Tulón Hyu ne yem ktoloken do yem lan. Ne ominu tódô kendel lemwót, yó gunuw là gembal ke Ngà Bun.

Mon yem sotu ngà libun, Ton Mít Tulón Hyu he yó, aní nwiten tu kem twolthen.

Omin le mungol taba yem tau gel tmógó ken.

Mken tekuy ne kun, mon Gulit.

Tey kbitil Ngà Hemtahu, lelen tey miteg.

Hyu nawan deng wen gunun mken. Omin Hulung Milô mit du eta elem yem tey dfeí tlob, ne yó gunun htungô ke Ngà Hemtahu. Ne tey kegtungóen, song btik deng sut kdaw.

ALÍ KEHLIGAL LE

Timbow deng haya bè yó ofol ke Ngà Hemtahu ke tódô bud hlós lemwót, okóm gungolen taba Hulung Milô du, monen, Hyu ke nam na hlun nù bélê me kól hilu buteng, yakà tolohi miteg, ne lelen deng tahà lanem mógow.

Móyoe snéen, mon Ngà Hemtahu, okóm kô mo ye mom lala do.

Là gi, mon Hulung Milô. Tóndu we. Yó se sotu nmò le bè tum Tau Geta ni kem do ngà, gel

tnóbóng le kem ngà mógów ebéléen. Bong hyu kegnóm me du ke gel wen ngà slob bélé me bè ni.

Tehe slob bè ni kô yê? mon Ngà Hemtahu, Menek boluyen. Dô ni snéen lanen yem tehe khangayen du tum Tau Geta. Deng tey legen ni ne, monen, hanae udi he tehe kewóten.

Mon Hulung Milô, Na tekuy tenngel bè tum gunù gunu le gel smulat boluy tau ke nù bè tu kun boluy.

Dô ye malù senged se, mon Ngà Hemtahu mò ke Hulung Milô. Botong gelek Hulung Milô yem ngà lanen mton yem kebtang lewoken.

Angat bud tonem he yéem, mon Hulung Milô. Són mò yéem tendo gel hlóni béléem. Là tonem du kun, okóm gel tonen u. Bong hyu kenawahen tum Tau Geta, tngónen kbong nawan ngaen yem yê.

Angat tonu ditu kô bè benwu tum Tau Geta? mon Ngà Hemtahu.

Angat tonem, mon Hulung Milô. Ne là bud tngaken kóm.

Mò kmò ke mà kun du? mon Ngà Hemtahu. Okóm tu dum tolo alí kdê nmoen, ngunte kem angat mógów etu kun. Dô tngónem kô angat gógów mà?

Ngunte dé, mon Hulung Milô. Okóm són moen tendo hemwit udel ebéléen tum Tau Geta, ne ke tngón maem deng kkól ye ditu lewu ye yéem, angat hendemen he yó.

Là kóen likò bè lan tu mà, mon Ngà Hemtahu, yakà lóbóen. Ngunte tehe kmò yê klanen lem blóng

tu kem blek koyu. Ke angat mógów mà, hol tulónem du nim knuu bè ni, ne ke deng gefet dítu bè bak tikeb tum Benwu Tilob, angat tonen o he, ne sòn mou tendo mingat du dítu.

Yó, tulónu du he, mon Hulung Milô. Ni tolo dê nmou. Mungi ke Kembong Nawa etu lem gunuhen nù yó kem sulat gunu le gel smulat boluy le. Tengelem ke nù dítu boluy yéem.

Tey kehlgal Ngà Hemtahu knuen bè yem Gunù Tilob yó. Wen se yem Kembong Nawa gel dmumu du, gel le sbalu Temgama ne Gulit. Kdê le hlò gotu hyu kenawa le ebè yem lomí wè le slob bélê le.

Ne tey móyô semfala tutul yem Ngà Hemtahu. Gel tolok Temgama du yó kem bok mò senfalahan, ne fen tulad kun tolok du Kembong Nawa. Yem tulad tehe kehnù le ke Musis te él gotu tonen, kehtom Samwél solok bè Gunù Dwata, ne tulad Timuti khungolen ke yéen tmolok du.

Ni sii tulad yem Ngà Tau Geta bélê tekuy, mon Gulit. Deng senfalahem yem tehe ksuten bè nim benwu tekuy, tau awam kem tuhahen. Ngem tengelem ksiwl yéen du, ne ni kem mentey ubiha mógów ebéléen ebè yem slung kudà, gunu le nù bè ksuten.

Tey óyô Ngà Hemtahu temngel du nim tulad ni, ngangen bud tolok Kembong Nawa du yem tulad hol kun nóyô, boluyen Semgalak. Wen yem ngà lemolo yem tey lan sikeb, huli du hógów Tau Geta, sòn moen tendo semgalak du.

Tengelem là kóen tglil, mon Kembong Nawa. Wen hógów Tau Geta, ke tglil yem ngà kendel snegefen.

Tey ketnga Ngà Hemtahu deng tódô kimel.
Sendaw Hulung Milô se kun mò nmò, ne mógów
ebè Ngà Hemtahu yem gu laan le là deng hemtom
solok ditu bè gunuhen semfala, ne dê kem tulónen du
lemwót bè yem Tau Geta.

Ni he hol tonu tahu kehligalu klawihu ngà, mon
Ngà Hemtahu. Ke là ni dum usolu nù bè tum Tau
Geta, bè ni ne dé gunuhu nù.

18

KWA NGÀ HEMTAHU KEM NGOMEN SFATAY

Tlu buteng Ngà Hemtahu nù bè yem Gunù
Tilob yó. Bè yem gewuhen buteng tolok Hulung
Milô du yem dfél gunuhen nù ngom sfatay. Tey
dfél lamang yem dfél gunu le gel hemnù yó kem kimu
sfatay. Kem klung lówó gotu tonen ne yó kem sudeng
mom smilà ne kem sudeng là buden sidek.

Mò gel nit sefewa kô ni kem ni? mon Ngà
Hemtahu.

Là, mon Gulit, kem ngà mило funen. Yó hol
kóyô Ngà Hemtahu kun, ke wen kun sudeng ne klung
aní baling sendalu bè tum Tau Geta.

Gotu tulón Gulit ke Ngà Hemtahu yó kem deng gendeng
yó kem sendalu. Yó aní nóyô Ngà Hemtahu yem tutul
Dabid hanà kegenen udi yem kwiten sfatay yem tey tau
bong ne yem deng khatayen du.

Yó se yem tau sotu hohon tum Tau Geta, mon Gulit. Wen tey oniten yem tau yó, là gfan tihen kól bè kuluhén. Okóm ke Dabid kun, són leseken nes tau mentey ógóf lelen laen dù suken, balù buyus se ke wen.

Mò kmò kesfatayen du? mon Ngà Hemtahu.

Tek són yem hasut nfét guma nù béleen. Botu ubaten du. Tódô hninggelen tódô blóng uyó yem tau bong yem botu ne tódô mugod, mtafi. Ke là tum Tau Geta tmóbóng du deng sana matay ne Dabid.

Yó se gunun mgel nawa Ngà Hemtahu abay se tngónen któbóngen ke Dabid tum Tau Geta. Tnóbóngen yem smalig béleen. Timbow deng tlu butengen bè yó, mon Ngà Hemtahu mò ke Temgama, Bang kewótu ne kô ni?

Là he, mon Temgama, tolo lemobun hlafus ni ne là deng tonem du gu ta tum Benwu Tilob. Omin Ngà Hemtahu na bud tungô suloy bè yó. Timbow deng bud hlafus bè yó, ominen temngel tembó beng ne deng gotu mkó ne yem lobun. Timbow deng kken le omin le mit du ete ketef yó kem tlu libun setwoll. Datal taken yem ketef aní hyu kógów le etahen yó kem tau ne gel le myón ditu taken.

Temngel subô Ngà Hemtahu ne tódô tonen tum bulul tilob wen kem huluhén ne wen koyu lemimbà hangahén hyu hgo lung laanen. Lelen mton tum éi mlet gu du etu lem sbong.

Étey, mon Ngà Hemtahu, tey tilob benwu tu de.

Igò, mon Gulit, tonok Ngà tum Tau Geta sem tu. Hlalak tu sem tonok tu lan ebè tum Tau Geta.

Boluy tu kem bululen, Bulul Hembeyen ne bè tu he
gunun gfan tum Benwu Tilob gunum esolu yó.

Mò kegenen du ominu gefet ditu? mon Ngà
Hemtahu.

Ngunte dé, mon Gulit. Yakà hanai ngà là
holi dô hlóng.

Ne tódô gungol le se udél Hulung Milô tmaba
kul. Monen, Géhel hewót tekuy ne, Ngà Hemtahu.
Balù kini kdaw ke deng gefet ditu lem sbong.

Móyóne ne, mon Ngà Hemtahu. Okóm kendel
mom tenbleng Kembong Nawa, monen, Là he Yê,
tolo wen nmò me béleen.

Tahu yó, mon Hulung Milô. Yem bè blóng le
Gunù Tilob tum benwu gunù Ngà Hemtahu esolu gel
wen hohon nù du. Balù hanà ngà he mógów sana kwiten
suk.

Tey kehyu nawa Ngà Hemtahu tngónen angat wen
kimu sfatay blay le du.

Móyóe dé tô mton kóm baling sendalu, mon Kembong
Nawa. Ne tô hendem Ngà Hemtahu ke tehe mung du Ngà
Bun.

Hol hen-gulamem ni kem ngomem ni, mon Hulung
Milô.

Gulit fen bemlay du klung ne sut Temgama oguhen
ke Ngà Hemtahu sudeng, tódô hlumaken du ne fen hesek
Kembong Nawa du tlumfaen.

Timbow deng gotu kesek Ngà Hemtahu kul botong
gelek Hulung Milô, lumun yem tehe gna nmoen béleen,
monen mò du, Tu hem Tau Geta hol tendo semgyok kóm bè
yem lanern mógów. Hol henletem sen kloloem du. Holi
hteneb.

Tey kehlígal Ngà Hemtahu botong là dogen gudél.
 Tódô hen-gimaken Hulung Milô, lumun tô kmoen du hol
 kun yê. Tódô tngón Hulung Milô mò kenawa yem ngà
 lumun tô hol kun ngà. Hol dóyónem tum Tau Geta yakà
 du bemlay du kóm kdê nì kem kimuhem nì.

19

GESLONG NGÀ HEMTAHU HOHON

Mdà bè yem bak tikeb Mingat yem khewà Ngà
 Hemtahu. Timbow kól béleen Ngà Hemtahu, mon



Mingat, Wen ngà lomi mius koni. Snólóku boluyen, monen, Teneb.

Tngónu se yó ngà yó, mon Ngà Hemtahu. Moni bélê me gunuen. Deng kegenen se koni? Angat gafitu kô?

Deng wen dô tógó kenmê ne deng kegenen mius. Deng dô kól ditu ne lem sbong mtu koni. Hyu nawa Ngà Hemtahu wen dumuhen ominen kendel heflóng lem wót aní gafiten Teneb. Okóm nan na nbal kem ween mung du elaan.

Tey hyu kdaw ni, mon Hulung Milô. Mô kmoen ke mung tekuy ke Ngà Hemtahu kól ditu lem sbong?

Yó dé hyu, mon Kembong Nawa. Déke gafit tekuy Teneb. Moen là na slob bélê tekuy bè ni du?

Dô koso mtu, mon Hulung Milô.

Tódô mdà te tubaw yem Henneged Sidek se yem Gunù Tilob yó. Boluy tum sbongen tlem Sbong Hemyak. Ne tey sidek keklosen yem nosolen. Hyu nawa Ngà Hemtahu Hulung Milô malak du yakà sôn moen tendo tô teguhung yem mosol.

Ilóu sem klima hemneged du mni, ne mahil wen hlayamem mosol du, mon Ngà Hemtahu.

Igò, mon Temgama, tey sidek. Gel wen tau mluy bè ni.

Là kóen dog legen deng le sana kól lem sbong. Omin Hulung Milô bernlay du ke Ngà Hemtahu yem sfunges ken deng eles nworten mô hebnotuhen du. Tey tendo kehlígal me klawihem nù bélê me, monen. Angat tulónu ke maem he yem monem ke deng slob bè Gunù Tilob.

Blat nawa Ngà Hemtahu yem deng bud kulék le Hulung Milô ne kem ngaen. Lelen mifut nawahen

deng naa sòn du. Tódô menek lem yem sbong yó
ne tódô kdà heflóng Ngà Hemtahu. Kóyóen ke
gafiten Teneb. Teneb hol tehe nù bè nawan okóm
deng mom tódô tonen yó dum tey tau sidek ton semlong
du. Tahà yem tau yó lelen kemgis mom sbukel
gu lem uyóhen.

Timbow malù moni tódô gtulón bè nawa Ngà Hemtahu,
angkat hensideken o kedeng. Bang kmou ni? Yó tô
gna hendemen tô hendem mlóy etu bè but bului aní ton
Hulung Milô ne déke nù bè tu bè bak tikeb Mingat aní
wen tau hógowen mò ne e tmóbóng du. Ne hendemen
laen dù kemlung kwangen. Laen dù muhen mit yem
klung ke là tódô snoluen yem hohonen. Ominen tódô
hgel nawahen smalig tum Tau Geta gunuhen esolu.
Ominen tódô hlós ngangen mógów efet moni ebéleen
Sidek Kmò.

Gunuhem gu lemwót ni de, udél Sidek Kmò
lgoen mdà bè solu Ngà Hemtahu. Són moen temngel
yem suk Ngà Hemtahu. Tey klikò Ngà Hemtahu okóm
tódô hgelen nawahen mon du, Lemwóte bè Benwu Angat
Meglà.

Gunum esolu ni du? mon Sidek Kmò.

Ebè benwu tum Tau Geta, mon Ngà Hemtahu.

Dô klifótem, mon Sidek Kmò, dou funen tum Benwu
Angat Meglà. Hnatayu uu kô? Moen ke tnagakem benwuhu?

Tngónu se du, mon Ngà Hemtahu, kóm funen tum
Benwu Angat Meglà. Okóm wen tau alí kembong nawa do
geta sentahem, mom hyu nawaw ke béleen gunuw nù.

Gemé Sidek Kmò, monen, Béi tlek hungelem. Budi
mung do mulék. Bong hyu kenawahu ebè tau ni dou ke
nimón le o. Bè gunuu se gunum nù aní balingí hesek
béleu.

Heseke bè tum Tau Geta dou, mon Ngà Hemtahu.

Kun dé yó du, mon Sidek Kmò. Tey dê hesek gel mlóy gu bè tum Tau Geta. Lelem tehe ghesek béleu he yem hanà knuerm bè Benwu Angat Meglà. Ke lumun o uu, hyu nawaw wen tau hmifót yem deng gmou ne wen bud mit do mulék.

Botong mkik Ngà Hemtahu. Ya botong kkeken okóm tódô monen, Tum Tau Geta gunuw hesek, géhé! hewótem o ne.

Okóm yó hol kóyô Sidek Kmò ke hol mung du mulék Ngà Hemtahu ominen mon du, Béi alí heslò dé, hol hendemem tey angat gfaem bè lan. Tey dê kem dumu fulisu tendo mentey edyó bè lan, ne ke ton le uu duhen hensidek le uu là kô nan e tnóbóng kóm tum Tau Geta, monen. Ngem sem yó tey tendo keheblatem nawahen mbut bè kewótem ditu. Yem tehe kegebengem lem hitok ne yem ktondo Hmahil kóm. Lelem lemana yem surat nwitem tehe kegtungóem bè yem gunù hgolung bè gunun sóól Henneged Sidek. Budi kól bè tu kem blek koyu dengi bud tô hendem mlóy mulék lanem likò kuí. Ne timbowi kól bè Gunù Tilob hol lumun tô kestulónem kestulón yem deng sana kemnalam. Lumun tô uu hol geta bè tu kem hesek tum Tau Geta. Mô tô kehtóbóngem du?

Tngón Ngà Hemtahu sal tahu ni kem ni ne hendemen tedu mô tehe ketngón Sidek Kmò du. Tahu se salau, mon Ngà Hemtahu, okóm hnifót tum Tau Geta abay se denge hegsel. Tngónen hanae ngà.


Ne là dog bud gafas Sidek Kmò du lebuten. Tey deng kegenen hemyu stulón ke Ngà Hemtahu okóm là mimónen. Yó gunun sidek kebuten. Htê Sidek Kmò,

monen, Bong mutó nawaw du Tau Geta tu ne kdê tau
mogot béleen bong mutó nawaw kul. Uu dou hesek.
Budi mung do mulék. Là kói gehlós. Hnatayu uu.

20

HOL TANAY KESFATAY NGÀ HEMTAHU

Là dog hol tô geklung Ngà Hemtahu yó kem
hanak dek Sidek Kmò du ne tey klikeen kô yó gunun
matay. Okóm tódô gtulón bè nawan yem tehe tutul
senfalahren bè Gunù Tilob. Yem le khatay Dabid
yem tey tau bong. Hendemen, monen, Laen dù kun
suk Dabid lumun ním do, lelen wen klungu he dou
deng blayen do tum Tau Geta. Snaligu dé ne bée abay
hlikò dé.



Omin Ngà Hemtahu hninggel mnak klungen ne gotu tódô gedfil taken yó kem tudà Sidek Kmò du. Ngangen temnú kebut Sidek Kmò ngangen tódô ngoten Ngà Hemtahu. Yó kem hanak là geklung Ngà Hemtahu du gotu tódô bè sigelen ne bè tihen ne tey sidek kegnómen ketduken lel tey litô ngangen efet kmifót Ngà Hemtahu. Timbow ton Sidek Kmò ni ominen munú yem ngà tódô lugoden talak tonok, ne hendemen gbeken ne hmatay du. Deng dilot Ngà Hemtahu gu lem lumaken sudengen okóm timbow lugod Sidek Kmò tódô bud mosok gu lem hólólen. Yem igoen masà bè tonok hendemen là buden glóy béleen tau lóbô ni. Hol tô bud Sidek Kmò se boyu du kendel ton Ngà Hemtahu se sudengen masà klohoken ominen kendel ma du ne tódô slong tbeken ke Sidek Kmò ne tódô bsék tey halí.

Ne timbow là gehbala Sidek Kmò du botong ketduk yem lan suk tum Tau Geta, tódô lemangat. Hol bud sulék Ngà Hemtahu se bud tembek du tódô mlóy Sidek Kmò mifal yem sbong yó. Ne sôn Ngà Hemtahu tagak bè yó. Ominen na hlilil likót bè yó henyun nawan ominen bud btik ne tonen yó kem hanak tódô hgasà gu te bnes tehe dek Sidek Kmò du. Tum Tau Geta deng tmóbóng do, mon nawan, ne tey kehyu nawan bè yem katuen.

Okóm tey dê halí Ngà Hemtahu ne tey sidek kegnómen du. Ominen na myón ne hegléd bè yem botu bong. Là holen bud mgel kegnómen du lelen miteg. Ngangen tódô gtungô bè yó ne wen knahen. Yó knahen, yéen sut béleen bè yó lem sbong. Tódô mnóng gu lem uyóhen hol lumun yem nóng

bulón. M'kay senta Hulung Milô bè ktiloben. Ogu Ngà Hemtahu du sigelen omin yéen mógów ebéleen myón bè yó ne sniwihe yem ngà. Ne gotu bnulungen yó kem halien yem igò Ngà Hemtahu hlilil, ofol ke Ngà Hemtahu ke deng yó hógów tum Tau Geta. Ominen bud heflilil ke Ngà Hemtahu te bnes ne ominen melek du. E Yê, e Yê, mon Ngà Hemtahu, ne tódô kendel mukat se ne laen dù yê tonen bè yó. Sana kehegléden bè yó bè botu tek sotuhen. Ominen myón ne tenngelen yó kem halien. Là bud le mitô ne là se bud le temduk. Dóe kemna, mon nawan, okóm moen ke deng le gotu mkó ní du kem haltu. Dô yê tum knahu tu koni. Gel mon le hloni béleu kun. Tum Tau Geta dô hógów du ne e tmóbóng do yem ktonen do likò ne yem deng tô keklifótu. Ne gtulón bè nawan yem tehe sfunges ken blay Hulung Milô du, ominen ma, ne bud myón kenen yem ken, sdô utónen.

Naw hol heflóng dé ní, mon nawan. Ngunte kem deng mayuk lan Sidek Kmò mlóy mtu eginu. Kô nan e bud hnebel se o. Igoen tehe mon du, tey dê fulis mentey edyó bè lan. Ominen tódô tendo mkem subeng sudengen ne sôn moen tendo temngel sfatà kilil yem lan, gu lem blóng yó kem botu yem igoen mógów.

KKÓL NGÀ HEMTAHU BÈ SBONG KMIFU

Deng móyón kímél ne kegku Ngà Hemtahu yem Sbond Hemyak. Laen bud tau tonen semnged ke Sidek Kmò. Hol tô tenesen lem lumaken se sudengen todô tonen yó kem lewu ngà mlóy gu bè yem angat gunuhen emlan. Mo le mom lemusek lumun yem ktonen kul le Likò ne Là Smalig. Gunu ye esolu de? mon Ngà Hemtahu.

Muléki. Muléki, mon yó kem lewu ngà.

Moen de? mon Ngà Hemtahu.

Bud mon he moen. Tô me mógów ebè tum benwu gunum emógów yó okóm là gehlós me. Ke tehe me bud mógów likót là kô me bud gesfulék ne e tmulón kóm.

Moen de, tedu deng ton ye? mon Ngà Hemtahu. Hendemen tedu kô angat bud gfaen yem kógówen lem kifu yó. Là kem bud hendemen du ke bud semfulék lemwót bè yem deng katuen lanen mit ke Sidek Kmò sfatay. Yó deng gunun alí smalig bè tum Tau Geta. Okóm olon tô móyô temngón yó dém gunu le mlóy yó kem ngà ne tedu yem deng ton le aní eles getgama.

Wen tey Sbond Kmifu ton me, mon yó kem ngà. Okóm là deng me kól du he.

Mò kmoen de? mon Ngà Hemtahu.

Tey sidek. Tu he hol lan sidek tanay ton me hlò kmifu. Maan kungol me du kik tau ne dolong le

gemnóm des. Dô le kem tau mîlo snéen. Deng le tabag lem tum kifu.

Mlan lemen kô lan ebè tum Tau Geta? mon Ngà Hemtahu.

Tu se, mon yó kem ngà.

Ke laen dù dumu lan, deng duhen yó se lan, mon Ngà Hemtahu. Tilówem ke móyói, mon le, okóm bélê me kum, mebel me tólóng lan edu tu dum Benwu Tilob. Omin le mîus ke Ngà Hemtahu ne fen hlós ke Ngà Hemtahu kun igoen tendo nù lem hólólen subeng sudengen.

Nù senlem yem Sbong Hemyak yem Sbong Kmifu. Sikeb yem sbong yó ne tódô tô ston datal kulu Ngà Hemtahu yó kem botu yem igoen husek. Lelen deng ne e kifu ne lemobun deng là buden mton ne Ngà Hemtahu. Balù hólólen sana là dog ktonen du ke gel bentolen sigelen igoen mlgóf yem lanen. Ne wen se tonen tendo semkyab lem yem lobun okóm là tngónen du ke silà ke ofi ne lel tey luk ta, yó samut gunun kenkel lem ungeden. Ke gel bud wen tonen semkyab maan ktonen yem tey ksidek yem lanen. Fi bè kwananen wen tey sol leyóng nù du ne tey hitok nù fi bè iwóngen. Tódô hen-ganagen mógów ne tek udí duen gunuhen là tgilil. Ni se gunun nù hol tahu hlayam Ngà Hemtahu nim kógówen kifu lem Sbong Kmifu. Balù yem tendo kehedemen tum Tau Geta ewenem là kóen mkó kliken. Bè sfu yem lan yó gunu le gel hatan tu kem fulis tum Datù Sidek. Ne wen tau temgafit du wen tey udél sidek boyongen du okóm là ton Ngà Hemtahu du. Mon nawan, Déke lenbuten o tum Tau Geta lemwót bè yem udél sidek lumun tô deng ou mon du.

Deng wen dô sóól buteng tódô gungol Ngà
 Hemtahu yem legdeg tau mayuk mógów lem yem kifu
 yem igoen mógów se kun. Tódô gungolen hetê tau lel
 hensag le. Mon nawan, Deng yó udél kem sendalu
 Datù Sidek. Dô le lengel yó gunun bud likò. Monen,
 Kô hnatay le o. Tô hendemen bud tô mlóy mulék abay
 se deng tódô setbol kkelen. Okóm deng tahà lanen
 lem yem kifu. Monen, Denge móyón kól bè sónen ne
 mni. Sawang dù ke bude tô mulék mom yó he gunuhu
 alí gembunù du ksideken ke bude tô mulék. Ne tódô
 bud gungolen yó kem sendalu Datù Sidek deng tólóng lan
 lolò le.

Hyu nawa Ngà Hemtahu wen ngà gungolen mudél monen
 yem nù bè sulat tum Tau Geta. Okóm là tonen du yem
 ngà mudél abay se kifu, monen, Kô Teneb, hyu ke gafitu.
 Omin Ngà Hemtahu tmaba. Gungol Teneb snéen okóm
 là dog bnalaen du abay se là tngónen du yem ngà
 tmaba yó. Okóm tngón Ngà Hemtahu nù bè yó yem
 ngà yó ne deng malù mtón ne klikoen.

GAFIT NGÀ HEMTAHU TENEB

Là kóen dog gehegnù Ngà Hemtahu yem kifu yó.
 Yó gunun là tungô abay se likò yó kem tau gungolen
 mudél lem kifu, kô mlán le gu bè yó lem botu. Ne
 ke ton le Ngà Hemtahu déke hnatay le duhen kô bud
 nwit le mulék ebè Benwu Angat Meglà. Tey klitegen

okóm tódô kem hgelen nawan mógów lem yem tey lobun lem kifu. Sôn moen tendo mni bè tum Tau Geta mò tmóbóng du. Bud gel gtulón bè nawan yem deng tehe nù bè yem Sulat, monen, Kem hógówen semgyok kóm. Ne bud gtulón bè nawan yem tulad tehe tolok Kembong Nawa du yem ngà mógów wen semgalak du, Kaem tahu tum tulad tu, mon nawan. Tum ngà mógów wen semgalak du. Wen snéen semgalak do kifu ni.

Tahu se yem mon Ngà Hemtahu. Wen hógów tum Tau Geta tendo temngel du lem tum tey kifu mgat. Balù là tonen kul okóm wen semgalak du. Deng sana wen gfaen ne tum tódô kígófen mógów lem kifu, ke là wen tendo semgalak du.

Ni deng nbuten mkó yem tey lobun ne deng nbuten mayag. Temngel eta Ngà Hemtahu tonen deng gfan longit. Igò yem tey léhé ne kem botu lembang gsuféng ditu ta. Hyu nawa Ngà Hemtahu deng tonen móyón mnóng kdaw. Hentawen yem deng klanen bè yem lan tey sidek yó.

Temngel tukô gna, tey dê holot tonen nù bè yem lan, nmò yó kem sendalu Datù Sidek. Yó gunu le gel golun yó kem ngà mógów, gel le bkó bè yó kem holot. Lelen tey dê sol nokol le. Mon Ngà Hemtahu, Ke kifu klanu gu bè ni gbeku là geblos ne denge tugô ne ni kmoen ni.

Wen tey kilib bong nù bè hol sôn yem Sbong Kmitfu. Wen lewu busaw lóbô tehe nù du. Ke gel wen kem ngà mius gel kenfô le ne gel tô hnatay le lu. Ni se sotu gunun wen knikò bè lan ebè tum Benwu Tilob. Okóm deng matay yem sotu ne deng tuha yem sotu ne là buden mgel, là se buden kemfô ngà.

Timbow mont Ngà Hemtahu bè yem kilib, tódô tonen yem busaw myón bè bak yem kilib. Malù wen tô klíkò Ngà Hemtahu okóm là se dogen kemdol yó dum busaw ne tódô hekteng Ngà Hemtahu. Nan e nmò hemnel ke Ngà Hemtahu yem busaw yó yem klusen. Ke tolo kemgis deng sana dluhen Ngà Hemtahu ne deng hensideken ne.

Wen ngà hennegeden yem deng kagkuhen yem Sbond Kmifu, tódô kda tô henlôy Ngà Hemtahu. Tikóng kól bè yem tey bulul tonen ktahà yem lan wen tau tonen mógów. Dô kbalu mógów etu bè Benwu Tilob. Bukay nesen lumun yem ke Ngà Hemtahu okóm laen dù sudengen. Kô Teneb, mon Ngà Hemtahu. Ominen tmaba, monen, Hatanem o aní slomong te. Omin Teneb temdéle du, ne bud tmaba Ngà Hemtahu, monen, Hatan o. Bnalà Teneb monen, Mógówe bè Benwu Tilob ne tey hohon huli do. Timbow ton Ngà Hemtahu yem là dog khatan Teneb du, ominen tódô mlóy ten-gafiten Teneb. Yem klóy Ngà Hemtahu deng mom bud nalawen gna Teneb, monen, Aní du se bud tles huli. Okóm mom klífóten hménég yem lan loloen, ne gtung bè botu tukô kyemeten ominen gefen. Omin Teneb bud mlóy huli du se kun ne e tmóbóng du.

TULÓN TENEB YEM KUN KÓGÓW

Tey hyu kegnóm le du yó kem lewu ngà yem keston le, abay se deng le tehe gel segbót yem hanà kegen le nù

bè Benwu Angat Meglà. Bong menek kenawan yem Teneb, ne bong hulung hedem. Tendo tahe gel tulónen ke Ngà Hemtahu yem gel tulón tu kem tau gel maury kul. Hyu nawaw gafitu u, mon Ngà Hemtahu. Bong hyu gemnóm du slomong, aní segduf te.


Tahehe tô segeng kóm dé, mon Teneb. Ke là dengt mom tódô gna, song tngónu dengt lem wót.

Kegenem nù dítu se bè Benwu Angat Meglà, yem deng kewótù? mon Ngà Hemtahu.

Wen dô tiu butengu, mon Teneb. Tey tendo kestulón le yem udél tum Tau Geta tu kem ngà, okóm ngunte kem tahu hentahu le.

Tedu se mon le mò ke Mahil Gmung? mon Ngà Hemtahu.

Igò se. Tngón le se yem gunun gu abay se tódô tfeng lówóhen hitok. Tey keskuli le du, lel le là móyô segbót du.



Hyu kem bê le knuli, mon Ngà Hemtahu. Là se mógów le kô kul du?

Là, mon Teneb. Hnowon le yem bud klóyen mulék. Geslongu yem sotu kdaw, tô snólóku uu béleen, okóm mom niusen o, hol lumun tô là tonen do.

Tey sidek kegnómu du, mon Ngà Hemtahu, ofol do ke tahu kógówen, okóm mom bud mulék. Tulónem do kun yó kem kóm gfà bè lan.

Là gebenge du tu dum hitok, mon Teneb, olon wen libun geslongu boluyen Ówów. Du se hesek tum Datù Sidek. Timbow tonen yem gunuw emlan, són moen tendo tô mgoy do. Tey klikou, kô nan e gwit o igoen tey libun tahà, lelen kemgis, okóm là dog hnungolu du yem monen. Timbow deng tmakas tô stulón do, olon mon du mò do, Nungeli, là hyu stulón kóm.

Bud gtulón bè nawa Ngà Hemtahu yem tehe ktondo Hmahil du, ne monen mò ke Teneb, Hyu sen là dog hnungolem du. Wen se kô bud dumu tonem?

Igò se, mon Teneb, yem deng kkólu bè Henneged Sidek, wen tuha logi tonu. Snólóken ním kógówu ebè tum Benwu Tilob. Monen mò do, Yake béleu dé gunuhem nù, aní gotu blayu kóm tu kem kimuhu ke denge matay, aní balingi kwasa. Tey tilob kestulónen, ne udi duen gunuhu là deng tô mung du.

Ngem se, kà nwiten kóm ebè tum Datù Sidek, mon Ngà Hemtahu.

Tahu se, mon Teneb, yó se nù bè nawaw. Yem kekbeu du, tey kebuten do, ne monen wen hektesen do mò hemsídek do. Hyu nawaw deng gtagaku.

Wen se kô hektesen kóm? mon Ngà Hemtahu.

Igò se, mon Teneb. Yem deng kiwesu yem gunù gel hegnù talak bilil, tódô gungolu yem legdeg huli do. Émonem yem sotu hesek tum Tau Geta, monen yó hendufen nan e tñafak o, yem khungolu udél tum tuha logi. Boluyen Tmedeng. Ofol do ke hnatayen o, yakà wen tuced niten. Okóm wen sotu tau bud sut, monen mò ke Tmedeng, Béem abay nfes. Là dilóu du yem tau yó, okóm yem deng kegnahen mnedeg, wen tonu lemekes te hólól tihen, émonem beng tu se yem tau tehe matay bélê tekuy.

Deng gungolu se yem Tmedeng, mon Ngà Hemtahu, okóm gel bnólów tum Ngà Tau Geta ke gedlug kehsideken ngà. Tonem se kô yem Gunù Tilob nù te bulul?

Igò se, ne yó kem blek koyu, mon Teneb. Tolo le tungô, ne tolo tahà kdaw, yó gunuw tódô hlós.

Mon Ngà Hemtahu, Tulónen do yem tau mantey bè bak tikeb yem ktonen kóm. Yake nam slob bè tum Gunù Tilob se kóm dé. Tey kem tau masa. Wen se kô geslongem lem sbong?

Són Là Gsengel Nawa tonu, ne tey kebnedu mungol du kestulónen, mon Teneb.

Tonem Sidek Kmò kô? mon Ngà Hemtahu.

Là, mon Teneb.

Segeslong me bè yó se lem sbong, mon Ngà Hemtahu. Tek udi gunun là deng hmatay do.

BTUTIN

Tódô henlêl le stulón yó kem ngà efet le kól
 bè yem gunun lamang lan. Ne temngel ete kwangen
 Teneb, tódô tonen yem sotu ngà mógów bè doli
 yem lan. Bong hyu lem baluhen ne mon nawa Teneb,
 Dô hyu dumu tau ni. Ominen smólók du monen,
 Mógówi ebè tum Benwu Tilob kô?

Mógówe etu se, mon yem ngà.

Yó, slomong kuy, mon Teneb, yakà senged gunu
 tekuy esolu.

Móyóa snéen dou, mon yem ngà yó. Ominen mógów
 ebélê le ne e stulón kul le Teneb. Bud tu snéen tendo
 tulónen tum Tau Geta. Hyu nawa Teneb, monen, Ni dé
 hyu ngà dumu, hyu kestulónen. Omin Teneb na hmatan
 ke Ngà Hemtahu huli ominen sboyong ke Ngà Hemtahu
 monen, Dô hyu kenawahen kô ngà ni?

Olo Ngà Hemtahu gemé monen, Là deng tngónem du
 kô, ngà yó?

Là, mon Teneb.

Deng tehe gel tonu yó ekni, mon Ngà Hemtahu. Btutin
 boluyen. Olon gel tô hningun lemólò tum Tau Geta, ni du
 tenngahu moen ke gefet edini.

Dô hyu kenawahen du kô? mon Teneb.

Ngunte dé, mon Ngà Hemtahu, tenngel te se he
 kedeng.

Omin Teneb bud temgafit ke Btutin. Là sii,
 mon nawa Teneb, là holen dô sidek ngà nii, na hol nubug

anỉ mung kut. Bong hyu kestulónen dé yem ngà yó okóm legen uđỉ tódô dỉlô Teneb béleen yem laen dog dô óyóen husek bè tum Benwu Tilob, abay sem olon gel tồ hningun ngà tum Tau Geta.

Tendo gel hnungol Teneb yem gel mon Btutin. Gel tulónen yem alỉ kehyu tum Tau Geta ne gel tulónen yó kem hlauhen. É, mon Teneb, bongi dô hulung lemolò hlau tum Tau Geta? Tódô hulô lem uyó Btutin abay se tngónen sòn gel nmoen yem kun knóyô nmò. Lenbuten Teneb monen, Moen ke yó uđélem ebéleu?

Mon Teneb, Ke lumun se yó dé alỉ kestulónem hol loloem sen yem monen.

Mò ketngónem du yem là klolou du? mon Btutin.

Là se, mon Teneb, okóm munu nawaw kóm déke là loloem du.

Tolohi uđỉ ngà he, mon Btutin, moen ke yó kudélem ebéleu? Igou twogu béleem.

Là hentedengu kóm dé, mon Teneb, okóm lumun tồ ktonu kóm là tahuhi ngà milo semnged kurn.

Tahu ngà milo? Igou tahu ngà milo. Tngónu yem gunuhem mon yem yó, abay se wen tulón Ngà Hemtahu kóm koni, yem klóyem ebéleen igoen huli. Tu se hentahuhem koni.

Là dogen gudél Teneb abay se tey sidek ktonen kebut Btutin, tódô hganag mógów là dogen bud mudél. Kun dé, mon Btutin, ke hlò sidek kehedem ye ebéleu, kuy salà sundu do. Là mahili mimón, ou dé bud tồ móyô stulón kóm, tódô henlelem kóm kógów. Là dogen bud milos mudél ebéleen Teneb, ominen tódô hegna du, ne bud hatanen Ngà Hemtahu.

Kun dé, mon Ngà Hemtahu. Hyu nawaw là mungen kut. Là kóen hyu nmoen belê te mtu.

BUD GESLONG LE MIT TULÓN HYU

Timbow le deng skó ke Btutin sut le bè yem
 tey gunun lamang datal. Laen dù koyu mteg du,
 tódô són bnes ukol. Hlalak yem datal yó, lan ebè
 tum Tau Geta. Hyu nawa Ngà Hemtahu wen dumuhen
 yem klanen gu bè yó. Ke tehe laen dumuhen ngunte
 kmò kifut nawahen. Deng móyón kimel yem deng kegku
 le yem dmatal lel le tey miteg. Sentu yem dmatal yó,
 wen ngà benwu udi ton le, okóm tey tilob. Tô hendeen
 yó kem ngà ke wen bang gunu le tungô. Kóyô le ke
 géhél wen bud gunu tum Tau Geta ton le, mò gunu le
 na bud hegnù. Ne tódô gungol Teneb yem legdeg
 huli kul. Ominen temngel ete kwangen ne tódô
 tonen yem tehe tau, deng tehe gel dumu le seknalam.
 Ominen na htengen mdà ne timbow díloen yem tau
 ominen tmaba ke Ngà Hemtahu, monen, E Wè,
 E Ngà Hemtahu. Tonem tau huli kut?

Omin Ngà Hemtahu beklil se kun ne timbow
 tonen, monen, Mit Tulón Hyu gi. Tey ktimu óyô
 le. Gotu tulón le ke Mit Tulón Hyu yem deng
 nmò le ne kdê yó kem deng ton le. Tey tendo
 kesegyoken kuy tum Tau Geta, mon Mit Tulón Hyu.
 Tey dê deng dumu ye sfohon ne tey dê gfa ye. Són
 moen tendo tmóbóng kuy. Ne là kô kóhen du któbóngen
 kuy ke hol snalig ye.

Tahu yó dum monem yó, mon Ngà Hemtahu.
 Olo Teneb tódô hemget mogot lem hólól Mit Tulón

Hyu kun, là dogen mudél abay se myak. Okóm tngón Mit Tulón Hyu kun ksalig Teneb snéen ne tódô senged klóbô le. Mon Ngà Hemtahu mò ke Mit Tulón Hyu, Hol bud tulónem kum kun kmò yem lan etu tuu kedeng.

Ni se gunuw semlong kuy, mon Mit Tulón Hyu, abay se ni deng ye móyón gefet bè bak tikeb tum benwu bong. Datù Sidek funen. Tey tilob benwu. Kdeen tilob gotu tonem lemen. Tey dê ngà gotu nù du abay se gel le tawan sindil bè tu kem kdê ton le. Là dog le gehlós edu tu dum gunu le tô emógów. Bê ye abay tlek hungel, tô hegeskét nù du, ni gunuw ne e semlong kuy.

Moen du ke tu lan? mon Teneb.

Tu se gunun deng hmò tum benwu tum Datù Sidek, kóyóen ke ket tau mógów ebè tum Tau Geta, sal là gehlósén. Ne ke là na le mlan bè tu lemen là kô le gehlós.

Bang tô kmò me du? mon Teneb.

Tódô ye hganag ke mógów ye. Bê ye abay tenngel tu kem nù lem tindà ne bê ye móyô ke ngali le yu tu kem tey dê ngà. Wen se kdawen gel tô hyu kenawa le okóm wen kdawen alí sidek kmò le tau.

Kà dô hnatay le kum du? mon Ngà Hemtahu.

Là tngón te du, wen se gel knukub le, mon Mit Tulón Hyu, ne wen se gel hnatay le ke hendaheum tum Datù Sidek ogot le. Okóm bê ye abay hlikò. Ke matay ye bè tu, wen hógów tum Tau Geta mò mit kuy etu bè Benwu Tilob. Laen dù bud gfa ye ne laen dù bud des ye ditu.

Deng sdef kdaw ne ktagak Mit Tulón Hyu yó kem lewu ngà. Ne hol móyónen se sdef kdaw tódô

ton le beng hilo! yem benwu bong yó. Liko! kô kóm?
mon Ngà Hemtahu.

Geblà snéen, mon Teneb. Tu hem Tau Geta tmóbóng
kut lelen wen tey kóm kimu sfatay yóó.

Yake dengi tehe slob bè Gunù Tilob se kóm dé
an! wen kóm kimu sfatay.

Kun dé, mon Teneb, tódóe hol hlóni béleem he.
Ke wen hmatay do mom hyu ne an! laen dù bud
hohon.

Omin le sogot lem hólól Ngà Hemtahu ne hendem
Ngà Hemtahu tum Tau Geta ne tô hgelen nawan. Timbow
le husek bè yem bak tikeb tódô bud gtikeb huli kul.
Ominen sbayong ke Teneb, monen, Hyu kem tehe mung
kut Mit Tulón Hyu.

Myó se, mon Teneb, yakem tehe mon te mò du
an! du mit kut gu lem nim tey benwu bong nif.

HEMBEYEN

Bong knutó nawa tum Datù Sidek tum Tau Geta.
Yó gunun al! gel lembut ke wen tonen lemwót gu bè
yem kun benwu mógów etu bè kun benwu tum Tau
Geta. Boluy nim benwu bong nmoen ni, Hembeyen.
Tódô nù sentu yem Sbond Kmifu ne yem data! laen
dù koyuhen. Yó gunuhen hemdà du bè yó abay se ke
deng le miteg yó kem ngà mógów gu lem yem Sbond
Kmifu an! gtungô le bè yó. Tey dê tilob ton gotu huen

lem yem benwu bong yó mò gunu le gel gtundug yó kem ngà. Tey lamang lan lemen ne tey dê gunù tilob. Tódô sebliwes tau mógów. Sal le mnes tilob ne sòn hendem le kul knù. Ne tey dê tendo blayen kul tum Datù Sidek mò kenbeyen nawa le, aní là buden gtulón bè nawa le tum Tau Geta.

Ke deng malù legen udi knù le bè yem benwu yó ngangen ne klifót le tum Tau Geta. Ke gel wen ton le ngà mlan bè yó mógów etu bè Benwu Tilob sal gel tróbóng le tu kem hesek tum Datù Sidek kemfô kul. Gel hnugus le lu aní là gehlós le.

Deng kifu ne yem kkól le bè yem benwu bong yó ne tódô le hlun na tungô bè yó bè gunun golung klokok beng efet hlafus. Timbow sut kdaw deng haya omin le yó bud lemwót hlalak lem yem benwu bong yó. Ofol kul ke kendel le gefet bè balà yem bak tikeb yó gu laanen là deng hnok tau yem lan.

Okóm yem kun sudeng Ngà Hemtahu ne yem nes buhay kun leseke Teneb là mkélen bè kul nes yó kem ngà nù lem benwu yó. Hanà là dengen mayuk lan le deng sana dilô le lu yó kem ngà lindan gu bè yó. Omin le tmaba, mon le, Wen lewu ngà nù bè ni, ktes tekuy lu. Maan kungol le Teneb du legdeg yó kem ngà huli kul okóm là dog le binguy ebélê le. Bê te abay temngel ebélê le aní là mudél le ebélê te, mon Ngà Hemtahu.

Okóm timbow le gmafit yó kem ngà kemtes gotu tódô snibut le yó kem lewu ngà ne là dog nmò le lan le. Tulón ye kum gunu ye gu lemwót, mon yem sotu bélê le.


Mau du bemlay du kuy tey tilob sudeng yóó ne yem tey nes buhay tilob? mon sotu.

Mò ye là temngel kul tu kem tey dê tilob ton? mon kem dumu. Là knuunen yó du kem ngà lumun yu yóó yem klung ne sudeng. Hebli ye lu, ma ye kuy kem tey tilob ton bè ní.

Là dogen gudél Ngà Hemtahu abay se gotu le tódô segeng mudél yó kem ngà. Okóm tódô hlóbô mudél Teneb, monen, Là mýô me kul yó kem kuy hbalù yó. Mógów me ebè Benwu Tilob kum.

Mo le mom kmuli yó kem ngà ne sotu tódô kemtos ke Teneb. Deng sana masà ke là tehehen mogot bè sigel Ngà Hemtahu.

Ngangen dê ngà lembang tóbóng ne wen kem tau slob ne e hménég kul. Ne sotu fulis Datù Sidek mius ne tonen yem mnóng bè kfu Ngà Hemtahu tódô tngónen deng le ngà milo. Omínen tódô hutel lem blóng yó kem tau ne sket nogoten lu bè ímak le. Mò ye ní? monen. Là mýô Datù ke wen tau sfatay bè ní bè lan. Là tngón ye du kmandel bè ní.



Là kô me sfatay kum, mon Ngà Hemtahu. Ganag kum kógów bè ni koni.

Kestulón lengel mata, mon yem tau yó. Yu buten nim alí hlala ni. Mung ye do.

Ngà me tum Tau Geta kum, mon Teneb. Là kô me ne e hmala. Olo me tódô tô mlan lem ni dém benwu ye.

Là ngónu du dou kun ngà Tau Geta, mon yem tau yó. Tódô dílóu kwen ungel ye. Ni naw na nwit yu ebè tum tau gel kmukum.

Ominen yó mít yó kem ngà ebè gunù tum tau gel kmukum, ne gotu le mung yó kem kwadag ngà lel kuli le, ne són mò le tendo semdekà kul.

27

ALÍ KEGLAYAM LE

Duón le kul kogot le bè tum Tau Geta. Yem tau gel kmukum bè yem benwu bong yó, sotu geta bè hesek tum Datù Sidek. Bud senced kutó nawan tum Tau Geta ne kdê ngà mógów ebéléen. Timbow nwit le ebéléen yó kem lewu ngà, tey kehyu nawan, monen, Na nmò hedlà kul. Ominen mon du, Tey nungel kem ngà mni. Ni naw hfes yu, ne na hkukub yu lem tum kukub tók. Aní gotu ton le yu ni kem kdê ngà aní ton le angat hedlà kul ke lolò le nim nmò ye ni.

Là kô le dog mudél ni kem lewu ngà. Mosok lewok Ngà Hemtahu yem kungolen tey sidek udél yem tau gel

kmukum. Hendemen, monen, Ngunte kà dô ton yê du
nim gfau ni. Tódô lemusek Teneb okóm bud sboyong
ke Ngà Hemtahu monen, Tehe mon Mit Tulón Hyu anien
ke hensidek le tu. Ke matay te tódô te hekteng mulék
ebè tum Benwu Tilob. Hol hendem te tum Tau Geta, du
he tmóbóng kut. Bê te abay mkik.


Omin Ngà Hemtahu hgel nawan se kun, ne bud
gtulón bè nawan, yem tehe tulad tau hyu kesegyoken
ubiha bè gunù Tmugod. Gehedemen yem tey litô bè
tihen. Du se ogot tekuy, yó hendem Ngà Hemtahu.
Ominen yó là bud hol likò. Monen, Igou hesek bè
tum Tau Geta, ne igoen mon du bè nim sulaten yem
kun hesek hol heskél bè tum kun Ngà. Balù yem tehe
tey halí gu te kwang yem Ngà yem Tau Geta tódô
kem hbala kun.

Tódô nù bè yem gunun sóól yem fedyan yem kukub
tók gunu le kmukub kul. Timbow deng kbogul le kul,
gotu tódô senbkes nféten lu yem tau tmafak kul.
Ominen hernù kul lem yem kukub tók ne tódô
tnagaken lu bè yó. Là kóen dog hyu kdà le bè
yem deng alí kehsidek le kul. Tódô le sifa sòn lu,
sentulón le yem hnuen kul tum Tau Geta. Tahu se,
mon Teneb, bong sidek kenawa le okóm tu hem
Tau Geta mentey kut ne là kóen gulé he yó kehsidek
le kut.

Timbow tngón yó kem tau yem kwen ngà
knukub, omin le gotu ne e temngel kul. Tey dê
ngà logi lel libun gotu ne e temngel kul ne gotu
sendekà le lu. Tey dê udél sidek mon le ebélê
le. Kóyô le aní tódô klifót le tum Tau Geta.
Tódô le hetnù yó kem lewu ngà, là dog bnalà
le kul yó kem mudél ebélê le.

Timbow deng legen bè yó ton yó kem ngà yem tódô kehetnú yó kem ngà knukub, gotu le baling bud myak. Mon le, Tódô bayà kuy lu bè ní. Igò le deng alí glayam, ngem ní dé botong kbala le là kô le dog mkik. Bê kuy bud khowon lu.

Okóm wen kem dumu ngà alí hegmon bè yó ne e temngel yem tey klusék le. Mom henlei le tendo mugak ebélê le. Tey tendo kkuli le kul, ngangen gotu le lembut yó kem dumu le lan le alí hebnes bè yó. Lemwót yó kem dumu ngà baling mom nofin le yó kem ngà knukub, ne sfatay le bè tu kem ngà alí kmuli kul. Lemwót yem tau gel kmukum, wen tau hógówen mò ne e semkó tu kem sfatay, ne bud hfesen le Ngà Hemtahu abay se monen, Lu buten yem sfatay. Omin le bud mit kul ebè tum kukub tók ne tódô le tungô bè yó igò yem deng tey keglayam le.



KEGSÓN KUN KÓGÓW TENEB

Timbow hlafus bè yó nwit le lu, Ngà Hemtahu lewu le Teneb, ebè fsinà yem tau gel kmukum. Wen tau hemsalà myón bè yó. Tendo hatanen ke wen tau mò knukub nwit le ebè yem tau gel kmukum. Deng tey tau tuha tódô sbukel gu lem uyóhen, lumun se yem tau gel kmukum, tendo knutó nawahen tum Tau Geta.

Ebéléen gunu le emit kul le Ngà Hemtahu, lewu le Teneb igò le tolo nfét. Ominen smólók yem gunu le gu lemwót ne yem gel nmò le. Ominen sut yem ngà boluyen mófô tendo semdekà kul le Ngà Hemtahu. Ne tódô kendel bnalaen yem tau kmuhl smólók kul, monen, Yem hanà knù le Ngà Hemtahu bè Benwu Angat Meglà, là kô le gel mimón ke wan udin yem Datù Sidek, igoen du fun yem benwu yó.

Ominen bud wen lewu ngà sut bè yó ne tódô hentahu le yem tulón Mófô. Mon yó kem lewu ngà yó. Là hyuhen ke hewà lu abay se déke hnayam le tu kem ngà bè Hembeyen. Abay se tehe ton le lu són mò le semkuli kdê kem kimu Datù Sidek. Són mò Ngà Hemtahu mon du kun, Kem kimu là knuun. Abay se bè kul kehedem gel mon le wen he benwu hyu senta yó.

Wen kem sfolò lewu tau myón bè yó bè
 fsinà. Yó kul gel nmò gel hnungol le tulón
 yó kem tau kenfô nwit ebè yó. Ne gel tnóbóng
 le yem Wis hemdeng ke wen sentulón, ne gel
 bemlay tafak bè yó kem kenfô. Boluy ni kem
 sfolò lewu ni, Hemdeng Knukum. Là se gel
 nadat le yó kem ngà mógów ebè Benwu Tilob
 snéen kul abay se gotu le mamo bè Datù
 Sidek.


Okóm gel hningun tô henyu le kmò le
 snéen, ne timbow snólók Teneb ke hyu
 kudélen ebélê le. Ne monen se yem Wis,
 Tódô hnata yu kmò kuy abay se deng sidek
 gmò ye, okóm ne me gna hnungol tulón ye
 he.

Mon nawa Ngà Hemtahu, Moen alí
 lóbô sumungen nim Teneb. Tódô musék
 Teneb okóm là se katen alí gedlug klikoen
 balù yem alí ksidek ktonen kehlóbô yó kem
 tau nù bè yó. Okóm timbow deng malù legen
 udí bè yó, tódô dilô Ngà Hemtahu wen tmóbóng
 du, abay se là buden likò mudél. Tngónen tum
 Tau Geta tmóbóng du ne bong nawan du snéen,
 ne là kóen móyô mimón kem dumu tau sentahen.

Timbow deng kudél Teneb, ominen beklil
 ebè yó kem sfolò lewu tau yem Wis, ne monen
 mò kul, Deng gungol ye tulón Mófô ne kem
 dumuhen bè ni kem lewu ngà ni, ne là se
 henkéng Teneb du. Là móyóen mogot bè
 Datù tekuy ne wen udin lem benwu tekuy ni. Ke
 ni kmoen tau tódô hnata yu kmò du.

Ne omin le gotu mudél yó kem sfolò lewu,
mon le, Deng ket mata gotu mton ksidek nmò
le kem ngà ní. Okóm ním Teneb alí gedlug
ksidek nmoen abay se là knikoen yem Datù
tekuy. Tódô hnatay tekuy kmò du, sòn Ngà
Hemtahu ne bud hulék elem kukub.

Tey sidek kegnóm Ngà Hemtahu du yem deng
kmoen yó, lelen là hol temngón yem mon yó
kem sfolò lewu. Ne timbow le husek yó kem
sendalu Datù Sidek ne nwit le Teneb hewà mon
nawan, Tedu tu dum gunu le emógów? Yem
deng kogolen bè yó bud nwit le snéen kun, etu
bè gunù fedyan, ne tódô bud tonen ditu Teneb
mdà lem blóng tu kem tau tendo mabid mfes du
lel le tmibó du.



Tey. Moem yó du, Teneb? Utóm langat Ngà Hemtahu okóm laen dù gungolen balà Teneb du. Mom hesngul ekta Teneb ne tódô mnóng lem uyóhen lumun yem knóng lem uyó Yê Ngà Hemtahu kehegfanen bè knahen.

Ne gbót lengalà eta snéen ke Ngà Hemtahu ebè yem gunun etemngel Teneb, ne tódô tonen kem hógów tum Tau Geta móyóng. Hatan le balu yem ngà hnatay le, nwit le eta bè kun benwu bè Benwu Tilob.

TNAGAK NGÀ HEMTAHU HEMBEYEN

Tngón Ngà Hemtahu kem hógów Tau Geta mit ke Teneb etu bè Tau Geta. Yem kehedemen nim ni là kóen bud gtulón bè nawahen yem kdaen lem blóng yó kem semibut du kem sendalu Datù Sidek. Tey hensag yó kem dumu ngà bè yó abay se beyen le mton yem ngà hensidek le. Botong kenkel Ngà Hemtahu, ominen bud temngel ebè yem dumuhen hnayam le bè yó, deng matay.

Okóm bong kkoduhen ke Ngà Hemtahu yem Tau Geta. Là dog hol hetngónen du du yem alí hlayam Teneb. Là holen hyu ketngelen ominen bud lemangat mkik, E Teneb. E Teneb. Ominen tódô stólóng kegnómen du. Ofól kun ke wen yéen hutel gu lem yem tey sbung ne e mkay du etu bè gunuhen laen dù sendaluhen ne laen dù hebnes du.

Yó tódô gunun na masà là buden hol mgel
 lem lówóhen ne là buden hol mgel mudél.
 Ominen mukat ne lem kukub yem deng gunuhen
 nù. Hlilil ne wen libun tonen kudung etahen.
 Tey tilob nesen yem libun yó lumun yó kem
 libun bè benwu yó. Balù yem tô kbasahen tey
 bong stólóng bè yê Ngà Hemtahu yem kun kuyó.
 Yó se yehen yem tau munung kukub. Tey sidek
 kegnómen du yem ktonen kwit le ke Ngà Hemtahu
 gu lem fedyan yó kem sendalu. Ominen ma é
 ne noloben halí Ngà Hemtahu ne noufen, ne
 nangaten efet kebtik Ngà Hemtahu.

Moem ni du ngà? mon yem libun yó. Hanai
 tolo udi he ne kendel htahaem lanem. Ni se
 hnuu uu bè ni ne ou ne semgyok kóm.

Tey kehyu nawahem ebéléu, mon Ngà Hemtahu
 okóm là móyóe nù bè ni. Mógówe ebè tum Tau
 Geta.

Na, mon yem libun yó. Deng tehe suléku
 se dou mógów ebè tum Tau Geta okóm alí sidek
 lan, bude mulék. Ne ni he gunuhen wen klígalu
 bè benwu ni.

Tu gunum mton tahu klígal bè tum benwu
 tum Tau Geta, mon Ngà Hemtahu. Deng lem wót
 ke Teneb. Tonu kem hógów Tau Geta mit du.
 Yake géhél hewà le o bè ni naw na hol nmò
 yem mógów heflóng efet kkólu ditu.

Ominen mifu lem kulu yem ngà, yem libun
 yó. Deng matay Teneb, monen. Tey sidek
 kegnómu du yem ketngónu du, okóm là kô na le
 e hnatay kóm, kóm du.

Mom hyu nawaw ke tehe homong le o, mon
Ngà Hemtahu. Denge nù ditu ne ním kmoen ní.
Olo ním tendo nù bè ní ní. Ke hewà le o tódô
naw na bud nógów.

Là kóen legen kkukub le kóm, mon yem libun
yó. Nui béléu ne henyuhu he kmou ebéleem.

Okóm mom hising Ngà Hemtahu. Là kóe
gnù bè ní, monen. Henlósu ní dou kógów.

Timbow deng hilu butengen bè yó ominen
mógów ebéleen yem tau munung kukub nan e
tulón du udél yem tau gel kmukum monen, Hewà
mò ke Ngà Hemtahu. Tahu se hewà le Ngà
Hemtahu, ominen bud hemlós yem kógówen. Tey
kegmung nawan ke Ngà Hemtahu yem libun yó,
yem ktonen du lemwót olon melek du ne monen,
Béem gel klifót o sen.

Tulónu tu hem Tau Geta yem alí kehyu
nawahem ebéleu, mon Ngà Hemtahu. Là tngón
te du déke angati bud gógów etu se kóm. Angat
nilou uu he ke suti ditu.

Ominen hganag lemwót igoen là deng hol
kemgis, lelen likò kô ton yó kem ngà tehe alí
semdekà du. Kô bud ktes le. Okóm deng hyu
nawa le anien ke tek són Teneb hnatay le. Balù
yem alí keskuli le du, yem kton le du mius là
dog kem bud benleng le du.

Hol deng nbuten se mius yem bak tikeb
tódô gungolen yem mlóy huli du, ne tódô gnómen
se yem mogot te abalen. Tey bud ktkoen abay
se ofol kun kô bud wen gfaen. Okóm yem ngà
mlóy huli du yó, mom bud ketut se kun ominen
sboyong du monen, Munge kóm. Là móyóe nù bè
ní dou.

Mógówi ebè tum benwu tu kô kóm? mon Ngà Hemtahu.

Mógówe, mon yem ngà yó, boluyen Hemdón. Munge kóm, monen, okóm na te kól bè tu he i kedeng aní naw na gotu tulón kóm kdeen.

30

MÉLÉK

Tódô heflóng Ngà Hemtahu ngangen gafit Hemdón, okóm là tagad le stulón abay se tolo le likò. Omin le na hlayuk lan le lemwót gu bè yem benwu bong yó.

Ominen mon du, Tey sidek gemnóm du deng matay Teneb. Tey klóboen okóm hyu kun. Ne tey dê he dumu ngà bè tum benwu tu mon du, angat mdó bè yem benwu yó ke senflósen tu tendo kmò le. Miuse bè tum kukub se yem kehewaem ne són mou temngel kóm, ne timbow laen dù temngel do ominu mlóy huli kóm. Mýói kô ke munge kóm?

Na, tô smólók du du gl. Là kô kenbéu kóm ke tahu bong nawam tum Tau Geta, mon Ngà Hemtahu. Ofol do ke tek sotuhunim mógów ne bong hyu nawaw se ke tahuhi se mung do.

Munge kóm, mon Hemdón. Laen dù kligalu bè tum benwu tu ne són mou tendo tô mlóy.

Hanà tô nbut Ngà Hemtahu se smólók yem mò deng kegen Hemdón nù bè Hembeyen, yem kgafit

le yem ngà sòn moen tendo bliwel bè yem doli lan. Là mayuken bè Hembeyen gunuhen lemwót. Boluy le krù le tu kem tau nù du hesek tum Tau Geta, okóm là tahuhen ne là se kenbong nawa le du. Ke gel mógów ebélê le Datù Sidek duhen kem fulisen, tódô gel klifót le kestulón le tum Tau Geta ne lumun ke du hol amo le. Tey bong nawa Datù Sidek kul yó kem tau yó, ne ke wen bélê le baling hemtahu bè Tau Geta là kô tafa nawahen kul, abay se tngónen bud le gel semfulék ke alí mgel kegnóm le du ne ke wen gfa le bè lan.

Mélék, boluyen yem ngà logi yó ne e tô mung kul le Ngà Hemtahu okóm tek likóten. Sòn moen tmulón kul yó kem hlò tau kwasa bè gunun lemwót, ne sòn moen dmóyón yem kun ktau. Ne malù wen tô kehwoyen kul le Ngà Hemtahu lewu le Hermdón.

Tey tilob kdaw ni de, mon Hermdón, abay se tey mnóng kdaw yem kógów le yó.

Tahu se, mon Mélék. Tey hyu kdaw kilo.

Okóm kul kógów kem ngà bè benwu me là gel le lemwót ke tolo alí sidek kdaw. Sal gel nélék me yem kdaw alí mnóng ke gel me lemwót mógów. Gunu nungel yem mógów lelem gasan kulón ne lelem gemfà lenos.

Anien he ke bulónen mnóng kdaw sana gel kwen lenos, mon Ngà Hemtahu.

Ke kmulón do, mon Mélék, mabele gunuhu hgo lung. Bude lemwót he ke deng bud mkó.

Malù wen tô kegemé Ngà Hemtahu ominen mon du, Yem ngà deng hol tahu nawan mógów là kô nmoen du yó. Yake bê tekuy hendem kmò kdaw.

Tahu se du, mon Mélék, sok kóm kóyô. Béem tô bnólów kun kmò sotu tau. Ke lemnos tódôl mógów lemen kóm ke mójót, okóm naw na hgolung do bude lemwót he, ke deng bud mkó.

Deng wen tehe senfala Ngà Hemtahu bè boken monen, Là hyuhen ke mung kóm yem là hol tahu kun hesek du tum Tau Geta. Omin Ngà Hemtahu mon du, Likoe du dou yem kestulónem yóó. Dô là hyu kesdumu tekuy mnt. Tódô me hekteng kum anien ke kmulón duhen mnóng kdaw.

Bong hyu, mon Mélék. Tódô ye hlós kuy. Mom hyu nawaw yem là deng ktonu kuy. Là kóe ne e mójô kuy ke tô ye mung do.

Olom gemkodu du, mon Ngà Hemtahu yem igò le mógów lewu le Hemdón, okóm là sem wen hol kmò te du. Ke slomong te se du ne ke wen kulón déke nwiten tu mulék.

Laen hol kehligen tum Mélék ne bong hyu nawan se yem kgafit le du okóm là se gkóhen du yó dum kun kóyô. Là se holen mdengen ke tô bong nawan tum Tau Geta. Olon tódô kmolut elem snlngen ne són moen tendo hlala yem ktagak le du. Balù yem kehedemen bud tô mlóy huli kul ne tô hendem monen mò kul, Kunen dé ke sidek, tódôe mung kuy.

Okóm bud mon nawan, A, kun dé, bak muhu mung kul kem ngà nungel. Ominen tódô mungol yem tmaba huli du, ominen binguy ne tódô tonen tlu ngà gel dumun segbót bè gunù mnagí kmobil du, mon le, Hatanem mi.

Gunum etô solu yó du? mon le yem igò le mlóy ebéléen.

Laen hol nmou bè gunù, mon Mélék, yó gunuw
tô dmalang milo.

Mung me kóm, mon le. Mau kul yó kem mógów
tukô gna kóm? Ton me u stulón kul.

Ngà le milo snéen kul, mon Mélék, okóm là
skél le bélê tekuy. Hesek le bè tum Tau Geta.
Monu mò kul hatane gel mógów he do ke hol hyu
kdaw. Yó gunu le mon du tódô sotum ne kóm.
Là mójóe dou mógów gu lem yem lan sidek ke
lelen kmulón ne lemnos. Mom hyu nawam na
hkó du.

Tahu se, mon yó kem ngà yó. Ke heseki bè
tum Tau Geta ne ke là nimónem du yem kul mon
laen dù bang hol bud kmò le kóm. Okóm tedu
se gutahem du tódô bayà tekuy lu ne tódô sónen se
tekuy nù bè ni.

NGOY NE YEM BLÓWÓN NÙ LEM TONOK

Slomong bè yó kem dumuhen Mélék, són mò
le mudél lel le kmuli. Là deng le mayuk bélê le he
le Hemdón ne tódô le mlóy huli kul yó kem fat ngà,
ne tey dê tendo snólók le bélê le hlò sidek.

Hningun tô snólók le ke dô sidek yem kul gel nmò,
ne ke dô lenbut tum Tau Geta. Ne ofol kul ke là
mlosen malà kul Ngà Hemtahu aní hyu kboluy le

du likò. Okóm balù yem alí kyak Ngà Hemtahu là kóen likò tmulón kul yem hol ktahuen. Tey alí kbong nawan du tum Tau Geta ne là kô dog knikoen du balù nù nmò le béleen yó kem ngà móyô modoy.

Gotu tódô bnalaen bè ktahuen yem snólók le béleen, ngangen gotu le tódô myak ne là dog le bud gudél. Hyu nawa Ngà Hemtahu deng tnagak le lu yó kem ngà modoy kul omin le hlós lewu le Hemdón.

Ngang le mógów efet le kól bè yem ngà datal gunuhen alí tilob lan tódô mló. Ne wen ngà bulul udi ton le sentuhen, wen sol elemen yem bulul yó lumun tô bak kilib. Wen ngà mdà ta yem bulul yó ne timbow le mius le Ngà Hemtahu ominen tmaba kul monen, Mógów ye edini ta. Wen toloku kuy.

Boluyen de? mon Ngà Hemtahu.

Blówón nù lem tonok, mon yem ngà yó. Tey kimu mektes, ma ye kuy mò nwit ye.

Na te e hnénég dé, mon Hemdón. Okóm mom kteng Ngà Hemtahu Hemdón monen, Bê. Bê. Là hyu mógów edu mtu. Ominen tmaba ebè yem ngà yó boluyen Mgoy. Snólóken ke laen dù sidek bè yó.

Ne tngón Mgoy se wen sidek bè yó, okóm du se hesek Datù Sidek fun yem blówón nù lem yem tonok yó. Ne yó gunun nù bè yó mò gel tmundug yó kem ngà mógów. Gel monen mò kul wen tey tilob nù lemen. Ominen mon du, Laen sidek du ke holi temgama.

Okóm mom lemwót Ngà Hemtahu monen mò ke Hemdón, Bê te mógów etu. Deng gel gungolu dou mtu. Là kô te gógów edu ke là na te tebel kun lan tum Tau Geta.

Omin Mgoy tmaba, monen, Ka là mógów ye edini hatan ye o dyó aní munge kuy. Milohe snéen dou.

Dô là ngai milo kóm, mon Ngà Hemtahu. Béem tlek benleng ní kum kógów. Là ghatan me kóm.

Là se buden mudél Mgoy, ominen bud temngel kul le Mélek, deng le moni ebè yó mung du yó kem dumuhen. Omin Hemdón bud binguy hnénegen yem nmò le. Là kóen bong nawa le ke Tau Geta. Ne là se nuen bè nawa le yem Benwu Tilob gunu le hningun etô mógów. Ne timbow gungol le yem klmú nù lem tonok, tódô le kendel heflóng ebè bak yem kilib.

Tngón Mgoy se kun ke wen tau gel mógów ebè yó ne e mokol blówón, sal gel le matay duhen gel le lana ditu lemen, okóm mom monen laen dù sidek du. Ne gotu hentahu le yem monen, Mélek ne kem dumuhen.

Ton le Ngà Hemtahu lu husek elem yem kilib yó, ne són yó ne kton le kul. Deng alí tefed lan le elem yem tey kilib yó ne là bud ton le lan le mulék.

Timbow deng mayuk lan yó kem ngà yó, tódô htengen mdà Hemdón, monen, Boluyen mtuu? Omin Ngà Hemtahu temngel ebè yem gunuhen e temdok tódô tonen yem tey bukay mdà kilil lan. Timbow henlel le hloni edu là se dogen kemdol yem mdà yó. Ton le tau lennged binguy semfulék.

Dô ngà libun milo mni, mon Hemdón.

Ngunte dé, mon Ngà Hemtahu. Lumun tô tódô lenbù nmò le. Moen ní du ke hnù le bè ní bè kilil lan? Omin le lemibut du ne són mò le tendo hemklol du, ne omin Hemdón mton yem udél snulat

bè kilil yem yó, klokok uyó yem libun. Deng gotu móyón mkó. Nan ne hol hnénég omin Ngà Hemtahu semfala du monen:

BÉEM KLIFÓT YEHEH LAT

Tngónu ne, monen, wen tutulen se nim ni bè Gunù Tilob. Ominen tmulón du ke Hemdón yem tehe kehewà Tau Geta yem tau boluyen Lat mung du yehenen, ne lewu ngaen libun bè yem benwu hensideken, lanen alí sidek nmò tau nù du. Wen hógówen mò ne e lemwa kul ne monen mò kul yem kógówen yó, Bê ye temngel semfulék. Okóm mom temngel semfulék ke yehen Lat, ne tódô henmungen yem ketngelen semfulék là dog bud kegekdoen, ne tódô hlós mgel lówóhen ne tódô hlós mdà bè yó.

Tey gfa ni de, mon Hemdón. Ni dô gunu le hemnú du bè ni aní likò te.

Là hnikoen kut, okóm ní se gunuhen nù bè ní aní ten-gama te kmò te. Hyu nawaw abay se là mógów te ebè Mgoy yem ktabahen kut.

Senged se do, mon Hemdón, abay se là móyóe ke wen tafaken do tum Tau Geta.

SBONG MENEK

Là dog le hol geheflóng yó kem ngà yó abay se deng là buden hol mgel Ngà Hemtahu. Gunu te tungô ni du? mon Hemdón. Là kô gbekem du ke tô suloyem buteng mógow ne là se hyu tô ktungô te klokok lan.

Déke wen bud dumu gunù semnged bè Gunù Tilob, mon Ngà Hemtahu. Tey kehyu nawaw tehe keslobu du. Là kô nam e gbek tulón du botong alí kehyu nawa Hulung Milô ebéléu ne kem ngaen.

Snólók Hemdón bè Ngà Hemtahu mò kmoen ne gotu tulón Ngà Hemtahu du kdê yó kem tonen ne gungolen ditu. Ngangen efet sídek kliteg Ngà Hemtahu efet là dogen hol bud mgel kudélen, ne là holen bud hlóng balù yem tendo kesgalak Hemdón du. Tey hyu kenawahen yem Hemdón. Là kô nan e tódô bayà yem dumun són moen munu nawan yem ktonen deng tendo klusék Ngà Hemtahu.

Ke wen yó dum bang gunù te tungô ni dum kifu, mon nawa Hemdón. Són moen tendo tô temngel lem yem deng kesekleweten ke wen gunuhen minab solok mò gunu le tungô.

Okóm laen dù layag ofi tonen, ne ngangen efet kifu ne tódô le hganag yó kem ngà. Là se móyóen hlilil lem bnes Ngà Hemtahu, balù yem là bud kgelen ne sbol tô mon Hemdón mò du, Nunungu u he.

Ganag olun te, monen, Là kô klifóten kut he tum Tau Geta. Tngónen tey kliteg te ne benlayen tu he gunù te hegnù kedeng.

Ne deng nbut le mnóng ne kem blotik ne sut bulón nnóngen lan ebè tum Tau Geta. Yem igò Hemdón temngel tukô gna tódô tonen són moen tendo minut lamang yem lan. Ngangen efet tonen yem tey éi tilob.

Wen tey tilob benwu gunu te egsut, monen. Tenengelem dé, Ngà Hemtahu. Moni klokok lan tum éi tuu ne tódô hlós hlalak datal yem lan, wen labaten ne lelen tinof. Omin Ngà Hemtahu temngel, ne tonen yem éi, ne tonen angkat wen gunu le hegnù botong tô mton ksidek kegnómen du.

Ngangen efet le moni bè yem éi ne tahu se yem kun mon Hemdón. Moni bè yem éi lan ebè tum Tau Geta. Boluy yem éi, Éi Hlowil. Sai wen labat semdolol kililen. Tilob bnes bè yó ne wen koyu mdà bè yó mò gunu le gel hegnù laanen yó kem ngà milo ne laen dù bang knikò le du.

Tey kehyu nawa Ngà Hemtahu deng wen gunu le hegnù. Myón klokokan Hemdón són moen temngel yem nong bulón sminang te éi kun. Ominen mkem lem hólól Ngà Hemtahu, monen, Là kóen gógów ebè ni Datù Sidek.

Là, mon Ngà Hemtahu. Tódô le slasà yó kem ngà ne tey tilob ktungô le efet hlafus. Timbow sut kdaw wen sut bélê le lem wót bè tum Tau Geta.

Ni se Spong Menek, monen, na ye hlun nù bè ni efet bud kgel lem lówó Ngà Hemtahu. Tey dê ken ye bè ni abay se hlò le mungu ni kem koyu ni

dé ne minum ye bè ním éi mò hekgis kuy ne hlaan nawa ye.

Hitu buteng le hegnù bè yó, yó kem ngà yó. Tey tendo kehlígal le. Là dogen likò mtó sudengen Ngà Hemtahu tódô kem hlasaen ne hegléd bè yó kun, igò Hemdón tendo mulut yó kem bungu deng tódô btang gu ta. Ngangen efet hyu kegnóm Ngà Hemtahu du ne là buden lemusék ne kemgis ngangen monen, Bud te lemwót. Dô là buden mayuk ne duen Benwu Tilob, monen. Ne bong te hlóng ne deng tey kegen te hegnù ní. Hyu nawaw do ke géhéi te gefet ditu.

33

KETLAS LE

Tódô le hlafus yó kem ngà lemwót bè yó bè Sbong Menek. Sendaw le mógów. Timbow deng kimel bè yó omin le kól bè yem syat wen labat naut nù du. Labat Naut boluyen. Fi sentuhen wen tey tilob datal nù du. Lamang yem datal yó ne dê tmowok bè yó. Yem tey busaw bong lóbô funen boluyen Hebà Nawa. Du se yem alí tótól bè kdê sendalu Datù Sidek, ne yó gunun gmunù sentu yem labat naut, okóm là gfanen gu bè yem lan ebè Benwu Tilob. Gotu nù bè bok Ngà Hemtahu se kdê ní kem ní okóm klífóten temngel du yem kmoen yó.


Tey kliteg le yó kem ngà yó lelen alí des laan tí le, yakà alien sídek yem lan lem wót gu lem éi bè yem alí dè botu telem. Gotu hnai laan tí le. Tódô htengen mda Ngà Hemtahu yem ktonen yem labat naut, ne wen ngà lan mló lemoni du.

Omin Ngà Hemtahu mon du mò ka Hemdón, Yake na te lolò likót ním lan nii. Alí bnotu yem gna lan te. Tey temduk laan tihu dou.

Senged snéen dou, mon Hemdón, okóm dô hyu du kô?

Dô hyu mni, mon Ngà Hemtahu. Tenngelém hulé tum labat naut bud te hulé se he kedeng.

Là hoi dô hentahu Hemdón du kun yem klolò le yem lan yó, lewu nawahen du. Ofol kun mon nawa du, Ngà Hemtahu alí temngón du yem lan ebè Tau Geta. Ominen tódô lemolò ka Ngà Hemtahu. Tey hyu kegnóm le du yem kógów le abay se minog yem bnes ne wen ngà ton le gna kul monti bè yem labat.



Omin Ngà Hemtahu tmaba ebéleén, monen,
Gunun esmolu lan ni?

Ominen mon du yem ngà yó, Ebè Benwu
Tilob. Boluy yem ngà yó Gtundug.

Ihi kun, mon Ngà Hemtahu. Tahu dou mon.
Hyu nim lan ni. Tódô lolò te tum ngà tukô gna tuu aní
mahil ketngón te du ke wen knikò.

Là hol hentahu Hemdón du kun yem ngà yó.
Ngangen kifu ne lana lem mata le olung Gtundug, ne
mefet bè Hemdón klikoen. Omin le mungol yem
lemangat ne muni lesbeg. Omin Hemdón mogot bè
sigel Ngà Hemtahu tey sidek klikoen. Dalang se ke
Ngà Hemtahu tódô setbol kkelen.

Moem yó du? taba Ngà Hemtahu ke Gtundug
okóm là gungolen balaen du. Tek sòn gungol le lem
yem tey kifu yem tey dmolong lumun tô dolong gemnóm
des.

Sundu tahu lan du ni, mon Hemdón. Tey sidek
alí kkifuhen ni. Là dogen mudél Ngà Hemtahu.
Tngónen sundu yó lan yem deng kulé le yem labat
naut. Tey khuli selen bè yem gel kmonen du hyu yem
lan héngê yem lan tedeng.

Hol nbuten se tô mudél tódô demsù tey kulón
bong sen-geng silà ne leték. Tey kulón bong senbool
lenos. Yó he hol kegà le du yem hol tahu lenos.

Mkik Ngà Hemtahu, huli selen bè yem là hol
kehetngónen. Do salà nim ni, monen mò ke Hemdón.
Kodum ni de, là kól gmung ke là alí kendut nitu
kóm.

Móyoe lemólò du snéen dou, mon Hemdón.
Udelen là móyó raungol yem mon Ngà Hemtahu.
Béi mkik, monen. Dou salà snéen abay se là dog
bnólowu kóm.

Bud te mulék, mon Ngà Hemtahu. Bud ton te he lan te. Yem kmoen yó deng hlò dunuk bè yem labat naut. Là bud gifal le du abay se alí ngelem. Ne yó alí tnafa nawa le kô là bud ton le du lan ebè Tau Geta.

Tey legen yem kkulónen. Là bud gbek le Ngà Hemtahu du ne mebel lan le lem yem tey kifu. Omin le tódô nù bè yem klokok labat, nangat le kwasen aní géhél bud gehfu le yem kógów le. Okóm deng alí sidek klikò le ne klangag nawa le, ne timbow mwas tolo lel le tungô.

34

KENFÔ HEBÀ NAWA LU

Song mkó yem tey lenos deng móyón mwas. Ngangen efet sut kdaw, tey nóngen bè lan ebè Tau Geta. Bè yó gunu le tolo hlilil le Ngà Hemtahu laan labat. Là dog gnóm le du yem kiní kdaw ne là buden gtulón bè nawa le yem tehe alí bud kkoso le ebè yem tehe gunu le lemwót semyat. Ne deng le mom hlong tungô là trngón le du yem hlayam deng moni bélê le.

Ton Hebà Nawa alí ksidek yem lenos ominen mnaul elaan yem deng knóng kdaw. Ominen hlalak talak tnibahen nen e hnénég ke wen deng hensidek lenos bè yó kem huluhén. Ngangen mógów efet sut bè labat ne yem kuléken lanen bè yem gunu le tungô yó kem ngà.

Yem tehe nes bukay Hermdón deng gotu nusing
lelen któ yem knuen bè Hembeyen, okóm yem
sudeng Ngà Hemtahu maan sana ksilaen. Balù
yem deng kegeneben lem hitok yem ebuteng.
Ngangen glebed lem mata Hebà Nawa yem silaen
lem yem bnes. Ominen temngel du ne tonen yó
kem hlilil bè yó.

Kem ngà milo ebè Tau Geta, mon nawahen.
Ominen kmul, monen, Deng le nù lem tonoku.

Tódô gebtik blékê Ngà Hemtahu knahen yem
tey udél bong, ne tódô tonen se Hebà Nawa kudung
etahen. Tey tuha logi sidek ton yem Hebà Nawa
yó. Tódô tmuhung weken, tahà bngeten ne sòn
dowinen kulit uhu. Tódô lemangat Ngà Hemtahu
yem ktonen du ne botong gebtik Hermdón ne tey
kkelen se kun. Tedu nmò ye bè ni? mon yem
busaw yó.

Milo me ebè Tau Geta, mon Ngà Hemtahu,
igoen tódô setbol kkelen. Tlas me, monen.

Laen dù kuy kwalis tungô bè dou tonok,
mon yem busaw, lel le alí likò. bè yem tey
udél bongen. Naw na nwit yu ebè gunù, mon Hebà
Nawa.

Tey kunu nawa yó kem ngà tô le se hendem
mlóy okóm là kóen ne e legen kgutahen kul yem
busaw. Ominen mlo kul tukô gna du etu fatu
bè gunuen. Boluy yem gunuen yó, Gunù Hewu
Nawa. Ominen hemsù kul lem yem tey kukub
kmifu ne kendaduhén yem bak tikeben.

Sendaw ne bud suloy bè yó tendo gunu le
hlilil yó kem ngà gelen laen dog dù ken le,
olon se éi ke nù bélê le. Ne là se ston le lem

yem kifú. Omin Hemdón hganag kmadaw ne
gogoten Ngà Hemtahu lem yem tey kifú ne tódô
le hlós tendo sogot. Són mò le hemdón kógówen
ebélê le yem busaw. Ofól kul ke nen e hnatay
lu. Tey khuli sel Ngà Hemtahu abay se hendemen
du gunuhen mbut yem grà le yó. Ne knikoen kô
hnatayen lu yem busaw ne là dog le gehlós ebè
Benwu Tilob.

Wen yehenen yem busaw Hebà Nawa yó
boluyen Hemuda. Tulón Hebà Nawa du yó kem
lewú ngà kenfoen lem tonoken ne yem deng
kwiten kul elem kukuben. Tey kehyu nawa Hemuda
yem kungolen du. Hol kóyóen se kun ke nfes
Hebà Nawa lu. Timbow hlaful bè yó omin Hebà
Nawa ma yem tugeden nen e bnogul tu kem ngà
knukub.

Timbow deng kbogulen kul ominen bud tmebel
kul lem yem tey gunun kmifu, là dog le bud hol
gekdol bà mon yem tey alí kbolok lówó le. Bud
sendaw le nù bè yó. Là bud le gembek myón,
són mò le masà.

Timbow deng haya bè yó omin Hebà Nawa bud
mauy kul, ne tey ketngahen abay se là deng le
matay yó kem ngà tehe bnogulen. Monen mò
kul là kô gtagak le yem gunuen yó, okóm ke likò
le se lem nus tódô nínun le yem éi duti tebelen
bélê le. Omin Ngà Hemtahu hdana béleen aní
tô le gewà. Okóm mom bud temnú kebut Hebà
Nawa ominen bud hemtawid tô mogul kul, okóm
tódô henmungen se lenmek. Laen dù kgisen ne
ominen tódô tmebel kul bè yó. Ke alí mnóng kdaw
yem busaw yó sal mkó béleen yem gelen. Yó

gunu le bud gel gehewà ke wen kem ngà nwiten ebè yem kukuben.

Là bud hendem Ngà Hemtahu du kun ke bud gewà, ominen mon du, Mò te ni du, Hemdón? Ke henlós te nù bè ni tódô hyu nawa te minum nim duti aní tódô te matay. Là móyóe do hemgnóm bitil.

Bê te abay nmò yó, mon Hemdón. Ke tódô ten-gna te kut knù, là kô na le e nwit kut etu bè Benwu Tilob tu kem gel hógów tum Tau Geta. Són gel le mógów ke hógówen lu tum Tau Geta. Angat bud monol he kgisen tum busaw déke angat klifóten kmunsí tum bak tikeb ne tódô te ganag holo lemwót. Na te nangat déke wen lan angat toloken kut tum Tau Geta.


KUNSI SNALIG

Timbow deng kifu bè yó, omin Hebà Nawa bud mnaul elaan nen e hnénég ke deng le matay yó kem ngà. Okóm balù yem là bud kgel le, là kô le deng matay ne là se deng ninum le yem éi duti tebelen. béle le. Ni gunu Hebà Nawa alí bud lembut kul. Ominen hemnel kul ne yó gunu Ngà Hemtahu alí likò. Ominen tódô hlugod là buden temngón. Timbow bud btik bè yó deng là buden nù bè yó ne Hebà Nawa. Són Hemdón myón klohoken són moen tendo mkol lem hólól Ngà Hemtahu.

Mon Ngà Hemtahu, Tódô nnum te éi duti ni,
monen. Alí sidek hemgnóm du bè ni ni. Là bud
gbek te hembala du ne là kô te bud gewà bè ni.

Béem wóyó kestulónem, mon Hemdón. Ilóem
gotu klifótem yó kem tehe gna gfaem. Tódô
hendemen yem deng tey ktahà lanem ne yem deng
tey dê gfaem. Tehe là kól likò mit ke Sidek Kmò
sfatay. Ne tehe tey któbóng Tau Geta kóm yó
gunu Sidek Kmò là gemmò béleem. Dengi tehe
tódô mógów sotu mifal Sbong Kmifu, ne balù
bè Hembeyen là kô hfatayen kóm tum Tau Geta.
Hol te smalg béleen dé. Bê te tagad alí hunu
nawa te.

Tngón nim busaw lewu le yehenen, ke tódô
hnatay le knù le yó kem ngà là kô le gógów ebè



tum Benwu Tilob. Okóm ke Hebà Nawa hmatay kul, wen hógów tum Tau Geta mò ne e mangay kul. Timbow gungol yehen Hebà Nawa yem tolo là deng katay le, tey kebuten kul se kun. Ominen mon du mò ke yehenen, Tódô nwitem lu etu desenfól ke haya aní ton le tu kem tiol tau tehe gna matay bè ni. Aní likò le ne aní ninum le tum duti. Ne hendem Hebà Nawa ni dé hyu atul, ominen mit yó kem ngà deng haya bè yó etu desenfól bè gunun luduk tiol tau. Tey sidek ton ne tey hyu nawa Hebà Nawa yem alí klikò yó kem ngà.

Ni se hòl tiol ngà milo, mon yem busaw yó. Tiol kem ngà gel tonu lem tonoku ne gel nwitu lu ebè ni bè gunuu. Ominu hmatay kul. Móyón hnata yu snéen kuy ne angat gotu luduk bè ni snéen kuy tiol. Ominen bud mogul kul sulék ne tódô sendaw le bud masà bè yó lem kukub kmifu. Tey kik le, sòn mò le hemdeen tô kegewa le.

Stulón ke yehenen Hebà Nawa yem kifu yó, monen, Mò le alí mbala kem ngà tu?

Mon Hemuda, Ofol kul yó ke wen angat tmóbóng kul ne déke wen kunsí senning le mò kunsí le yem bak kukub ke là temngón te. Deng tey dê ne tau gewaem lumun yó.

Tahu se yem mon yehen Hebà Nawa yó, okóm mon Hebà Nawa, Ke wen se kunsí senning le deng sana kunsí le du ne yem deng kegen le bè yó. Haya he ketngelu du ke wen kunsí nwit le. Ominen mbut koo ktuken.

Wen ngà kunsí nù lem sning Ngà Hemtahu boluyen Kunsí Snalig. Tehe blay le du bè Gunù Tilob okóm là gtulónen bè nawan yem kwen

gfaen. Là kô le dog tungô se yó kem ngà yem kifu yó. Deng kestulón le omin le gel mni bè tum Tau Geta mò tmóbóng kul.

Hnungolen tu, mon Ngà Hemtahu. Baluen ke là ton te du. Dô gnómu angat te gewà bè ni.

Hnungol Tau Geta se taba yó kem ngà yó, ominen hógów yem sotu gel dóken mò tmulón kul yem mò kmò le du. Là ton le Ngà Hemtahu du, okóm tódô glebed lem hendem Ngà Hemtahu yem nmò le.

Tey klaen dog tngón dem o, mon Ngà Hemtahu. Tey kegen te deng nú bè ni. Igoen wen tehe kunsí blay Hulung Milô do. Kaem gbeken kdê kendadu nim kukub nim kunsí ni.

Omin Hemdón btik, monen, Tilów te dé. Tolo tey kifu ni là kóen kendel gebtik le Hebà Nawa.

Omin le migóf lem yem tey kifu. Ngang le migóf efet gogot le kendadu yem tikeb. Omin Ngà Hemtahu tmlów yem kunsí yó koni ne tódô lemka yem kendadu. Omin le hganag lemwót igoen kéng stóbóng mdek lem kfu le botong angay nawa le. Wen ngà layag bè yem lan hewà yó omin le yó mton lan le etu bè tehe gunun alí luduk tiol tau matay. Bud wen se kendadu bud knunsí Ngà Hemtahu bè yó, ngangen tek sotu ne duen bak tikeb. Tey nóng bulón yem kifu yó. Tódô tendo huli ke Ngà Hemtahu Hemdón.

Okóm nim hol sôn kendadu ni, tey kegen Ngà Hemtahu tô kmunsí du là kô dog gebeklilen yem kunsí. Omin le mungol legdeg Hebà Nawa mnaul elaan abay se wen gungolen yem kifu.

Ofol kul ni kem ngà ke deng gafiten lu ne deng
tey bud klikò le. Okóm timbow kól bè yem bak
tikeb Hebà Nawa, tódô glusen yem bogulen ne
tódô gluduk bè tonok se kun.

Hol hgelem dé, mon Hemdón. Mýón
gafiten tu kedeng.

Igò du, mon Ngà Hemtahu, abay sem nkê
fak nim kendadu.

Omin Hemdón mogot yem kunsí, Ni sit,
monen. Kemdol ne deng legen udí bè yó tódô
bkas yem kendadu.

Tolo lei Hebà Nawa masà bè yó, tódô kem
senkléwê yó kem ngà yem hansang yem tikeb,
omin le lemwót mlóy etu bè labat naut klohok
syat. Ngangen bud le sut bè tahu lan.

BULUL HENTAW

Tey, mon Ngà Hemtahu, yem deng bud kkól
le bè lan ebè Tau Geta, tey kehyu nawaw wen
tehe kunsí blay Hulung Milô do.

Myó se, mon Hemdón, ngunta mò kmò te ke
là wen myó.

Omin le na myón bè yó bè klil lan na le hegnù
bè yem alí klóy le. Là kô le likò hegnù bè yó
abay se là kóen ne e gógów ebè yó Hebà Nawa
ebè kun lan Tau Geta.

Kodu le yó kem dumu ngà angat bud sut
ke ne le e lolò yem lan yóó, mon Ngà Hemtahu.
Yake wen nmò te aní tngón le. Smulat te ta
tum botu hnù te klohok labat naut.

Tilów te sen, mon Hemdón, ke wen botu.

Omin le mebel botu ne ton le yem botu kufil
tódô mló. Omin le smulat taken. Mon yem sulat:

Ni lan ni sut ebè gunù Hegewu Nawa,
busaw Hebà Nawa funen. Hohon tum
Tau Geta ne sòn moen tô hmatay kem
ngà mlo.

Song sdef bulón, deng deng kehlàsà le bè bak
labat yem botu aní laen dù ngà tódô mius ke là
ton le du. Wen tóbóngen tau ni, mon Hemdón.
Hyu sen fen monem.

Ngangen mwas ne sut kdaw, tey kehyu nawa
le yó kem ngà mógów lem yem tey nóng kdaw
deng kegewà le lem yem tey kukub kmifu. Tey
hyu ton tu kem bulul tuu, mon Hemdón. Hulé
du lan ebè Tau Geta.

Hiò kem bulul tilob tu kem tu, mon Ngà
Hemtahu. Tehe tonu lu gu bè Gunù Tilob. Kem
tau mentey ubiha nù du, ne tey hyu kenawa le ebè
kem ngà. Angat dô henken le tu ni kedeng ne na
le hefegnù tu likót.

Ngangen efet le moni bè yó kem bulul yó
kem ngà, ne omin le mbut mneged. Là holen
bilil. Tólóng sem Henneged Sidek ne là holen
bnotu. Tey tilob yem lan yó. Wen kem koyu
mungu hulu le semdolol du tódô lemimbà ete
lan hanga le lei tey bungu le, ne wen se tey éi
tikaw tembul bè yó snéen. Omin le ma yem bungu

koyu yó kem ngà ne minum le bè yem éi, deng
gnóm le kbitil le, bà mon tey deng kegen le là
dog mken.

Là mayuken bè yó gunu le nù yó kem mentey
ubiha. Ne timbow ton le yó kem ngà, fat bélê
le ne e semlong kul.

Ni kô kem bulul Hentaw, mon Ngà Hemtahu.

Ni se, mon yó kem mentey ubiha. Boluy nim
benwu bè ni, Gun Munung tekuy Tau Geta. Ngà
Tau Geta funen ne gfan gu bè Benwu Tilob nim ni.
Ni kem ubiha sal kun ne mi fen semgyok kul.

Tolo mayuk he kô Benwu Tilob? mon Ngà
Hemtahu, ne hyu se kô lan?

Hyu bè yó kem tau tilob klolò le tum Tau Geta.
Okóm yó kem tau là holen mdengen klolò le du sal
wen gfa le.

Wen kô hyu gunù hegnù bè ni? mon Ngà Hemtahu.
Bong me miteg.

Igò, mon yó kem semgyok ubiha, gotu hmoen
kum tum Tau Geta aní wen gunu le hegnù yó kem
tauhen. Mung ye kum ebè slung me ne mi he semgyok
kuy.

Boluy yó kem mentey ubiha yó, Temngón,
Kemnalām, Mingat ne Megtolok. Omin le mit yó
kem ngà ebè slung le ne mit le bélê le éi mò olob
le ne tey kehken le kul. Timbow ton le yem tey
kliteg le, omin Mingat hemtifēs gunu le tungô.
Tey kegtungô le yem kifu ominen yó hyu kegnóm le
du deng haya. Maan nawa le ne deng bud mgel lem
lówó le.

HAGANG HEGSALÀ NE BULUL GUNÙ TEMGAMA

Timbow deng hayahen bè yó, bud le htifes lemwót yó kem ngà. Ne mógów le ebélê le yó kem mentey ubiha, snólók le bélé le ke mýô le na bliwel te yem bulul gu laan le là deng lemwót.

Tahu se, mýô yó kem ngà. Omin le mit kul yó kem mentey ubiha, hnllol le yem bulul.

Là kóen hyu, mon Temngón, ke wen tau mógów sotu gu taken bulul ní, okóm gel hmoen kum tum Tau Geta mit bliwel yó kem ngà milo aní ton le ta Benwu Tilob.

Omin le sut bè yem gunun alí kbu, là mahil mlan du. Smufaw etu bè yem tey hagang bong. Timbow le deng kól ditu te tfusuen, tek le mogot bè sigel yó kem mentey ubiha le Ngà Hemtahu lewu le Hemdón. Myón bè tubaw yem kbu yem hagang yó, ne timbow le kmotu etlem yó kem ngà, ton le tum tey sbong tlem, ne tey dê tau deng matay masà ditu tlem sbong.

Btang le gu bè ní kô ta? mon Hemdón.

Gu bè ní se gunu le gu btang, mon yó kem mentey ubiha. Ní se yem Hagang Hagsalà, ne yó kem tau masà yó, tau milo gemtagak yem lan Tau Geta. Gel le bliwel gu bè ní te bulul, ne gel le mógów eta nim botu. Ofol kul ke ní hyu gunu hatu temngel. Okóm ke gel tenngel le tum sbong tlem, hlós lengel mata le, ne tódô hlós lan le btang.

Ne omin le bud mit yó kem ngà ebè yem
bulul boluyen Gunù Temgama. Wen tey datal
ton le gu ditu ta, ne wen kem tau ton le tendo
bliwel du, lel kem libun ne kem ngà. Okóm tólong
mò kógów le. Mógów le knamang, ne ton Ngà
Hemtahu sòn mò le tendo gdouf gu ta tu kem botu.

Butô le kô? monen.

Butô le se, mon Kemnalam.

Ton ye kô yem labat naut fi bè iwóng, moni
bè ni kem bulul ní? mon Mingat.

Igò se, mon Ngà Hemtahu.

Mon Mingat, Sentu tum labat tu, lan ebè
gunù yem busaw boluyen Hebà Nawa. Tey dê tau
milo lemòlò du, abay se alí bnotu yem lan ebè
Tau Geta moni bè tu bè syat. Ne lolò le yem lan



ebè Hebà Nawa abay se alí tilob ne mló. Ke
deng là bud ton le lan le yó kem tau yó, gel kenfô
Hebà Nawa lu, ne nwiten lu ebè gunuen. Ke là
hnatayen kul, olon lemsit mata le, ominen mit
kul ebè tum datal tu, tu gunu le tódô mógów
kmamang efet le matay.

Són mò le setngel le Ngà Hemtahu, là dog
le mudél. Ke là tehe le gewót bè gunù Hebà
Nawa, ne ke là wen yem ngà kunsí, deng nwiten
lu ebè tu snéen.

Omin le mosol yó kem mentey ubiha, deng mayuk
ebè lan le. Omin le sut bè yem gunun ssufit botu, bud
gunu Ngà Hemtahu hemtulón nawa yem lan bè Sbond
Kmifu. Tèy botu bong getléwéng ta yem lan, ne là
holen mdengen kton le du yó kem ngà abay se lemobun.

Ni se sotu gunun alí sidek, mon Temngón, ne wen
se deng ngà lana bè ni ke tek sotuhen mógów. Ním
lan kmifu ní, sut ebè benwu Datù Sidek. Kdê deng
gemolò du, là kô le bud gulék.

Kdê ní kem ní gotu gunu le lemwót hedem yó
kem ngà, ne mon Ngà Hemtahu kogolen bè yó,
Hyu nawaw abay se ton me ní kem ní, balù líkoe
kul. Ní hol lemwót gunu me hol temgama bè
klolo me lan tum Tau Geta.

LAEN TNGÓN

Yó hol són gunu le emit yó kem ngà yó kem mentey ubiha eta yem bulul boluyen Bulul Mtataw. Yó gunun gfan yem tey lan tahà. Ne wen tey mnóng ton le okóm mayuk botong le sngel, lan le alí tò hemunu du.

Bè tum gunun sóol tum mnóng, mon yem sotu mentey ubiha, gunun nù Benwu Tilob. Ke là mahil ye sngel ton ye bak tikeben.

Okóm tey mtataw yem solok botong keng nong kdaw ne kdê kluunen là kô gbek tulón tau du. Són tum mnóng do ton, mon Ngà Hemtahu. Alí mgel béleem temngel du, mon Megtolok. Wen ma olung me boluyen Kehtahu gunun alí mtataw ke tengelem lemen.

Omin Ngà Hemtahu ma yem ma olung okóm deng mom kenkel lanen alí gedlug kehedemen yem benwu Tau Geta. Deng mom là holen menek kogoten yem ma olung tódô setbol kkelen. Omin Hemdón tmlów du se kun okóm mom tomung lewoken. Hesngelen o, monen, okóm wen tonu lumun tò bak tikeb.

Tódô koyung le yem hlafus yó bniwel le ta yem bulul, omin le bud mulék ebè slung ne na le bud hefegnù lu.

Ke deng nbuten mayuk udî lan ye kedeng, mon
Kemnalām, ton ye yem ngà boluyen Smukat.
Angat niten yu semyat okóm bê ye nimón ke wen
monen.

Ne angkat ye sut bè Tonok Hgulof tau snéen,
mon Mingat, gunun gel moo ktuk tau mógów. Doli
tonok Datù Sidek, ne ke ton le yu tungô bè yó tu
kem fulisen tódô nówóng le yu.

Benlay me yu hton lan, mon Temngón, igoen
mogu ke Ngà Hemtahu yem klatas. Kdê yem angkat
lan ye sal wen tandaen lem nim klatas, ne ke hol
hninggel ye temngel du là kô ye tlas.

Yem igò le lemwót mosol le Ngà Hemtahu
són mò le stulón Hemdón. Sentulón le yem
tulón le kul yó kem mentey ubiha. Ke yó dum
deng ton te tum Benwu Tilob, mon Ngà Hemtahu,
hyu nawahu dou.

Deng ton te nóngen, mon Hemdón, deng
tngón te là buden mayuk duen.

Yem deng kkól le bè but yem bulul yó, sut
le bè yem lan sigol. Nim lan ni lemwót gu bè
yem benwu boluyen Hegmón ne wen ngà mlóy
huli kul lemolò lan Tau Geta yem ksut le Ngà
Hemtahu. Gunuhem gu lemwót de? mon Ngà
Hemtahu.

Lemwóte dyuu sentu bulul, monen, mógówe
ebè Benwu Tilob.

Angat dô henmóyô le uu du kô? mon Ngà
Hemtahu.

Laen dù tau kenbê le, monen.

Là kô kdéen du, mon le. Wen kum surat nwit
mò tolok. Wen kô kóm?

Là, monen, omín he myó du. Heseke béleen snéen do, abay se nímónu kdê dóken do. Gungolu, kóyóen kun le tnagak le berwu le yó kem tau ne mógów le etu béleen, ne ní se dou nógów.

Okóm sen, mon Ngà Hemtahu, yem kun hesek tum Tau Geta sal mian bè bak tikeb ne mian bè kdos. Dô lewu nawaw kóm kô là tnóngem du.

Bê dê hlmahem du dé, mon yem ngà yó boluyen Laen Tngón. Monen mò ke Ngà Hemtahu, Là tngónu du kóm gunu lemwót snéen okóm lumun tóí lemwót klokok bak tikeb yó se gunun hyu klanem du abay se lemwóti dtu. Bong mayuk béê me kum tum bak tikeb tu ne là se kem hendem me du mógów edu. Ne là se tngón me du lan edu. Wen tay kum lan tilob mò gunu me hmahil yem kum kógow.

Là hoí tngón Ngà Hemtahu du mò kbalaen du, ne yem keslob Laen Tngón ma yó kem bungu koyu, tódô le hekteng le Ngà Hemtahu. Là dog ktesen kul ne mon Hemdón se, Na te hatan dé? Dog ne, mon Ngà Hemtahu. Tódô ktesen tu he kedeng.

UDÍ KEHTAHU

Là dengem bud mayuk lan le Ngà Hemtahu, sana wen bud ton le. Tódô ton le tay ndalu

wen. Lemumak le sudeng, ne tódô tngón yó kem ngà lemwót le bè benwu Datù Sidek yó kem sendalu yó.

Kà angat dô hensidek le kut du? mon Hemdón.

Ngunte dé, mon Ngà Hemtahu. Tey bud klikò yó kem ngà, okóm tódô le hlós mógów.

Okóm timbow le moni yó kem sendalu, wen ton yó kem ngà, tau kenfô nwit le. Ne tódô dilô le bè nesen ngà tehe milo ebè Tau Geta. Tey alí keheslô le du yó kem sendalu, là dog getngón le temngel kul le Ngà Hemtahu mógów. Tódô mógów kudung yem ngà kenfô le yó abay se myak temngel ebè le Ngà Hemtahu.

Tey tehe bong nawan ke Tau Geta snéen kun, ne tehe là buden hol mayuk béléen yem bak tikeb Benwu Tilob. Deng mom bud senyaten yem lan tedeng ngangen efet geslongen yó kem hesek Datù Sidek. Tey kehyu nawa le ebéléen yó kem hesek yó. Yó gunun beyen nù bélê le ngangen efet klifóten Tau Geta, ne là bud nimónen du kun udin Tau Geta. Gotu mom nkê fak yem sudengen, ne deng lanahen yem surat nwiten, ne laen dù temngón du ke mogot nawan bè tum Tau Geta.

Okóm sotu kdaw bè yó, bud gtulón bè nawan, ne tey khuli selen, ne són moen hemdem du ke gbek Tau Geta hmifót yem deng gmoen. Ominen tmagak yó kem ween yó, ne bud tô hnebelen yem tehe lanen. Gungol Datù Sidek yem deng kewóten, ominen mdók kem sendaluhén mò ne e mebel du. Ne ton le, omin le kemfô du. Timbow tô dilóten sudengen yem ngà mò tô ofinen knuen, deng mom hlò kê fak, là dog gsoken du. Omin le mfét du lingkai sengkebeng yó

kem sendalu, ne bud nwit le etu bè benwu Datù Sidek.

Hyu nawa le Ngà Hemtahu là dog le mudél ebélê le yó kem sendalu, okóm tey kunu nawa le tum ngà nwit le.

Bud gbel bè nawaw, mon Ngà Hemtahu igò le mógów, yem tehe knuu bè Gunù Tilob, senfalahu tutul yem ngà boluyen Udí Kehtahu. Tehe kenfô le lemoni seblà bè ní. Dô le gel mógów ebè ní tu kem hesek Datù Sidek. Hol te temgama, déke hensidek le tu.

Mon Hemdón, Tulónem do kun kmò kekfô le ke Udí Kehtahu?

Mon Ngà Hemtahu, Tey klitegen kun. Ominen myón bè yem klokok lan, tô hegnù, ngangen efet gtungô. Tungô bè kilil yem sotu lan deng tehe nius te, nè là kóen ne e hyu tum bè tu. Ne wen kem tlu ngà là mdengen bè yem lan, ne ton le Udí Kehtahu tungô klokok lan, ne omin le mnagaw yó kem kimuhen. Song tô btik deng mom sensogot le, omin le mbot du te tonok, ne tey kbogul le du. Omin le gotu ma yó kem filaken, ne deng tô hnatay le, okóm kendel wen gungol le muni.

Tedu muni ní? mon le.

Bud mon Ngà Hemtahu, Laen dù tau, abay sem alí le líkò bè yem deng nmò le, deng le alí langaf. Wen ngà benwu udí lem yem bulul. Boluy yem tau munung du Kmodu. Ofol kul ni kem ngà ke deng tonen lu, yó gunu le mlóy.

Mò kmò Udí Kehtahu se? mon Hemdón. Matay kô?

Igò, okóm là ton le yem sulat nwiten. Balù yem kiana filaken, là alí gotu nawan du, okóm tódô bud btik bè yó, ne tódô bud ganag olunen kógowen.

40

SMUKAT

Tolo lel le semtulón ke Udí Kehtahu yó kem ngà, ne yem gfaen, yem ksut le bè yem syat, ne tey mgel hménég du mahi du tahu lan. Ke mdai bè kilil yem lan, malù tedeng ktonem yem syat kwanan, okóm ke budi mógow ebè doli yem lan, bud tedeng snéen kun yem syat iwóng.

Là tngónu du mahi du lan bè ni, mon Ngà Hemtahu. Omin le tódô htengen mdà. Deng wen se tehe blay le kul tu kem mentey ubiha mò ilô le lan, okóm là dog mom tenngel le du, són mò le tendo mifal yem lan, hnénég le mahil du yem alí tedeng.

Ne wen tau ton le huli kul. Hitem lem uyóhen, ne tey sidek mton du, okóm bukay nesen. Ofol kul yó kem ngà ke tau milo se kun.

Mò ye ni du? monen.

Mógow me ebè Benwu Tilob, okóm là dilô me du mahil du tahu lan bè ni, mon le.

Kmuli yem tau yó, monen, Élé. Bê ye hlangaf dé. Mógowe ebè Benwu Tilob snéen do. Tódô lolò ye o.


Omin le tódô mung du le Ngà Hemtahu.
Okóm song mò le hkuón deng legen. Tehe le
smolu ebè Benwu Tau Geta yem kógow le, okóm
ni, deng le mom bud smolu ebè yem bulul gunu
le tehe slob.

Là kóen tedeng lan ni, mon Ngà Hemtahu.
Omin Hemdón htengen mdà, monen, Tahu kô?
Sundu ni, mon Ngà Hemtahu, abay se deng
mom knogol te Benwu Tilob. Ngem, yó sili yó
kem bulul bniwel tekuy hiafus eginu, mom bud
sut etu nim lan ni.

Snukaten tu tau ni, mon Hemdón.
Mon Ngà Hemtahu, Bud te mulék.
Mon Hemdón, Okóm kô ktesen tu, ne mom
hnatayen tu. Là kóen tahu tau mило tau ni.
Ngunte dé, mon Ngà Hemtahu. Yakem bê
te mung du koni. Mlôy te.

Okóm hol le se tô beklil yó kem ngà,
kendel geslaen se kun kebeklil yem tau yó, ne
hol le se tô lemwót mlôy deng le sana gbaus lem
yem salaf tudaen eta le. Omin le tódô gotu masà
bè tonok, lel langat le, kóyô le ke wen mungol
kul. Okóm mom kmuli yem tau yó, ominen tmagak
kul. Ominen tódô mlus béleen yem nes bukayen,
ne yó he kdilô le du hesek Datù Sidek. Yó gunun
mnes bukay ani hyu ksukaten yó kem mило ebè Tau
Geta. Tey tô kehgel le hewà yó kem ngà, okóm henlel
le se tô hgel, mom hnolien mget yem salaf, ngangen
là bud le mgel, ne tódô le masà bè yó, mkik le.

Dô Smukat tau tu koni, mon Ngà Hemtahu. Tehe
mon le mò kut le Mentey Ubiha, Bê ye hnungol ke
wen monen mò kuy. Là hyuhen kógow te ni.



Mon Hemdón, Ne là dog te temngel yem mò
ilô lan deng blay le kut. Són mò te hudél knù.

Mon Ngà Hemtahu, Ke yó dum lenwaen tu tum
Tau Geta, dô là bud te hbakà ne.

41

LENWAEN LU YEM TAU MNES SMINANG BUKAY

Tey klikò yó kem ngà, kô bud suloy le buteng
nù bè yó lem salaf.

Yéy, mon Ngà Hemtahu. Déke nan e tulón
ke Datù Sidek, ne hangayen tu sendalu.

Timbow deng móyón sdef kdaw, tódô gungol
le yem legdeg, okóm hanà tolo mayuk. Ngangen
efet monl yem legdeg, botong kenkel Hemdón.
Okóm tek sotu yem tau ton le, ne tódô dílô le
lem uyóhen ne bè yem ksinang nesen, du se sotu
hesek Tau Geta.

Timbow tonen yó kem lewu ngà ominen htengen
mdà. Mò klan ye elemen salaf ní? monen.

Langaf me, mon Ngà Hemtahu, là trigón me
du yem tahu lan. Ominen sut belê me yem tau
mnes bukay, ne monen mò kum, Mógówe ebè
Berwu Tilob se do. Yó gunu me lemólò du.

Smukat se yó, mon yem tau mnes sminang
bukay. Ominen lemnek kemsê yem salaf. Omin
le Ngà Hemtahu yó gewà, ne mdà le bè yó klohoken,
hatan le ke wen tulónen kul. Tey kebang nawan,
ne bud gtulón bè nawa Ngà Hemtahu yem tehe
ktonen ke Mit Tulón Hyu lumun yó mò kmoen,
yem tehe ktonen du gu lem blóng botu.

Ominen lemwót yem tau yó mulék, ne mung
du yó kem ngà. Tendo le sogot yó kem lewu ngà
yem igò le mógów. Timbow le kól bè yem tahu
lan, ominen mon du mò kul yem mnes sminang
bukay, Gunu ye tungô ebuteng?

Bè kem mentey ubiha, mon yó kem ngà.

Wen kô ilô lan blay le kuy? monen.

Wen se, mon yó kem ngà. Ne sòn mò le
kudung, bà mon tey kyak le.

Tenngel ye se kô yem ilô yó yam klangaf ye yó?

Là, mon Hemdón, ne mon Ngà Hemtahu se
kun, Klifót me.

Ne tedu se dumu mon le mò kuy tu kem mentey ubiha? Tulón le kuy kô yem Smukat?

Igò, mon yó kem ngà. Mon le mò kum, Bê ye hnungol.

Moen se ke hnungol ye yem monen mò kuy du? mon yem tau mnes sminang bukay yó.

Là tngón me du yem tau yó ke du Smukat abay se tey hyu kestulónen kum. Ngangen efet le mkik yó kem ngà, okóm hen-gimaken lu yem tau yó ne hningelen stulón kul.

Tey alí khudél ye knù ni, monen. Okóm deng kendlà ye ne ni.

Tahu se, mon Ngà Hemtahu. Ou alí bong salaen.

Là, mon yem tau yó, tódô senced kuy wen salaen. Ke là wen hógów Tau Geta, ngunte kà deng kenfô sendalu Datù Sidek kuy, ne deng hnatay le yu ne.

Okóm balù yem deng khógów Tau Geta ke heseken mò ne e mebel yó kem tlas, bong blat nawan se kun. Ne yó sotu gunun hógów yem tau mnes sminang bukay mò ne e mfes kul aní medlà le.

Mon yem tau yó, Hnifóten yem sidek nmò ye tum Tau Geta, okóm htafaken yu abay se deng tey kegen ye milo, là dog nimón ye yem tulón le kuy yó kem mentey ubiha.

Ne wen ton le fes kulónen yó kem ngà, ne tey dê duléken temnú du ta le. Tey sidek kdesen okóm tngón le wen duónen kul tum Tau Geta.

Timbow deng kfesen kul, ominen mon du mò kul, Là bud hendem Tau Geta du ne yem nmò ye.

Yem Ngà Tau Geta, monen, tehe mîlo se kun,
ne là kô klifóten du yó kem kun hlayam ne yem
alí ksídek lan. Són moen tendo temngel kuy,
ne ke là hol ye temgama, ke wen gunu ye là
mimón du, sal gel hnihen bè Maen aní hnifóten.

42

YEM TAU BOLUYEN HEMDA

Timbow tnagaken lu yem tau mnes sminang
bukay, tódô mekteng klolô le yem lan. Timbow
deng tlu butengen bè yó, omin le gemslong yem
tau, okóm là tngón le du ke wè le duhen hohon
le. Lan le hlalak yem datal lem blóng le Bulul
Hentaw yem Benwu Hligal. Yem doli yem datal
yó boluyen Tonok Hoo Ktuk. Na bud tulón Hemdón
ke Ngà Hemtahu yem tehe mon yó kem mentey
ubiha bê le abay hegtungô bè yó.

Là kô deng klifótu du he, mon Ngà Hemtahu,
okóm hyu nawaw abay se là deng klifótem du se
kóm. Hol te temgama ni kmoen ni. Deng tey ktahà
lan te ni, bong sidek hemgnóm du ke ne e wen kemfô
kut lumun yem sotu ngà ton te sotu kdaw yu.

Mon Hemdón, Bê te abay bud hnungol ke wen
dumu smukat kut. Na, dô wen tau tukô gna kut?

Igò, mon Ngà Hemtahu. Là mógówen ebè
Benwu Tilob, dô senlongen tu.

Dô sundu sotu bè yó kem gel mnes sminang
bukay, mon Hemdón. Wen nes bukayen, okóm
deng mom tólóng mò klanen.

Ominen mdà yem tau yó, boluyen Hemda, ne
snólóken gunu le esolu yó kem ngà. Tey hyu lem
baluhen, ne tey hyu kestulónen, okóm là hentahu
le du yó kem ngà yem monen.

Mógów me ebè Benwu Tilob, mon Ngà Hemtahu.

Kmulí Hemda, Nawaw yu kem ngà, monen.
Moen ke là na ye hol hentukul du gu laan ye là deng
lemwót?

Moen de? mon Hemdón.

Gunu hliteg nim nmò ní, mon Hemda, ke kól
ye ditu bè sónen olo ye henà.

Omin Hemda hningun tô hebang nawa, ne monen
mò yó kem ngà, Laen kô dù Tau Geta, ne laen dù
Benwu Tilob.

Ê, mon Ngà Hemtahu, wen gi. Wen Tau Geta
ne wen Benwu Tilob. Deng gungol me bè hesek
Tau Geta.

Omin Hemda hemgimak te abal Ngà Hemtahu,
ne tô benklilen mulék, monen, Tolohi lomi tau he,
Ngà, ne denge tuha ne dou. Hnungolem nim tulónu
kóm. Deng tey legen ne ekni kungolu du dou yem
tulón le kuy. Gloku gemtagak gunuu, yehenu ne kem
ngau, new e tô hnebel ke wen Benwu Tilob.

Angat tonem he yó, mon Ngà Hemtahu, ke
henlósem mógów.

A, mon Hemda, deng tey mayuk ne do lan.
Deng lewu folò ne halayu mógów, laen deng benwu
tonu.

Blat nawa Ngà Hemtahu, temngel ebè Hemdón,
monen, Dô tahu kô nim monen ní?

Là, mon Herndon, là tahuhen monen yó. Béem
hnungol. Igò te deng mton du gu bè Bulul Hentaw
tum benwu tu. Heflóng te, déke bud tñafaken tu
yem tau mnes sminang bukay.

Mda bè yó Hemda, tenngelen yó kem lewu ngà.
Mung ye do, monen, aní ou bud mit kuy ebè kuy
benwu.

Okóm tódô hlóbô Ngà Hemtahu. Són moem
tendo tô smukat kum, là kô hnungol me du monem
yó. Són hnungol me udél Tau Geta, ne tngón me
wen Benwu Tilob. Deng ton me gu bè benwu kem
mentey ubiha.

Olo Hemda hising. Kodu ye, kem ngà. Hlós
ye sen. Hnéng te ke wen benwu ton ye. Muléke
ebè benwuhu dou.

Mógów me ebè Tau Geta kum, mon Ngà
Hemtahu.

Omin le bud lemwót. Ya tey kuli Hemda kul
yem igoen beklil lemwót se kun.

TONOK HOO KTUK

Omin le kól bè yem doli yem datal, bnoluy
le Tonok Hoo Ktuk. Tey dê kenbeyen ton nù du,
tilob, ne golung. Wen élen, ne wen kem koyuhen.
Tódô menek bè yó. Són duen laen dù labaten
lumun yem bè Sbong Menek. Yó gunum mon

là hyu hegnù du. Wen kem hesek Datù Sidek
gel hékét gu lem blóng yó kem botu ne gu bè
yó lem bnes. Gel kenfô le ke wen tau tungô
bè yó.

Adéy, mon Hemdón, moen ni ke moo ktuku
dou. Són moen tendo tô stikom klubéng matahu.
Na te myón likót dé aní na te gehegnù.

Là ni du bè ni, mon Ngà Hemtahu. Ominen
mogot du ne ningolen, E Hemdón. Hemdón. Hemdóne.
Moem kmifót ni du? Tonok Hoo Ktuk ni bè ni.

Laen bang hemsidek kut bè ni, alu udél Hemdón.
Olohu tungô likót ne. Tódól gna, Ngà Hemtahu,
béem nangat o.

Ominen tódô hegluduk bè yó bè kilil lan. Ne
omin Ngà Hemtahu bud bemtik du, ominen hendlà
kemingkok du, monen, Mò kehedemem yó? Là
gungolem du kô yem mon kem mentey ubiha mò
kut? Là dog senkóhen du hemtê ke Hemdón efet
btik.

Ominen yó he hetngón Hemdón, monen, Tey.
Tedum tô mò do ni koni? Ngunte kmou ni ke tek
sotuhu. Denge lemnga ne. Ni he alí kegnómu
klitegu klawiw ngà.

Mon Ngà Hemtahu, Deng tô skofí matahu
snéen dou, okóm bud mkó bè yem lanu bemtik
kóm. Hyu nawa te abay se seglomong te, monen.
Mebel te sentulón te dé yem hyu aní là gtungô te.
Tulónem do yem kóm kógów lemwót ditu. Là
deng gungolu du he yó.

Mon Hemdón, Tehehe gna kóm dou. Tngónu
Teneb. Yem gel kestulón Mit Tulón Hyu du, sal
gel mógów ebéléu, gel tulónen do yem deng gungolen.

Là hol kenmónu du, okóm deng legen udi omínu yó hemdem du mógow ebè Benwu Tilob. Ne sotu kdaw mlóye ebè bak tikeb ne tódóe hlós. Yó kbuten yem kógówu. Okóm timbowe kól bè Hembeyen, slobe là mdengen bè yó kam ngà bè yó bè lan. Ngangen hlós ngali le o, ne hlóse nù balé le.

Mon Ngà Hemtahu, Hligali se kô bè yem benwu yó?

Hligale lem blóngen, mon Hemdón, okóm blat nawahu snéen. Ne sotun ke wen tau milo mlan bè yó, tey sidek kyaku. Là móyóe ston kul. Gele hebnos. Ngangen tonu yu lewu ye Teneb, ne tódó kendel dílóu yem ktonu du.

Mon Ngà Hemtahu, Tonem kô yem kbogul le kum?

Igò se, mon Hemdón. Tenngelu yu yem knù ye lem kukub. Ne suléku kmadaw ebè yem gunù gel temngel, okóm tolohi dô tungô. Són Teneb mton do, ne na me ne stulón.

Bud mon Ngà Hemtahu, Tedu se monen mò kóm du?

Monen mò do, Géhél tnagakem benwu ni. Ne bud monen, Hnifóten yem deng nmoem tum Tau Geta, lemwót bè tum Ngaen yem kehlifóten du. Ne tonu yem alí kehlayam le ke Teneb, ne yem tódó kehegbayaen abay se bong nawan tum Tau Geta. Ne yó bud mawik nawahu. Yó gunuw mung yem deng kehewà le kóm.

Mon Ngà Hemtahu, Hyu nawaw dengi mung. Hyu nawam se kô kóm du?

Igò se du, bongé hligal se do, mon Hemdón. Deng trigónu ne bong nawan do tum Tau Geta, ne là buden legen kgefet te bè benwuhen.

NANGAT LE LAEN DNALANG

Tek sotu Laen Dnalang huli. Là dog kenmón le Smukat du lewu le Hemda abay se tehe là tódô yem kewóten bè kun benwu. Anien ke kól bè Benwu Tilob là kô henmóyô le du yó kem hesek Tau Geta, angkat bud hulék le ebè kun gunu dmatù, Datù Sidek. Yó gunun laen dù kun gfa bè lan Laen Dnalang, ne là se dogen moo ktuken yem klanen bè yem Tonok Hoo Ktuk.

Yem kul klan bè yó le Ngà Hemtahu, sòn mò le tendo kmunu du nawa. Omin Hemdón binguy, ne tódô tonen Laen Dnalang.

Myó sii, mon Hemdón, na te hatan dé.

Yó sen, mon Ngà Hemtahu, aní hyu któbóng te du ke moo ktuken.

Igò Laen Dnalang sem mton yem kangat le du, igoen là dog kemmón kul.

Là hyuhen ke feni hegtagak huli, mon Ngà Hemtahu. Slomong kuy dé, aní segduf tekuy.

Omin ke slomong, mon Laen Dnalang, kihu sotuhu do mógów, igoen tey dê dumu hendemu dou.

Tedu hendemam yó du ? mon Hemdón.

Tum Tau Geta ne Benwu Tilob, mon Laen Dnalang.

Là geblaen ke olom tô hemdem du, mon Ngà Hemtahu. Hatan mkó nawa tekuy he dé ke deng tekuy kól béleen.

Dou se du, mon Laen Dnalang.
Moen se du ke là heflóngi? mon Ngà Hemtahu.
Tódô ganag olunu nì do kógów tógón kgefetu
he, mon Laen Dnalang.

Okóm sen, mon Ngà Hemtahu, ke là
temgamahí, angat wen gfaem.

Ke wen se gfaú, tnóbóng Tau Geta o he,
mon Laen Dnalang.

Là kô tnóbóngen kóm tum Tau Geta ke là nímónem
hlauhen, mon Hemdón, udélen dmiłô du bè Laen
Dnalang yem là hol ketngónen yem hlau Tau Geta.

Tilów nímónu he, mon yem ngà yó. Igou
deng tmebel benwuw do kógów, tedu se bang tô
kmou?

Là młust bè kdos kô? mon Ngà Hemtahu.
Munu nawaw kóm ke laen dù sulat nwitem lemwoł
bè tum Tau Geta, ne laen dù nes bukayem. Angat
dô là henmóyô Tau Geta kóm.

Là lanen du yem kestulónem yó, mon yem ngà.
Igou deng semfala du kun kmò Tau Geta ke laen kun
nes sotu ngà, angat tódô benlayen he yó, ne angat
henwiten o he yó. Moen ke bud hlíma mógów ebè
bak dól trikeb ne ebè kdos ne e mebel du? Lumun
tô là deng gel hentahuhu yem gel monen tum Tau
Geta.

Ne bud gtulón bè nawa Ngà Hemtahu yem sulat
tehe blay Mit Tulón Hyu du yem hanà là deng ktagaken
yem Benwu Angat Meglà. Ofol kun ke wen se ke
Laen Dnalang, ominen smólók du, Wen kô udél hwit
Tau Geta ebéleém?

Udél du de? mon yem ngà. Bang tô udél hwiten
se. Là hendónu du ke wen hol Tau Geta hemwit
udél ebéleú.

Tódô teneng Ngà Hemtahu. Là hol tngónu du mò kestulónu du, monen mò ke Hemdón. Tódô óyóen yem kun kmò yó, okóm là sem hentahun kut.

Deng miteg mudél Laen Dnalang. Là móyóe slomong kuy, monen. Tódô ye slomong lewu ye.

Ne là bud tngón le du mò kestulón le du yó kem ngà, omin le tódô hlel gna, ne hganag huli ke Laen Dnalang.

45

BENWU HlIGAL

Deng gku yó kem ngà yem gunun moo ktuk le, ne deng le kól bè Benwu Hlidal. Yó benwu là deng gel ton le du, bà mon tey ktiloben. Tey tilob mton hulohen ne kem bnesen ne dê kem koyu tilob bulóken. Ne gfan gu bè yó Benwu Tilob, ya tey nóngen. Yó se yem tehe gfan gu bè Bulul Hentaw. Tódô dilô le tum benwu mnóng tu abay se deng tehe tolok le kul tu kem mentey ubiha.

Là kô le gógow ebè yem Benwu Hlidal tu kem kun sendalu Datù Sidek. Kdê yó kem tau nù du sal hesek Tau Geta. Tey khódó le kul le Ngà Hemtahu.

Laen dù bud gfa ye ne, mon le. Olo ye ne nù bè ni efet kwen surat gu bè Tau Geta.

Kilón du kehuiten? mon Ngà Hemtahu.

Là tngón me du kum, mon le. Wen kem ngà gel legen bè nì, ne wen se là. Ne wen gel hmò Tau Geta kem dumu ngà bè benwu Datù Sidek, okóm sok deng, gotu le mógów ebè Benwu Tilob, ne laen dù sònen knù le ditu.

Là klifótu du, mon Ngà Hemtahu, yem tehe któbóng Tmóbóng do kegebengu lem bob. Monen deng tehe kól ditu bè bak tikeb Benwu Tilob, okóm tolo wen hmoen du tum Tau Geta.

Yem igò le tendo bliwel bè yó le Ngà Hemtahu ne Hemdón, tódô gtulón bè nawa Ngà Hemtahu ke nù bè yó yéen bè Benwu Hligal. Là se tngónen du ke deng kól bè Benwu Tilob. Són moen tendo milô du gu lem blóng yó kem dê tau geslongen, okóm laen dù tonen mkél bè yem kun tulad yéen. Deng dô tinok Tau Geta mni, monen. Ilóu kehyn bud mton ke yê. Ngunte kà deng dô gungolen du nim knù me bè nì, ne deng sòn moen tendo mangat mni.

Tey dê buteng le bè yó, yó kem ngà bè Benwu Hligal. Ne yem sotu kdaw nauy le yem sotu sbong senlemen tódô hnok hulu. Ominen mon du mò kul yem tau gel mò hulu bè yó, Mógów ye sen elemen, hò hulu Tau Geta nì kem nì, mò gel briwel kem ngà.

Ominen malak yó kem ngà, ne toloken kul yó kem tey dê tilob mulók. Ne yem deng kkifuhen bè yó, ominen mit kul ebè yem tey tilob gunun htungô kul. Són mò Ngà Hemtahu mon du yem deng móyón sdef kdaw, Tey, tey kehyn nawahu dou, deng te kól dini. Gotu tô klifótu kdê yó kem deng gfau gu bè lan, lanu alí hligal.

Mon Hemdón, Hyu nawaw denge mlóy gu bè
Hembeyen, ne hyu là lanahu du ditu yem dou sulat
nwit. Là kô tngónu du yem là dog keklifótu du.

Mon Ngà Hemtahu, Són olo bud nangat te ni
sulat gu bè Tau Geta. Móyóe snéen ke wen hmoen
do, okóm bong hyu nawaw ke tódóe hekteng etu
bè benwuhen.

Dou snéen, mon Hemdón.

Omin le hlilil lumun yem tehe ktungô le bè
Sbong Menek. Song btik le deng sut kdaw.

46

ÉL MAMÀ

Deng tey moni bè Benwu Tilob ne yem benwu
gunu le deng tungô yó. Tey dê tendo hógów Tau
Geta mò ne e mauy yó kem tau nù du. Tódô mnóng
lem uyó le, lumun lem uyó Yê Ngà Hemtahu tehe
keknahen du, ne hlò bukay sminang nes le. Ne wen
tulón le ke gel mon Tau Geta mò kul. Ne són mò
le Ngà Hemtahu mangat du se kul ke géhél wen sulat
hwt Tau Geta ebélé le.

Suloy le tungô bè yó bè gunun alí dê huluhen.
Ne deng hlafus bè yó, omin le bud bmiwel du. Ne
wen lewu bè yó kem mnes sminang bukay ton le
semlong kul.

Mógów ye ebè Benwu Tilob kô? mon le.

Etu se, mon le.

Ne omin le gotu smólók du bè yó kem ngà yem tehe mò kewót le. Ne gotu tulón Ngà Hemtahu kdê yó kem gfaen gu bè lan, ne tulón Hemdón se kun yem alí kegenen bè Hambeyen.

Tey là dog hol kímón me, mon le, okóm là ne. Ne deng tey bong hendem me ne, ne bong nawa me tum Tau Geta.

Tngónen se yó, mon yó kem mnes sminang buhay. Deng hnifóten ne yó kem gunu ye là gult, ne yem tendo là kímón ye du abay se deng hni tum Ngaen. Ni gunun hógów kum aní tngón ye kehkosohen kuy etu tum Tau Geta.

Tey kehlígal Hemdón kungolen ním ni. Bong hyu nawa Ngà Hemtahu snéen kun, okóm timbow hendemen angkat kdaen bè solu Tau Geta, deng mom munu nawahen. Ominen mon du mò yó kem mnes sminang buhay, Mung ye kum kô?


Na me mung kuy likót, mon le. Bud sentlong me yu dítu he, bè bak tikeb Benwu Tilob.

Omin le mít yó kem ngà lemwót bè yó efet kól ebè tum tey él lamang. Tey mamà yem él yó, ne sidek mifal du, okóm sentuhen gfan nóng Benwu Tilob.

Étey, mon Ngà Hemtahu, mò kifal du él ní?

Tódô nifal ye, mon yó kem mnes sminang buhay. Okóm bê ye hlikò. Deng nù sentuhen. Benwu Tilob, ne móyón ye gefet du.

Okóm deng mom là holen mdengen kton Ngà Hemtahu du kun, lanen alí likò, olon mton yem lemayag sentu él. Tey kkelen ktonen yem él, ominen bud temngel ebè yó kem mnes sminang buhay. Ngelem, monen, gunu konul ním ni ka lusuhem mifal du.



Là, mon yó ken mnes sminang bukay, là
kô ye kmifus du. Bê ye tenngel yem é! Tenngel
ye tum layag, ne angat tnóbóng Tau Geta yu.

Mung ye kum dé, bud monen mò yó kem mnes
bukay. Ne sòn mò Hemdón hemtaw yem alí
kluséken.

Là mung me kuy, mon le, okóm senlong me
yu ditu fi fatu kedeng, ne nit me yu ebè Tau Geta.

Tehe lan yé bè ni se kô kun du? mon Ngà
Hemtahu.

Igò se du, sòn moen mangat kóm, kóyóen ke
géhel tonen u. Béi hlikò. Tódói smalig bè Tau
Geta, ngem sem tey któbóngen kóm du.

Omin le lemwót yó kem mnes sminang bukay.
Ne omin Hemdón hemgímak ke Ngà Hemtahu, monen,
Sónen ni ne hlayam te, ne móyónen mkó ne. Tódô
te segeng. Tau Geta he tmóbóng kut.

Tahu se, omin le lemwót mifal yó kem ngà.

47

KUN KIFAL LAEN DNALANG

Timbow sut bè Benwu Hligal Laen Dnalang, tey
tilob kudél le ebéléen yó kem tau, lumun yem kudél
le ebè le Ngà Hemtahu. Okóm timbow dílô le yem
là hol ktahuen tau milo, tódô tebel le són du, ne
là se dogen hekmón stulón kul. Mius bè bak labat,
yem dê hulu lanen, okóm là dog hógówen du elemen
yem tau mò hulu. Ne balù yem gel ketngel yó kem
mnes sminang bukay, là dog le stulón du. Ne laen
se udél lemwót bè Tau Geta tulón le du.

Ngangen efet kól bè tubé yem él. Ne maan se
ktonen yem Benwu Tilob fi fatuhen. Ne igoen sem
temngón du ke là nan nifal yem él yó, là kendelen
gesón he kógówen. Ominen na mdà likót hendemen
bang kmoen du, ne ominen hlilll bè yó bè killilen.

Na hegnù likót dé, mon nawahen, nangat ke
wen mifal, lelen laen dù kitayen, déke wen ówóng
gel mangay tau.

Wen se yó dum ówóng, okóm Datù Sidek
funen, ne là hyu ksakay le du yó kem kun tau Tau

Geta. Boluy yem tau mit du Tmundug. Timbow tonen Laen Dnalang hlilil lem bnes, ominen kemwa ebéléen yem ówóng.

Bang kifalem ne, monen. Wen ówóng nwitu mò gunum smakay.

Tey kehyu nawa Laen Dnalang, ominen hkadas btik, monen, Hógów Tau Geta uu kóó?

Hógówen o se, mon yem tau yó. Là holen ngelem dé nim éi ni, deng hunù lan kem ngà, okóm ke wen se ówóng yó mò snakay.

Omin Laen Dnalang mogot bè sigel yem tau yó, mógów elem yem ówóng. Ne omin Tmundug kendel hetlasik kemwa mifal efatu.

Mò kmou ni du? mon Laen Dnalang yem deng kkólen fi fatu.

Omin Tmundug temdok yem ngà lan udí. Yó hol tahu lan, monen, mló ne mahil. Ke deng tehe senlong le u tu kem mnes sminang bukay, wen lan hlólò le kóm, okóm alí bilil ne sidek. Tódô henketengem mneged efeti kól bè gunù Tau Geta.

Ominen bud lemwót bè yó, ne lemwót se ke Laen Dnalang mneged ebè tum benwu. Laen dù tau geslongen, okóm timbow gefet ditu bè bak tikeb, deng gotu mom tnikeb le. Ominen temngel eta, ne tonen yem snulat le hlò blówón monen:

HLIGAL LE KUL YÓ KEM MIMÓN YEM KUN HILAU

Tey tendo kimónu du, mon Laen Dnalang. Ominen tmaba bè yem bak tikeb. Klifóten yem hlau Tau Geta, ke wen mógów ebéléen, ne le lan

bè labat tnikeb ne slob le bè kdos. Deng dê
duléken ne gel mungol du, okóm là holen nù bè
nawan yó gunun laen dù tóbóng Tau Geta du. Lewu
duléken tnaba, okóm laen dù malà du. Deng legen
udí bè yó, sut yem sotu hesek Tau Geta, ne monen
mò du, Gunum gu lemwót de?

Ngae mîlo, monen, ne lomi nifalu éi koni,
ne móyoe nù dini bè Benwu Tilob.

Hnéneg te kún ke wen surat nwitem aní toloku
ke Tau Geta.

Tngón Laen Dnalang laen deng surat kól
béleen kún, okóm hningun tô kmolut lem sning,
hningun tô mebel surat. Ominen na mangat du
likót yem hesek yó, okóm laen se duen. Ominen
mon du, Dô laen dù nwitem. Ominen ne e smólók
ke Tau Geta mò kmò du ngà yó.

Ominen yó he huli sel Laen Dnalang. Hyu ke
béen tódô fà mógow. Tey tilob benwu ni, mon
nawahen. Kóyô te nù bè ni, kyò kut, kô là
hfusek le do.

Timbow tngón Tau Geta yem ngà kól bè yó
laen dù surat nwitem, balù nes bukay là leseken
du, ominen mon du, Là tngónu du ngà yó. Bè
ye hfusek.

Ominen lewu bè yó kem heseken ne e mfét
yem ngà ne eted le mayuk ebè kún benwu Datù
Sidek. Hyu nawa amohen deng bud mulék yem
ngà ne là se kóen ne e bud gewà.

Tey kkik Laen Dnalang. Mon yem Datù
Sidek mò du, Kóm salà ni. Ke hol kóyóem se
nù bè Benwu Tilob, yake deng nimónem sen ke
wen hlauhen kóm.

GESÓN KÓGÓW KEM NGÀ

Són mò Ngà Hemtahu hefyos kegnómen ketnaw yem tey éi mom hitem. Són mò Hemdón tendo semgalak du. Okóm timbow là bud gnóm Ngà Hemtahu gunuhen mdà, ominen lemangat, Lemnebe. Denge knifus.

Igò beng là, abay sem lemwók, mon Hemdón. Béi alí hlikò dé, igou sem gemdà bè helek se do du. Hol hninggel te mifal du, igoen tek són ni ne duen hen-gel te.

Gbekem kóm du, mon Ngà Hemtahu, okóm là gifalu du dou. Angat là tonu ke Tau Geta dou, kóyô te nù béleen.

Angati nù béleen, mon Hemdón. Temngeli eta dé. Béem abay alí hendem nim éi. Deng bong tikaw ketngel te ne. Ngem, tey benwu tilob dé, tey lemayag. Ne wen kem mnes sminang bukay tendo mangat kut bè bak tikeb.

Uu nangat le, mon Ngà Hemtahu, sundu o. Ominen tódô hetngù ete abal Hemdón, ngangen efet là hol bud gungolen du yem udél Hemdón. Són mò Hemdón fen tendo mogot du, ne tendo fen mni bè Tau Geta aní tnóbóngen lu bè yem hol són hlayam le yó.

Omin Ngà Hemtahu mukat, ne timbow gnóng ebéleen yem layag bè Benwu Tilob, ominen dmawat, Deng tonu ne, monen. Lumun knóngen kdaw.

Ne gungolu udél Ngà Tau Geta, monen, Nue
bélê ye yem kifal ye ke él mamà.

Mon Hemdón, Yó se gunu te là hlikò.
Mogoti bè sigelu, là kô klífót Ngà Tau Geta du
tum monen któbóngen kut.

Ominen bud mgel nawa Ngà Hemtahu, ne
là buden kmífót, ne là se buden kenkel. Tódô
són mò le sogot mifal yem él, ngangen efet
là holen bud mgel mifal du. Omin le mton yó
kem lewu mnes sminang bukay tehe meted kul
bè él bud semlong kul. Ngangen efet gku le yem
gunun alf sidek, ne gnóm le wen mahun kul lem
él, na mdà le te kembu.

Nù te bulul tum Benwu Tilob, ne tódô gtung
etu yem lan lemwót lem él, tey lan lamang. Bong
bilil nim lan ni, lumun yem tehe ktulón Tmundug
du ke Laen Dnalang, okóm là sem dogen mima
bè le Hemdón kul, abay sem wen le mnes sminang
bukay tendo mogot sigel le, ne tendo sen-galak
le lu aní là tgiil le.

Éhé, móyón te gefet, udél Ngà Hemtahu
kmífót yó kem hlayam le. Deng són moen tendo
temngel eta, temngel yem beng ne bak tikeb
Benwu Tilob.

Móyónen ne, mon yem sotu mnes sminang
bukay. Angat ton ye he Tau Geta bè kfasangen,
ne angat lumun kehmóyóen kuy hol kun ngà.

Mon Ngà Hemtahu, Angat laen dù sónen kô
kehnuen do dítu?

Laen kô nen e són, mon yem mnes sminang
bukay. Angat là kói bud miteg duhen hebang nawa
soki kól dítu. Wen angat nmoem bè Tau Geta.
okóm bong óyóem mò du. Là kô hlitegen kóm.

Angat tonu yê kô? mon Ngà Hemtahu. Bud
gtulón bè nawahen yéen, kóyóen ke géhél tonen.

Angat senlongen u he, mon yem mnes
sminang bukay. Tngónen mungt kum, ne hyu
nawan abay se deng laen dù gfaem, ne dengi
gefet dini, ne deng gifaem éi mamà.

49

KÓL LE BÈ BENWU TILOB

Deng le tey moni ne yó kem ngà, ne gotu le
lemwót yó kem tehe tendo temngel kul hanà mayuk
ne e semlong.

Hlò kem kun ngà Tau Geta, yó kem mnes
sminang bukay. Nwit le lu ebè Benwu Tilob.

Yem Igò Ngà Hemtahu temngel eta, wen
tonen alí mngong lem uyóhen senta yó kem dumu
mdà bè yó. Émonem yéen mdà bè soluhen, tódô
mngóng lem uyóhen igoen temngel yem ngaen.

Ngau kô ni? monen. Omin le mò lanen yó
kem mnes sminang bukay, okóm deng eles tngón
Ngà Hemtahu ne kun, nè ominen tódô ne e lemagaí
ke yéen.

Deng ktesu uu, Yê, mon Ngà Hemtahu. Hyu
nawaw tey kesegyok Tau Geta do, ne gefete dini.
Ilóu kehyn ke angat hógówen se mà edini.

Là kô new e bud gtagak kóm ne, mon yéen.
Tey hyu kenawan Tau Geta. Mungi do, mógów
te ebéleen aní ne te e dóyón bè yem alí któbóngen
kut.


Tey kehyu nawa Ngà Hemtahu nen e ton yéen,
ne tngónen là kô bud ttagak yéen du, dalang se kun,
là kô bud gtagaken ke yéen.

Balù yem klaen dù kun dumu Hemdón deng
kól bè yó, són mò le tendo sbung eklohoken yó
kem mnes sminang bukay, yó gunun kmifót yem
keblat nawahen.

Deng tebel Ngà Hemtahu bè sentu yem éi
yem suken ne klungen abay se là bud wen senfatayen.
Són mò Ngà Hemtahu hemklol yem nesen. Tey
tendo tô kehgulamen du, ewenem sana kusingen
abay sem tey ktahà yem lanen, lelen wen tendo
dumun sfatay. Lelen munu nawan kô lenbut Tau
Geta. Okóm yó kem usingen deng gotu megolob
bè yem kifal le yem éi mamà. Balù sem kun nes
Hemdón, tey deng ksideken knuen bè Hembeyen,
tódô bud baling lomi yem deng kifal le yem éi
mamà. Hol lumun klomihen yem hanà lomi kguta
le du.


Tey dê tau ton le mdà klohok beng Benwu
Tilob. Wen kem féw blówón kulóng le. Timbow
le moni le Ngà Hemtahu ne Hemdón, omin le gotu
myuf yó kem féw le aní tngón yó kem tau bè
benwu yó yem kwen bud kól.

Omin le mon du yó kem mnes sminang bukay
mò yó kem ngà, Tmaba ye bè yem bak tikeb.
Tahu se, tmaba le. Ominen sut yem hesek Tau



Geta nwahen yem sulat ugu le Ngà Hemtahu.
Tímbow ton Tau Geta yem sulat, tey kehlígalen,
omínen hlungkà du yó kem heseken yem bak
tíkeb. Omín le mít kul le Ngà Hemtahu
ebéleén.

Gungol yó kem tau nù tem yem Benwu Tilob
yem uní fèw, ne deng eles tódô tngón le wen
tau hnódó le. Tímbow le husek le Ngà Hemtahu,
tódô ton le yó kem tey tau sbung mangat kul,
són mò le semngal, hódó le kul. Laen dù tau tonem
hebang nawa abay se laen dù brukù nawa bè



benwu yó. Laen dù des. Laen dù hebang nawa,
són mò le hligal.

Hanà tanayen, botong le sngel yó kem ngà
bè yem layag yem benwu yó, okóm deng malú
legen, baling knalam le, ne là bud le sngel. Ne
wen tey gunù tilob bè gunun sóól yem benwu yó,
botong keng ktilob yem Gunù Tilob tehe gunù
Ngà Hemtahu slob.

Bè yó kô gunù Tau Geta nù? mon Ngà Hemtahu
mò ke yéen.

Bè yó se, mon yéen. Ke dengl ston du, deng
hol gsengel nawahem.

Dange bong hligal ne, mon Ngà Hemtahu,
abay se deng tonu uu, ne bong nawam do.

Tahu se, mon yéen, okóm yem kun kbong
nawa Tau Geta, botong keng nim do.

Deng le gusek elemen ne yó kem ngà, ne
tódô bud gungol le yem tey tilob sngal, ne ton
le Ngà Tau Geta mangat kul. Ominen gemé
ebélê le, ne hen-gimaken lu. Ominen mit kul
ebè Maen. Ne tey kehlial yó kem tau lem yem
benwu yó abay se deng gesón kógów yó kem ngà,
deng gifal le yem él mamà, deng le gefet bè
Tau Geta.